

(欽定)平定七省方略

北京中國書店印行



欽定勦平粵匪方略卷一百二 甲寅年

閏七月初十日 丁丑 陳金綬雷以誠奏言前月二

十七日臣以誠因急須赴皖當往琦善營中面
商一切見其形容清減詢悉腹瀉日久延致不
意初三日早間復添頭暈痰壅氣喘等證醫治
無效竟於未刻因病出缺所有

欽差大臣關防先經琦善派令江甯藩司文煜護理

其身後一切事宜臣等妥爲照料並懇

迅賜簡放重臣俾資統率再臣以誠本擬將經手事件
交代清楚卽日赴皖因文煜一時未能接辦是
以暫緩起程奏入

上命軍機大臣傳諭陳金綬雷以誠德興阿曰琦善因
病出缺已授托明阿爲欽差大臣馳驛前往督辦現
在瓜州賊匪尙在負嵎該逆知琦善病故勢必乘隙

窺伺水陸防勦萬分緊要托明阿抵揚尙需時日所
有欽差大臣關防著交陳金綬暫行接辦雷以誠尙
未起程赴皖並著留於軍營會同陳金綬將防勦事
宜妥爲經理前據邵燦奏由陸路赴皖與袁甲三會
審案件著陳金綬等卽傳旨飭令該漕督行抵安徽
後暫留該省辦理勸捐防堵事宜雷以誠駐紮萬福
橋距大營較遠自應與陳金綬同在一處和衷商摧

更爲妥協其裏下河練勇及經手事件卽飭文煜趕
緊接辦現在副都統德興阿帶滿漢官兵駐紮運河
西岸托明阿未到以前卽責成陳金綬雷以誠及該
副都統督飭水陸將弁相機進剿迅圖克復瓜州毋
得專待托明阿致延時日其浦口等處仍嚴飭武慶
等實力防剿毋稍疏懈

上又命軍機大臣傳諭僧格林沁托明阿曰陳金綬等

奏琦善因病出缺已降旨授托明阿爲欽差大臣馳
驛前往揚州督辦軍務現在瓜州賊匪負嵎死守此
時軍無統帥逆賊得信必更肆其猖獗托明阿接奉
此旨後卽著星夜馳驛迅往揚州接辦到揚以後水
陸各營均歸節制兵力已多此次就道毋庸多帶官
兵行走致有稽遲托明阿經朕簡畀重任卽當勉奏
膚公悉心籌畫與陳金綬雷以誠等迅殄妖氛以慰

廬念至江防最爲扼要金陵鎮江皆與瓜州一水相通抵揚後尤當與向榮等隨時咨商聯絡聲氣不可稍存意見其連鎮之賊已被套隄圍因此時托明阿雖赴揚州並未多帶官兵前往連鎮窮蹙之寇以巨萬兵勇足敷勦辦僧格林沁務卽督率將弁剋期殄滅埽穴揜渠斷不准任其潛逃爲患

上又命軍機大臣傳諭向榮怡良吉爾杭阿曰昨據向

榮奏賊船由蕪湖江口竄擾東壩情形甚爲喫緊東壩爲蘇杭門戶亟須嚴爲堵扼副將傅振邦等所帶兵勇二千雖兩次獲勝而探聞逆黨甚多必得飛催福興等合力進剿以期醜類肅清不致深入所稱趕調上海兵勇二三千名守護蘇州上海正當剿賊喫緊之際兵勇能分調若干著吉爾杭阿統籌全局酌量辦理怡良現駐蘇州距東壩較遠著卽於常州無

錫一帶擇要駐紮遏賊來路既可固蘇省之藩籬並
可爲福興等後路援應賊匪覬覦蘇常爲糧米所出
恐由徽甯竄擾急宜防護著怡良吉爾杭阿妥籌辦
理琦善現在病故已有旨授托明阿爲欽差大臣馳
往揚州督辦軍務未到以前著陳金綬暫行代辦所
有水陸軍營各事宜仍著向榮隨時咨商妥辦毋得
稍分畛域

上諭內閣曰欽差大臣琦善嘉慶年間由部曹外任司
道洵厯封疆蒙

皇考宣宗成皇帝畀以兼圻重任晉贊綸扉疊經獲咎
旋卽起用朕御極後因其在陝甘總督任內辦理番
務未能允洽加以嚴譴旋因粵匪肆擾特賞給三品
銜署理河南巡撫並授爲欽差大臣賞給都統銜督
兵赴江北一帶進剿該大臣自抵揚州軍營後屢獲

勝仗賞戴花翎復因揚州竄出賊匪未能嚴防截剿
革去都統銜近日進攻瓜州賊巢復命統領水師疊
次獲勝一切調度均合機宜方冀其克復瓜州肅清
江面遽聞溘逝悼惜殊深琦善著追贈太子太保協
辦大學士並賞總督銜卽照總督軍營病故例賜卹
准其入城治喪任內一切處分悉予開復應得卹典
該衙門察例具奏伊子員外郎恭釗筆帖式恭鈞恭

鏗百日孝滿後均著該旗帶領引見並查明琦善尙
有幾子先行具奏

上又諭內閣曰前任江甯將軍托明阿著授爲欽差大
臣馳驛前往揚州督辦軍務

十一日 戊寅 軍機大臣戶部會奏言遵議陝西巡

撫王慶雲奏請飭各路糧臺運儲糧石一摺 臣
等檢查嘉慶初年陝西用兵籌運糧米成案悉

集賢堂卷之二
心覈議查自軍興以來疊奉

諭旨飭令琦善向榮勝保等各軍營運儲米石以充軍

食如湖北湖南江西江安等省咸豐三年應運
二年分漕糧均准截留本省並接濟鄰省作爲
軍糈大兵所至准其就近支取本年山東折漕
留爲勝保軍需並聲明出入之間不免折耗卽
將米石撥營備用此外如各屬倉社米穀均准

軍營關支又如僧格林沁等軍營紳民捐助糧
草均與捐輸銀錢一律請獎各路糧臺如果實
力遵照辦理日支八合三勺所需糧石支放自
可裕如月支銀九錢所撥銀兩何至動虞缺乏
此銀糧兼支尤爲現時要務之實在情形也該
撫所請酌復舊例行令各路糧臺運儲糧石以
備兼支之處自係爲覈實樽節起見 臣等公同

商酌現在糧臺未見充裕與其空文支領給發不能應時何如按日支糧兵丁得沾實惠應請

飭下各路帶兵大臣及各該督撫嚴飭糧臺承辦各員

查照日支口糧米八合三勺月支鹽菜銀九錢

舊例設法先期運儲糧石並查覈該撫原奏妥爲籌辦至原奏所未備及各就各省簡便之處臣等查軍需則例內載兵丁加給鹽菜銀四錢

無論本省別省統於出邊口之日加給凱旋進
邊口之日停止等語現在賊氛滋擾正當攻勦
喫緊之際征兵一項擬請仍於鹽菜項下按月
加給銀四錢以示體恤凱旋進邊口之日卽行
停止其各路防兵卽照舊例覈支毋庸加給銀
四錢以示區別又各省情形不同均宜熟籌簡
便之法查湖北湖南江西江安等省咸豐二三

年分及山東三年分漕糧均未起運卽或糴變亦應仍有餘存除江西三年分漕糧已報折價銀四十餘萬兩外其餘徵存未運漕糧均准各該糧臺就地動用並准碾動各州縣倉穀以資接濟其無漕各省均令於所屬倉穀項下酌量關支仍將動用漕倉糧石數目分晰報部查覈總之行軍首重芻糧計兵一萬每月祇需儲糧

二千五百石各省比歲有秋措辦尙易爲力其
或應動項採買或可勸諭捐輸或令鄰省轉運
接濟各處情形不同臣等亦礙難懸斷應由帶
兵大臣及各該督撫體察情形通融妥辦如此
則兵食無虞缺乏經費不致多糜於現在軍情
實屬大有裨益奏入

上從之

十二日己卯勝保德勒克色楞善祿崇恩奏言臣

等於上月二十七日督兵進攻高唐州城獲勝
旋因大雨距城濠數十步之遙水深二三尺不
等當卽設法引水由城北大道開竅向北宣洩
連日以來已形淺涸本月初四日夜賊由東北
潛出約數百人至我兵所竅長濠之處用土平
墊乘夜衝撲而出隨抽派天津正定官兵分東

西兩路前往橫截該逆甫經過濠我兵施放槍礮賊卽紛紛退匿濠外我兵伏行而前奮勇刺殺賊衆披靡敗回我兵追近東關城濠賊於城頭密放槍礮因黑夜未便再進現在崇恩已由武定回營臣及德勒克色楞善祿等悉心籌度約於一二日內天氣晴霽設法進攻惟賊既有突竄之意尤當格外嚴防現令馬隊官兵分投

探悉路徑以便隨時追截並飭農民將秋禾及早刈割以免賊匪隱藏魏家灣濱臨運河停泊運船甚多已飛飭糧道將該處糧船移撤下游萬一賊竄不致奪船渡河現復剋日興工趕鑄大礮惟有竭盡心力迅速圖功

勝保又奏言查本地民人李啟昌因被賊擾害情願入城作爲內應以助官軍殺賊臣查其意

甚誠當卽密授機宜許以功成之日破格獎賞
奏入

上命軍機大臣傳諭勝保德勒克色楞善祿崇恩曰據
稱宣洩積水鑄造大礮均不免過於迂緩其遣人內
應一節尤屬毫無把握此時總以四面齊攻立破州
城將該逆就地殲滅方爲上策若任其突竄再圖追
襲雖勦辦較易仍恐別有蔓延據奏飭令附近州縣

刈割秋禾並將魏家灣船隻移撤下游均爲豫防賊
竄起見該大臣所籌多派馬兵分投探路現在該逆
尙未竄出焉能必其經由何路徒分馬隊之力亦非
良策崇恩現已回營德勒克色楞善祿等均已四面
嚴扼卽著勝保督飭各路兵勇迅速環攻務將該逆
就地剿滅如有竄出零匪卽著崇恩嚴飭各該州縣
汛兵練勇節節扼截以便馬隊跟蹤緊勦儻不豫爲

布置致該逆再有踞城抗拒之事朕惟該大臣等是問

十三日庚辰僧格林沁西凌阿托明阿奏言初七

日夜聞該逆大股梟水乘船潛向珠勒亨綳闊分防之處奔來綳闊等俟槍箭可及揮令官兵開放槍箭逆匪紛紛傷斃餘匪仍向上撲我兵槍礮連環復用藥包向下擊放該匪火藥船隻

被燃燒斃逆匪甚多各營開放大礮從旁轟擊
逆匪始行敗回 臣等現嚴飭各營加意嚴防相
機迅圖殄洗奏入報

同日向榮奏言據副將傅振邦稟報七月二十
五日東壩之戰逆首羅大綱卽羅亞旺率衆竄
走高瀆東壩上下已無餘匪福興帶兵於二十

八日馳抵高渚之毛公鋪探得逆匪趕築土城
礮臺賊船均停泊附近意圖占踞我兵由東北
隅蘆蕩襲擊該逆驚駭卽棄土城奔避上船我
軍趕殺斃賊百數十名燒燬賊船八九十隻餘
船由丹陽湖向花津逸去該逆知我大營兵分
力薄於三十日率黨四五千入分股由南路至
七橋壩窺撲川兵捷勇營盤相隔小河槍礮互

擊我軍潛從上流鳧水而過繞出賊後直前衝
殺俘斬長髮二百餘人奪獲擡礮鳥槍一百餘
桿刀矛旗幟多件閏七月初一日該逆突由洪
武門出衆數千至河定橋上方橋一帶縱火來
抄七橋壘營江甯將軍蘇布通阿督同參將張
國樑等堅壁不動伺賊氣懈分投縱擊該逆抵
拒不退適參將蔡應龍守備馮子材帶領兵勇

分左右抄出刺中騎馬賊目一人賊衆驚駭始
大奔潰追斬數百級賊復於初二日由洪武門
通濟門雨花臺分出三股先撲七橋甕又於朝
陽太平兩門出賊二股從龍脖子左右撲下窺
我湖南營盤當經楚兵分隊出禦該逆見我人
少兩面抄來都司銜陶茂森首先衝入賊隊賊
皆披靡時南韶兵亦趕到夾攻大加勦擊擒斬

百有餘人該逆竄回龍脖子山梁伏匿不退意
圖牽掣維時七橋壘各營該逆分股圍撲不下
萬人蘇布通阿親扼橋口督戰張國樑率精銳
數十人冒賊裝束突入賊中手刃逆匪數十人
該逆莫辨真僞自相擊殺賊衆大亂時有另股
賊匪縱火延燒高橋門一帶經蔡應龍領兵馳
往要擊砍殺不少追奔數里復會合七橋壘各

兵勇大加殲擒逆衆落水淹溺無算餘俱逃竄
通濟門雨花臺而去是日之戰自卯至申我兵
勇無不以一當百殺賊最多三日之中約計斃
賊不下三千餘人割獲首級五百七十六顆髮
辮耳記二百五件生擒三百五十六人內有僞
丞相譚應桂訊明正法奪獲槍礮刀子旗械不
計其數查點我軍兵勇稍有傷亡其水師各船

葉常春督駕拖罾四隻與吳全美紅單各船會
合駛至下關江面見賊礮臺礮隄層層遮護我
船逼近轟擊先後毀去礮臺七座大小賊船一
百餘隻復燒燬七里洲水營二座賊黨焚溺甚
多並擊斃礮隄執旗賊目五人餘船悉數逃入
夾江我船勦洗而上直抵三山營江面分扼駐
泊初二日上游來船三百餘隻中有黃衣賊渠

指揮迎敵吳全美先令五船沿北岸而上盡將賊船讓過橫截其後前面各師船見賊船已近始將大礮齊發查紅單水師各船礮位環布運掉如飛各水手又能躍入波濤跳上賊船該逆驚駭進退無路遂紛紛投江自溺無一得脫者奪獲大小船二百六十餘隻生擒賊匪二百餘人凡江上所遇賊船一掃而空訊據賊供逆首

秦曰綱中礮落水其餘陳繼書余幅泉等僞官
多人亦皆擊斃惟尙有賊船一百餘號避匿口
內不敢出江現檄福興挑選兵勇另乘小船入
湖務期勦滅淨盡臣查我軍以少擊衆三戰三
捷又經師船痛勦使上游賊援一斷卽陸路亦
易得手所有此次水陸出力員弁懇請

恩准擇尤保奏再查鎮江賊匪被勦情急經余萬清設

法解散逃出頗多四面布置情形亦俱周妥並據報七月二十七日及本月初二日出隊攻城均有斬獲奏入

上命軍機大臣傳諭向榮曰覽奏稍慰朕懷此次陸路殺賊不下三千餘人水師亦將賊船沈毀殆盡並擊斃逆首秦曰綱一名該逆狡獪已久經此大創洵足以寒賊膽而振軍威粵東紅單船本係得力舟師一

經調度合宜卽可指揮如意所稱上游賊援一斷卽
陸路亦易得手此是一定之理向榮正可乘此聲威
督飭吳全美等統帶師船迎賊所向往來勦洗一面
親督陸路兵勇合力圍攻迅圖克復堅城殲擒首惡
爲次第肅清江面之計所有避匿高瀆湖口賊船尙
有一百餘號仍著嚴飭福興挑水師兵勇竭力搜捕
悉數掃除仍須督飭該處派防將弁嚴扼逆衆乘虛

回竄之路至余萬清勦辦鎮江賊匪日久無功前經
降旨飭查原恐其不能得力究竟該革員於防勦事
宜能否獨當一面著向榮隨時察看據實具奏毋得
稍涉瞻徇

上諭內閣曰此次水陸各軍以少擊多三戰三捷均能
奮勇勦辦東壩竄匪亦尙迅速著向榮擇其尤爲出
力各員弁酌量保奏

同日楊需奏言賊匪於三月竄陷京山縣城安
襄鄖荆道羅遵殿飭巡檢諸鑣把總楊飛熊等
管帶襄勇會同知縣杜嘉善督率紳團疊次進
攻於五月二十六日將京山縣城收復又據孝
感縣知縣李殿華稟稱自三月至六月疊獲勝
仗七月初九日督率紳團潛赴河干乘風縱火
焚燒賊船數十隻城中伏勇亦放火十數處賊

匪驚潰開城逃竄與船中登岸之賊互相踐踏
練勇乘亂縱擊擒斬甚多旋即收復縣城又據
總兵雙保呈報馳赴天門縣督率署參將常德
等在漁薪河江家河等處與賊接仗四次燒燬
賊船八十餘隻生擒長髮賊首及土匪逆首孔
招汝等二百四十餘名溺水燒斃者無算七月
二十二日攻克城池又據知縣李殿華會同遊

擊孫學瀛等各帶兵勇與知縣章熙成之勇於
七月二十三日克復黃陂縣城池賊匪竄至河
東魯臺及六指店地方疊經兵勇擒斬二百餘
名又署黃州府知府許賡藻等督率團勇勦捕
麻城縣屬林河店等處賊匪擒斬無數焚燬賊
巢數十處進徧縣城該匪於夜半竄出南門復
被擒斬一百餘名次日收復縣城又沔陽州知

州蕭蔭恩督帶紳勇於六月二十五日克復州城其天門餘匪竄入應城縣屬之湖中與漢川賊匪勾結七月二十五日賊船數百隻駛至劉家隔經署提督佈克慎派守備鐵振國帶兵迎勦因衆寡不敵敗回賊匪進撲長江埠佈克慎督兵堵勦殺賊數十名弁兵亦有傷亡臣飛檄守備王榮帶兵馳往策應於二十七日會同進

剿擒獲長髮賊黃大得等六名殺斃溺斃不少
餘賊竄回漢川此次賊匪竄犯雖經擊退因守
備鐵振國迎擊敗回以致賊匪乘勢攻撲傷亡
兵弁應請將陝西督標千總瓜州營守備鐵振
國革職以示懲儆

楊需又奏言查黃州爲江防要地與武昌縣相
對爲省城下游第一重門戶黃州一失門戶洞

開省城不能一日安堵故收復省城卽須鎖鑰
武黃方可埽除沿江賊藪以通九江爲第二重
門戶因將規復黃州一事責成許賡藻等激勵
紳民相機辦理擬俟黃州復後卽分兵扼守武
黃旁收諸邑上援武漢下通九江至江北賊匪
現惟漢川一隅尙有竊踞已檄雙保等進兵若
克復漢川則江北大局羸定其時湖南兵勇復

乘勝南下則武漢已處核心不難立時拔取然後水陸並下會江西兵勇以扼九江庶可肅清楚北應請

飭下江西撫臣派兵一出九江以樹江路之聲援一防義甯以遏陸路之竄越實於大局有益

楊需又奏言臣前籌三路進兵之策嗣據官文咨稱派總兵雙保由沔陽仙桃鎮一帶直達漢

陽福斫爲後起接應知縣吳振鏞等由朱河赴
沔陽協勦漢陽守備鍾埈帶練克復沔陽疏通
道路直達漢陽此卽臣所籌三路之西路與臣
意見相合其時官文又改派福斫張于銘赴安
陸協勦臣因安陸業已收復卽催福斫等由鍾
祥徑赴漢川與雙保會合以攻漢陽尙慮水路
無兵可派適奉

諭旨將魁玉楊昌泗所帶之兵歸臣調遣因卽飛飭前

赴襄陽簡精銳三千乘船順流而下爲兩路聲
援其餘兵勇派員帶令來營爲留守德安及分
布長江埠一帶以斷各水口北竄之路茲復接
官文來咨將吳振鏞黃鵬程魁玉楊昌泗鍾墀
等兵勇或派防監利或留駐荆沙一概不令前
來則西路之師僅雙保福忻二千人水路又成

畫餅惟餘孝感黃陂一路通計臣及桂明佈克
慎所帶之兵除馬隊一千僅能留駐楊店不能
前進外共止四千餘人未免太形單薄應請

飭下官文遵將魁玉楊昌泗所帶兵勇飭令照臣調派

辦理雙保福忻張于銘吳振鏞鍾埽之軍皆飭
令遵照原議切勿再行更調致失事機或荊州
需大員調遣則將魁玉酌留荊州飭楊昌泗前

來若慮兵單或將荆郡所收潰兵一千六百名
留荆協守再 臣風聞留滇升用副將王國才勇
略兼優現留荆州仰懇

天恩准將王國才調赴行營實於克復事宜大有裨益

奏八

上命軍機大臣傳諭楊需曰現在京山等州縣均已收
復惟漢川尙爲賊踞江北大局已可羸有頭緒亟應

乘勢進攻楊需中路舟師由襄陽直達漢水原爲東
西兩路聲援嗣因官文奏螺山緊要恐魁玉等折赴
襄陽轉形迂緩是以准其所請令魁玉等沿北岸夾
擊而下竟出大江卽可攻漢陽之正面今據楊需奏
此項官兵全留荊州則中路無兵可派而吳振鏞鍾
埭等所帶兵勇復經官文改派則西路之師亦形單
薄所籌均係實在情形著楊需卽飛咨官文速飭楊

昌泗將原帶兵勇全數帶赴襄陽毋得再有推諉其
魁玉一員卽著管帶荊州所收餘兵一千六百名留
荊州交官文調遣張于銘由鍾祥赴漢川之勇吳振
鏞等由朱河赴沔陽之兵鍾瑋由沔陽赴漢陽之練
丁均著悉照原議分路進剿不可再有更調當此軍
務喫緊之時若號令不能畫一將弁無所適從必致
貽誤大局此後楊需應如何調遣之處卽著一面奏

聞一面迅速布置不得因意見稍歧徒延時日

上又命軍機大臣傳諭官文曰官文前奏螺山緊要派令魁玉等前往協剿茲據楊需奏此項兵勇留荆則中路無兵可派而吳振鏞等所帶兵勇復經官文改派則西路亦形單薄著官文迅飭楊昌泗將原帶兵勇全赴襄陽勿稍延緩魁玉卽著管帶所收武昌兵勇一千六百名留在荊州應往何處防堵並著官文

委爲調遣其張于銘吳振鏞鍾埈分帶之練勇均令
悉照原議不可再有更動參將王國才著官文卽飭
該員馳赴楊需行營以資差委總之此時攻勦緊急
軍營號令須歸畫一若因彼此意見不同紛紛更調
必致將弁無所適從所有進勦機宜均著統歸楊需
妥籌布置該將軍如有必須參酌之處卽與楊需熟
商籌辦不得稍分畛域

上又命軍機大臣傳諭陳啟邁曰前因逆匪竄踞九江郡城已有旨令陳啟邁嚴飭羅玉斌等統帶兵勇相機進剿茲據楊需奏稱武昌下通九江爲省城第二重門戶必須水陸並下會同江西兵勇以扼九江則楚北庶可肅清著陳啟邁速派兵勇一出九江以通江路之聲援一防義甯以遏路陸之竄越固江西之藩籬卽可保長江之門戶該撫不得以兵單爲詞置

全局於不顧

上諭內閣曰湖北被擾各州縣先經官文等奏報將沔陽州克復據楊需奏報克復京山等縣荆襄附近地方漸可肅清其竄逸餘匪仍著楊需嚴飭各該地方官迅速搜捕毋留餘孽甘肅瓜州營守備鐵振國迎勦不力著卽革職以示懲儆

同日駱秉章塔齊布曾國藩奏言七月二十一

日臣塔齊布親督陸營進勦行近城陵磯遙見該逆築有土城都司諸殿元拋擲火罐延燒賊壘帳棚逆賊敗竄正在跟追詎湖汊伏匪齊出諸殿元兵力太單力戰陣亡劉士宜同時被害臣塔齊布揮軍往救斃賊多名轉敗爲勝二十六日該逆悉銳來撲羅澤南等大呼衝突直趨高嶺陣斬僞國宗石姓賊始大潰其分撲鳳凰

山大營者數以萬計臣等齊新觀督將弁槍礮
齊施斃賊一二百名賊分路抄襲我軍亦分路
迎敵無不以一當百約斃賊六百餘名適羅澤
南等遁至會合併攻又斃賊數十名賊被追過
河溺斃不計其數二十八日臣塔齊布直擣高
橋賊壘連斃數賊正衝突間大股續至適羅澤
南湘勇繞抄賊尾該逆後路受敵立即大潰周

鳳山等併力齊攻賊始敗退歸巢計共斃賊二百餘名生擒十餘名奪獲軍械旗幟馬羸無算二十九日賊分數股來撲我軍先燒附近民房臣塔齊布揮兵迎擊將中路之匪擊退其左右兩股亦經周鳳山羅澤南等殲斃無數其別隊千餘人亦經李續賓等橫截分抄槍斃賊目二名墜嶺死者不可勝計共殺賊五百餘名臣國

藩以賊勢全注陸路其水路必虛密飭各水軍
乘隙進勦楊載福等於是日率船進攻道員李
孟羣亦派戰船策應行近城陵磯見逆船十餘
往來馳突我軍見船卽擊一擁而前燒燬數隻
賊皆墜水東岸追至擂鼓臺西岸追至荆河腦
忽伏匪兩岸擁出希圖抄尾我軍愈奮轟擊無
遺把總秦國祿等深入賊巢賊遂大潰有此數

次大戰岳州可保無虞奏入

上命軍機大臣傳諭駱秉章塔齊布曾國藩曰逆賊竄擾岳州疊經我兵擊退茲復經水陸官軍奮勇齊進四次獲勝洵足以寒賊膽正可乘此聲威直擣武漢著塔齊布曾國藩將城陵磯餘匪迅速勦除淨盡卽日整師東下毋再延誤本日據楊需奏京山孝感等州縣先後收復現已派令佈克慎台湧帶兵由雙廟

進剿並令雙保福忻等由天門進取漢川魁玉楊昌
泗等由襄陽水路進趨漢口該署督亦即日統師前
進此時南北兩路辦理均屬得手並經官文等奏報
已添撥兵勇派同知銜李光榮等統帶由調弦口協
剿當此官兵雲集應如何聯絡聲勢分投進逼之處
並著塔齊布等與楊霈官文函商妥辦無失事機至
前諭塔齊布陸路官軍能否由通城崇陽一帶直攻

武昌之背並著悉心籌畫隨時奏報塔齊布曾國藩
自帶兵以來既未嘗遇敗而怯定不致乘勝而驕總
宜於妥速之中持以慎重則楚省賊蹤漸可掃蕩岳
郡地屬緊要前諭駱秉章飭令胡林翼督帶練勇前
往嚴防該撫定已遵辦仍著將該臬司於何日抵岳
如何設防之處迅速馳奏

上諭內閣曰上竄湖南賊匪自前次擊敗後尙蟻聚城

陵磯此次岳州連日大獲全勝兵威愈振所有出力
之知府羅澤南著以知府儘先選用並賞戴花翎守
備楊名聲著以都司升用千總唐得升著以守備儘
先補用兵丁李榮華著以把總儘先拔補並賞戴藍
翎其水陸兩營員弁兵勇著擇其尤爲出力者酌量
保奏都司諸殿元戰功疊著奮勇捐軀著交部從優
議卹千總劉士宜著交部照例議卹

皇朝通志卷一百一十二
三十一
將所獲船隻分給配駕各守本地不費口糧一
遇有警卽助水師夾擊於攻勦似有裨益奏入

上命軍機大臣傳諭陳金綬雷以誠曰逆賊跨江踞守
原應無分南北會合上下游水陸各軍協力進攻庶
勦辦可期得手現在瓜州一鎮負嵎如故鎮江賊船
勢必不能斷絕來往前經琦善修造多槩礮船卽日
竣工正可乘機扼勦以圖攻克著陳金綬雷以誠迅

同日詹事府少詹事翁同書奏言金陵與浦口
六合祇隔一江臣以南北兩岸共辦一事必應
會商夾擊已函致武慶等毋分畛域合謀殲賊
查浦口水勇係本地團集不給口糧琦善常令
乘駕划船專守本地臣以爲沿江州縣皆可團
練水勇現在吳全美葉常春屢獲勝仗奪船頗
多若上游南岸州縣悉照浦口之例召募水勇

集賢堂卷之二
三二

密籌防勿稍疏失武慶防守浦口尙屬得力近復截
剿賊船屢獲勝仗著卽由陳金綬傳知該總兵仍前
防剿旣須遏賊北竄之衝仍當督飭江浦六合民勇
並與向榮互爲聲援合力廓清江面翁同書所稱浦
口水勇由本地團集不費口糧南岸各州縣亦可倣
照辦理著陳金綬等咨商向榮飭令該地方官相機
籌辦以期聲勢聯絡於攻剿更有裨益

卽督飭陳國泰統領紅單師船順流下駛並飭駐守
焦山之周士法等所統各船同時溯流合擊不得因
托明阿尙未到營致令該水師將弁頓形鬆懈儻有
不遵調度者卽著陳金綬等嚴叅治罪其陸路官軍
並著妥爲調遣一面知會余萬清併力堵剿鎮江賊
匪使該逆於南北兩岸不暇應接自不難一鼓殲除
其回竄揚州及旁擾通泰各路並著與德興阿等嚴

撲各兵勇待其撲近齊開槍礮賊衆驚退四更
後復行出撲行近濠牆我兵槍礮齊施刀矛攢
刺賊退而復上者再當斃賊數十名賊始奔敗
回城次日加修濠牆趕築礮臺將二千斤鐵礮
移至新營偏近開放轟斃城上賊匪多名現聞
城中一夜數驚若再能於西南兩面偏城紮營
必可制賊死命惜步隊尙單不敷抽撥新鑄大

十八日酉乙勝保德勒克色楞善祿崇恩奏言臣

因兵勇攻城屢有傷亡思在城廂切近紮營建
築礮臺以便進攻十二日卯刻出隊明示攻城
暗加修築城上賊衆見我兵在東北角偏近安
營於城頭開放槍礮我兵勇於槍礮如雨之中
冒死趕築西刻濠牆羸就臣因其距城僅有二
三十丈諭各兵勇加意嚴守亥刻賊果率衆來

兵勇爲數不少所有西南兩面並著趕緊逼近環攻
若再曠日持久勞師糜餉之罪豈能屢邀寬宥耶

十九日

丙戌

陳啟邁奏言據報九江逆艇由湖口

乘風上駛鄱湖將軍廟渚溪口等處經臣飛飭

知府元善等分投堵禦又催羅玉斌急攻潯郡
賊壘以分其勢該署鎮派已革守備吳錫光同
署德化縣知縣戴榮桂於七月十六日出隊進

礮尙須數日現將二千斤洋鐵礮一尊運上新
築礮臺設法進攻奏入

上命軍機大臣傳諭勝保曰逆匪占踞高唐幾及四月
早應移營逼近賊巢用礮攻擊該大臣業經迂緩於
前以致日久尙無把握此時仍當揀選精銳一鼓登
城不得專恃礮轟別無善策儻該逆窮極思竄卽可
乘勢殲除斷不准再令蔓延擾害他處該大臣所帶

我軍腹背受敵傷亡不少 臣查匪船一千餘號
駛入鄱湖分擾吳城建昌地方離省均止百餘
里當飛飭革員趙如勝酌帶戰船水勇駛往下
游相機勦辦並飭吳錫光等督勇由山下渡陸
路追擊惟江省兵勇無多不敷調遣必須迅調
大兵剋期殄滅查上年省城被圍經湖南官紳
朱孫詒羅澤南等帶勇來江助勦均屬得力懇

攻郡城直抵城下斬獲頗多十七日黎明賊船七八百號遙擁上竄將抵吳城鎮前河水陸各勇擊沈賊船十餘隻奈東北風大作逆艇繞由後湖攏岸勢不可遏我兵退守上游十九日有賊船三四百號由渚溪駛入建昌縣界之山下渡適由潯撤回官紳等勇馳至協同該處防兵擊沈賊船數隻詎賊衆自下游上岸由後抄襲

由興國州蠡擁而來當經富克金泰等督帶各
勇臨河迎勦無如匪勢狻獗兵勇無多該遊擊
督戰兩時力竭陣亡各勇亦多死傷武甯城池
甫經收復城內弁兵不過千餘以十餘倍豺狼
之衆攻此殘破小邑誠恐難支現飛飭駐防義
甯州之署鹽道王訓督帶兵勇馳往相機援勦
奏八

請

飭下湖南撫臣選派精銳兵勇三四千名仍令知州朱
孫詒教諭羅澤南等管帶迅速來江協勦庶幾
兵力稍厚可期掃蕩妖氛

陳啟邁又奏言武甯克復後臣當將遊擊富克
金泰等所帶各勇一千五百名仍留該縣以備
不虞茲據探報七月十九日湖北逆匪二萬人

堵截未可專待外援任其猖獗臬司惲光宸前曾帶
兵出省並未馳赴武甯現在賊氛逼近若仍株守省
垣專恃趙如勝等帶兵勦辦勢必貽誤事機著陳啟
邁卽於司道中遴派得力之員統兵前往扼要駐紮
爲迎頭截擊之計其由興國州竄撲武甯之賊衆至
二萬該縣甫經收復城內弁兵不過千餘不敷堵勦
並著該撫嚴飭署鹽道王訓迅速帶兵馳往勦辦毋

上命軍機大臣傳諭陳啟邁曰逆船竄擾吳城建昌距
省均止百餘里該撫現飭革員趙如勝酌帶戰船水
勇駛往下游並飭吳錫光等由山下渡陸路追擊是
否足資截勦本日已諭令駱秉章酌調官兵並派員
管帶馳往協勦惟鄰省調撥尙需時日誠恐緩不濟
急而羅玉斌攻勦九江以分賊勢亦斷難撤回此時
省城情形萬分喫緊必須司道大員帶兵出省相機

精兵三四千名馳赴江西以資接應現在朱孫詒羅
澤南皆帶兵勇隨同剿賊甚爲得力該二員能否派
往著該撫酌量緩急妥籌辦理如實在不能分撥卽
著另揀得力員弁管帶所挑官兵迅速馳往江西協
剿毋稍遲緩

陳啟邁又奏言九江地方常有賊船往來經督
糧道鄧仁堃飭德化縣民壯孫亮等設法焚燬

稍延誤江西與鄂楚毗連處所甚多若楊需等進兵
攻勦前後夾擊更恐逆匪乘隙竄擾江西是內患未
靖又須堵禦外來賊黨防勦稍疏勢必滋蔓難圖著
該撫嚴飭帶兵文武員弁防勦兼籌不得稍涉大意
陣亡之遊擊富克金泰著查明請卹

上又命軍機大臣傳諭駱秉章曰江西賊勢猖獗省垣
兵力單薄急需鄰省分兵援救著駱秉章迅卽選派

續通志卷一百二
三
次日巳刻始熄約計焚燬大小賊船四百餘隻
斃匪不計其數內有奔逃上岸者悉被吳錫光
伏勇截殺無遺臣查孫亮等不避艱險深入賊
中自應破格請獎署九江府知府顏貽曾等辦
理尙屬妥密可否量予

恩施奏八

上諭內閣曰長江賊艘肆行無忌此次設法焚燬辦理

派勇長陳飛鵬夏飛涓馳往幫辦並密札署知
府顏貽曾等督飭辦理七月十二日有賊船千
餘隻續從湖北駛下停泊龍開河內有火藥大
船四隻又有船載羸馬數百匹聚泊一處是夜
孫亮等將漁船裝載柴薪暗藏火藥混入賊船
四更時候西南風大作卽縱火焚燒鳧水上岸
瞥見該賊火藥船轟發延燒各船風狂火烈至

尙爲得手民壯孫亮著以把總儘先拔補文童周文
郁著以從九品未入流卽選練勇陳飛鵬夏飛渭均
著以外委拔補並賞給六品頂戴以示鼓勵至署九
江府知府顏貽曾署德化縣知縣戴榮桂均係帶罪
自效之員著該撫查明原案罪名再行請獎

沈其時大隊賊船分股抄近我船折戩迎敵往
來一時之久我船漸出賊船之後乃從上風齊
發火箭大礮連環轟擊賊船相繼火起立時擊
碎七八十隻轟斃焚溺無算餘船各向江邊逃
逸復經水勇追赴南北兩岸殺賊一百餘人生
擒六十餘人奪獲賊船五十二隻下關賊船約
有五六百隻礮火極多另有一百五十餘船派

欽定剿平粵匪方略卷一百三 甲寅年

閏七月二十日 丁亥 向榮奏言師船自初二日獲

勝後扼紮三山營江面初四日東北風作下游
大船三四十隻順風直上其後隨有賊船一百
六十餘號連檣齊進吳全美等各督紅單拖罾
分作兩隊散布江面左右讓出中流逆船風猛
舟輕直前衝上被我船用礮兩旁轟擊紛紛碎

人至金陵陸路之逆忽將城北之神策金川兩門撬開復於西南隅之善橋一帶紮營四出擄掠而大營兵勇分撥愈單未遑遠襲查有福興一軍已由高淳至小丹陽茲復調回大營並飛催鎮江派防東壩之兵勇一千一百名前來協勦太平小丹陽鎮一路先派傅振邦統帶兵勇九百名進勦現又派參將張國樑管帶捷勇四

來接應旋見賊船大幫從下游揚帆擁上直撲
我船葉常春帶領拖罾四船當先迎擊立時擊
沈二十餘隻復會合吳全美紅單各船截駛下
游兜勦轉過上風將逆船圍偪江心衝盪勦洗
逆黨紛紛撲水我船又四面縱放火箭火彈燒
燬擊沈不下百船斃賊不計其數又據江浦縣
稟報所有逃逸北岸之賊經該處勇練截殺多

究不免有衆寡之殊所有廣東續調碣石之拖
風紅單船四十隻久無到江消息焦灼萬分因
思上游肅清下游賊援自絕此時我軍下游戰
船尙有八九十隻經臣函致翁同書商撥陳國
泰之紅單船十隻或十五隻添赴上游協助並
嚴飭江北各營與水師各鎮一體嚴密防勦不
可稍涉疏虞

百名湖南精兵二百名由秣陵關一帶接應後
路兼防善橋之賊連日探聞太平賊船多有關
入丹陽湖內者 臣慮其折竄高瀆札飭鄧紹良
督率所帶官兵會同上海派來東壩之兵勇七
百餘名嚴密防堵惟上游賊船沿江林立因屢
被痛勦已趕調皖楚賊黨勢必大幫駛回吳全
美及葉常春各船共止三十一隻雖疊獲大勝

集賢堂卷一百三
四

該督並囑仍選漳州鎮標及所屬之雲霄詔安同安各營兵二千名卽或有事防堵未能如數派撥亦應先調一千名來江卽以福甯等營之兵留防一轉移間兩有裨益其粵東前報啟行之潮州鎮壽山所帶官兵二千名久無到江消息當此水師得利之時正可與陸兵會攻迅圖克復請

向榮又奏言接聞浙總督咨稱前調漳州鎮屬官兵現在防堵粵界另調福甯建甯兩鎮及邵武延平各營兵共一千名派員統領啟行查該省派撥之福甯等營官兵訪之軍中僉稱不及漳州遠甚當茲攻剿喫緊若調此無益之兵不特餉項虛糜更恐事機貽誤應卽飛行咨撤如業已啟行卽由經過省分截令折回當已咨覆

一路僅有傅振邦及張國樑所帶兵勇一千五百餘名誠恐不敷堵剿怡良前奏親督兵勇赴無錫常州一帶仍著速行前進不得因高瀆賊已敗退又復中止此時江面水師正當得手之際若陸路官兵能繞出太平一帶抄賊後路夾攻更易爲力至向榮所稱上游紅單拖罾等船單薄亦係實在情形逆賊旣經屢敗其糾合皖楚逆黨大幫回駛固在意計之中且

湖南賊船經我兵勇大加焚燬已追至嘉魚境內儻
武漢一經收復該逆潰竄下駛上游師船實當其衝
下游戰船既有八九十隻分調十餘隻不至遽行短
少著向榮卽知會陳金綬等如北岸無須多船卽飭
陳國泰將所帶紅單船分撥十隻或十五隻迅赴上
游協同攻勦不得稍存畛域藉詞稽留

上又命軍機大臣傳諭王懿德葉名琛柏貴曰金陵大

營分勦各路賊匪水陸口岸紛歧官軍不敷攻擊係屬實情現在正當堵禦喫緊之時設因兵力不足致多掣肘何日始能竣事據向榮奏前調福建漳州鎮屬雲霄同安詔安等營官兵王懿德以防堵粵界另調福甯等處兵千名前往該官兵恐未能得力此時福建軍務漸竣著王懿德迅遵前旨卽行選調漳州鎮標及所屬雲霄詔安同安各營兵二千名如數揀

齊派令得力將弁管帶剋日起程前赴向榮軍營聽候調遣不得稍分畛域致滋遲誤其已調之福甯甯邵武延平各兵卽撤令回閩留防本省毋再藉詞推諉並著葉名琛柏貴查明前報啟行之潮州鎮壽山所帶官兵二千名何以遲遲尙未行抵江南迅速飭催卽日兼程馳赴金陵以速補遲至葉名琛等前奏續派碣石鎮總兵謝焜管帶之拖風紅單船共四

十隻尙未出洋此次江面剿除金陵城內竄出逆匪
轟擊賊船不下數百隻連獲勝仗全藉粵船之力惟
上下游江面寬廣往來衝擊船數實屬不敷著該督
撫等迅飭前項續調船隻趕緊開洋星速駛入長江
以資協剿

同日塔齊布曾國藩奏言閏七月初一日升用
道李孟羣親督戰船出隊至城陵磯下游擊敗

賊匪初二日臣塔齊布傳令進剿羅澤南李續
賓等分路並進立抵高橋燒燬賊營七座搃斬
數十人餘匪奔城陵磯一帶臣塔齊布帶同李
續賓等直赴城陵磯該逆出隊二萬餘人開礮
互擊我軍伏地前進臣塔齊布策馬首先衝入
湖勇繼之各兵勇一擁而前適大雨如注賊礮
不燃我軍乘勢猛撲羅澤南周鳳山等分投合

擊踰溝越牆頃刻間屍橫徧地殲斃長髮老賊
及賊目多名一營旣破其五營亦同時蹋平該
逆自相踐踏我軍四路趨殺追至江岸徧溺者
不計其數共蹋毀賊營十三座殲斃約二千名
生擒一百二十餘名逃散者又數千名臣國藩
當飭李孟羣水軍三營追勦該逆先開所擄民
船而以戰船拒後楊載福蕭捷三等從東西兩

岸抄擊李孟羣從中路進攻該逆驚竄時已昏
黑我軍暫泊擂鼓臺下初三日分途進勦先從
荆河口泝流而入復於東岸之旋湖港西岸之
觀音洲等處搜擒敗匪四十餘名踢平賊營九
座礮臺三座初四日楊載福蕭捷三等追至倒
口石頭關等處疊有擒獲復追至六溪口勦洗
無遺現在臣國藩進紮監利縣屬之羅山臣塔

齊布亦卽日拔營前進一面飛咨官文多派兵
勇從大江西岸直下協助並咨會楊需由德安
一路進攻漢口之背以圖克復鄂省掃蕩逆氛
所有尤爲出力之文武員弁仰懇

恩施量子獎勵

塔齊布曾國藩又奏言按察使胡林翼膽識絕
人威望夙著所帶黔勇六百餘人前在貴州黎

平府任內教練有素屢著戰功本年勦辦崇通
股匪安化土匪及收復常德郡城所至皆愜民
望現奉

諭旨仍留湖南軍營辦理防勦事務請

飭該臬司管帶黔勇酌撥他路兵勇自成一隊隨同
臣
等東征於大局必能有濟又接陳啟邁咨稱逆
賊竄擾江西亟待南省應援請仍飭上年援江

之委員朱孫詒羅澤南帶兵前來查朱孫詒現
署寶慶府事能否帶兵赴援應由撫臣酌覈至
羅澤南現帶湘勇一千與臣塔齊布聯營協剿
屢次大捷現已進紮羅山正當勦辦喫緊之際
請免其赴援江省以便併力規復武漢奏入

上命軍機大臣傳諭楊需塔齊布會國藩曰現在塔齊
布會國藩自岳州城陵磯以下沿江追擊將二百餘

里賊巢剽洗殆盡已追至嘉魚縣屬後起大隊官兵亦卽日跟蹤前進是楚南一軍愈偏愈緊漸可駛抵武昌楊需儻仍株守德安不卽統兵前往必致東下之師又成孤軍無援之勢於攻克武昌全局仍無裨益著楊需卽照前奏三路進兵之議迅飭領兵各員分道進攻總以星速出江爲要一面親率精銳由楊店進發直趨漢口會督各路兵勇與塔齊布曾國藩

所統各軍協同攻勦乘此聲勢上下夾擊自無難一
鼓殲除楊需與塔齊布等一經會合兵力更厚或先
克武昌或併攻漢陽惟在隨時審察軍情相機速辦
仍須四面兼顧不致該逆被勦窮蹙乘虛奔突此時
攻勦喫緊楊需斷不可再事耽延塔齊布曾國藩亦
應倍加慎重總期計出萬全肅清江漢毋負委任臬
司胡林翼帶勇勦賊尙稱得力著卽隨同塔齊布等

前往湖北毋庸留於岳州知府羅澤南本係隨營協
勦之員亦著毋庸派赴江西所有岳州善後防勦事
宜卽飭藩司夏廷樾妥爲籌辦

上諭內閣曰逆賊於城陵磯等處建營築壘緜亙二百
餘里經官兵於數日之間悉數蹋平磯擒賊匪數千
餘名辦理甚合機宜塔齊布著交部從優議敘曾國
藩著賞給三品頂戴仍著統領水陸官軍直擣武漢

與楊需所統官軍會合迅掃妖氛遊擊周鳳山著以
參將補用府經歷李續賓著以知縣選用並賞戴藍
翎千總何越珽著以守備卽補並賞換花翎千總余
星元滕國獻著以守備儘先補用守備蕭捷三前於
湘陰失守案內有應得處分著免其查叅其餘出力
水陸員弁兵勇著塔齊布曾國藩酌覈保奏

塔齊布曾國藩又奏言現在出境東下步步前

進程途愈遠轉輸愈遲水路風信無常尤難應
手必須派司道大員專駐岳州總辦糧臺方足
以資轉運前經奏調之道員蔣徵蒲現因設措
捐款不能前來查有新授湖北藩司夏廷樾精
明幹練熟悉兩湖情形現值賊氛梗阻無從到
任仰懇

天恩飭令該藩司總理行營糧臺暫駐岳郡將來克復

武昌前赴新任仍令兼司糧臺以資接濟奏入
得

旨允行

二十二日己丑福濟奏言臣接浙江撫臣黃宗漢
咨稱賊匪竄至青陽漸入涇縣地界因涇邑民
團齊心殺賊欲改由太平縣竄入徽州已派知
府徐榮等帶領委員分赴徽甯並派兵勇二千

名隨往協防助勦臣查徽甯二郡爲江浙藩籬
賊因金陵鎮江圍攻嚴密無日不思分竄以圖
吞噬蘇杭儻徽甯稍有疏虞實關東南大局又
查江浙固以徽甯爲藩籬徽甯又以池太爲門
戶今沿江南岸之貴池銅陵繁昌蕪湖等縣皆
爲賊蹤出沒之地向榮併力金陵旣難兼顧臣
等遠隔江北不及分防浙撫所派防勦之兵如

能追賊出江似宜擇緊要江口如蕪湖大通等處就近駐守毋遽回浙應請

飭令向榮及兩江督臣怡良浙江撫臣黃宗漢酌議施行奏入

上命軍機大臣傳諭向榮怡良吉爾杭阿黃宗漢曰逆匪因江面舟師截擊軼入南岸竄至青陽漸入涇縣因該縣民團得力復欲改由太平竄入徽甯二郡窺

伺蘇杭儻有疏虞實關東南大局和春福濟現在攻
勦廬州遠在江北不能分兵勦辦自係實在情形據
奏黃宗漢已派杭州府知府徐榮等分赴徽甯並派
兵勇二千名隨往防勦是該撫深知保徽卽以保浙
故能不分畛域布置周詳且該二郡有山谿之險得
此兵力自可阻遏兇鋒至福濟奏稱南岸之貴池銅
陵繁昌蕪湖等縣皆爲逆賊出沒之地浙江所派防

剿之兵如能追賊出江宜擇緊要江口如蕪湖大通等處就近駐紮毋遽回浙等語黃宗漢向來辦事認真著卽統籌全局該省兵力能否外援鄰封內保本境斟酌辦理至太平甯國與金陵接壤並著向榮怡良吉爾杭阿體察現在情形酌籌防剿以期聲勢聯絡互相援應俾該逆不能乘虛竄擾

同日楊需奏言據報賊匪自螺山敗回屯聚漢

陽武昌勢頗窮蹙急宜乘此進兵以期與湖南
兵勇三面夾勦克復武漢 臣現由楊店回營定
於十八日拔營督催兵勇前進惟水路一軍深
恐緩不濟事昨接官文咨魁玉楊昌泗管帶兵
勇已行抵監利查監利去襄陽已遠折回必需
時日不若就近變通辦理免致迂迴貽誤當卽
飛飭魁玉等若尙未起身卽可隨同塔齊布曾

國藩之軍乘勝徑攻武昌接應漢陽漢口兵勇
所有水路之軍改於陝西駐襄官兵內調撥一
千名又於襄陽練勇內挑選一千名乘船由襄
河而下爲兩路策應一面飛咨王慶雲將駐紮
商南之甘肅兵一千名由荆子關水路順流來
襄與豐伸之兵一同駐紮以壯聲勢應請

飭下王慶雲卽將商南防兵一千名派員管帶來襄以

資調遣

楊需又奏言探聞賊情近頗慌張各懷去志有
蔣菖梧者受賊僞職原係湖南東安縣武生爲
賊迫脅入夥現赴遊擊吳登鼈行營密稟投誠
臣卽令其捨斬長髮僞官賊目以爲信驗又捨
匪李士林安徽霍邱縣人誤入捻黨近因悔罪
投誠情願殺賊贖罪所帶鄉勇數千名皆精壯

皇朝通志卷一百三十一
十一
可用頗能約束臣現今其隨孝感縣知縣李殿
華帶勇進攻漢陽如能殺賊立功再行懇

恩赦其既往奏入

上命軍機大臣傳諭楊需曰現在塔齊布曾國藩業已
督兵進駐羅山該署督既於十八日移營前進著卽
遵旨迅由楊店直趨漢口會合湖南得勝之師乘此
聲威盡殲羣醜不得稍有耽延並飛催魁玉等統帶

兵勇卽行前進或由沔陽直攻漢陽或隨同塔齊布等徑攻武昌卽行馳往毋許遷延觀望有誤事機逆匪自踞武漢以後未經大受懲創此次官兵前後夾擊該逆必四出奔竄以圖牽掣我軍分我兵力該署督務當統籌全局杜其分竄爲次第克復武漢之計斷勿令此勦彼竄爲害他處也至從逆匪徒旣已悔罪投誠原可予以自新之路惟須察其真僞暗相鈐

制庶不至中其奸謀所有投誠之蔣菖梧李士林等
二名卽飭遊擊吳登鼇知縣李殿華等加意防範如
果不遵約束未能得力卽不動聲色嚴密懲辦若能
帶領壯勇殺賊立功亦可寬其既往酌量保奏

上又命軍機大臣傳諭王慶雲曰楊需奏水路需兵改
調陝西駐襄官兵一千名又挑選襄陽練勇一千名
赴襄河下游爲東西兩路策應惟襄樊防守兵力稍

單自應設法布置著王慶雲迅派商南備調之甘肅官兵一千名由荆子關順流赴襄與豐伸同駐一處以壯聲勢衛襄樊之腹心即可固陝省之門戶至商南等處應如何布置並著該撫隨時妥辦

二十八日乙未官文貴陞奏言賊船退出大江現

在監利所屬地方肆擾經魁玉楊昌泗吳振鏞等派撥兵勇分爲五路從大江北岸陸路進剿

行至監利舒家垸地方卽遇賊船上駛當卽開
礮轟斃多名生擒賊目汪汝瀾等九名又於五
合垸陸路遇賊擊敗計兩次生擒二百餘人奪
獲旗幟槍礮刀矛多件閏七月初六日先後齊
抵螺山適遇南省道員李孟羣兵船抵岸合兵
一處先將螺山下兩岸陸路餘匪搜剿淨盡並
飛催南省礮船划船到齊卽會合兩省兵勇由

江面兩岸分爲三路一直攻下仍派李光榮水
勇及南省水師官兵以爲後應又令北省參將
恆泰等各帶兵勇取道新隄以扼水陸要隘並
分勦倒口等處餘匪奏入

上命軍機大臣傳諭楊需曰據官文等奏稱魁玉楊昌
泗一軍從大江北岸隨勦隨進已於初六日與卽用
道李孟羣兵船會合一處先將螺山以下兩岸餘匪

搜盡卽會同兩省兵勇順流下擊仍派李光榮水勇
及湘南水師以爲後應又令參將恆泰等各帶兵勇
取道新隄以扼水陸要隘並分勦倒口等處餘匪是
荆郡派勦官兵與塔齊布曾國藩水陸各軍已可沿
江夾擊而下不日卽應進逼武漢楊需前奏於十八
日移營前進所統兵勇已不爲單當此上游進攻得
手之時下游進兵愈不可緩無論漢川是否收復亦

不得因此牽掣全師或應分防或應截勦總期迅速
籌辦上下夾攻更易爲力該署督務卽與楚南東下
之師聯絡一氣迅圖進取魁玉已抵監利卽毋庸折
回荊州以便督帶兵勇剋期會合

二十九日

丙申

向榮奏言查該逆嘯聚太平府城

復於金陵城外西南隅板橋善橋一帶築營分
踞閏七月十三日傅振邦由丹陽進兵直抵距

太平十五里之臧漢橋地方先將伏路守卡之
賊搜獲多名張國樑訊知府城西南北三面均
有內河繞護東路重濠引水中架釣橋連紮賊
營四座防備甚密乃將兵勇分作三隊令頭隊
偷出賊營之後渡濠伏於城下以二隊潛赴賊
營縱火接應該參將等銜枚疾進十四日天未
明時我兵馳近賊營該逆正在相持忽見城廂

火起延燒賊營逆衆後顧驚惶不知所措我兵
乘勢趕殺連破賊營偪近釣橋突有大股賊匪
自城中衝出各兵勇奮力截殺而城上礮石如
雨勢難近前傅振邦立斬退縮兵勇數人張國
樑首先衝入賊隊衆兵勇一齊擁上將賊衆撲
落濠溝餘賊退過釣橋各兵勇乘勢爭先搶城
千總楊萬青勇目程翔蛟不避矢石先登城上

欽倒守堞賊目多人接應我兵張國樑及遊擊
楊瑞乾衝進城中分投截殺突有黃衣賊目兩
人帶領匪衆短兵巷戰經兵勇立將賊目殺斃
餘逆殲斃不少兼有從西門奔出上船逃駛者
適我大隊由城外趕上沿河追斬並將賊船燒
燬無算追至金柱關江口賊船一百餘隻遁赴
江北上游一帶我兵始撤回城統計殺死溺斃

不下四五千人擒斬僞官賊目不計其數焚燬
大小賊船八百餘隻是日金陵之賊復出巢窺
伺先於龍脖子地方挖築營壘旋由通濟門兩
花臺等處出賊數千堵住七橋壘進路另出賊
衆四股於上方橋隔河一帶連築六營當派遊
擊穆大本等帶領兵勇嚴扼通濟門洪武門等
處要路蘇布通阿與福興親駐七橋壘橋頭指

揮策應派令參將長桂等各帶兵勇分路攻搗
賊營我軍連燬賊營二座斬馘甚多該逆見我
留營人少突於雨花臺洪武門出賊兩股直撲
七橋甕營盤蘇布通阿卽督令穆大本等率兵
迎敵槍礮頻轟蘇布通阿被火燒傷鬚眉被燎
福興右手受傷仍各督戰愈力穆大本矛刺賊
目數名因用力過猛連馬跌陷河中參將蔡應

龍守備虎坤元戴文英等往來衝殺該逆死拒
不退適守備李定太帶廣西等省之兵至橫衝
賊隊短兵奮擊殲賊數百人該逆不支相率潰
走我軍爭先追擊俘斬甚多又據已革提督余
萬清呈稱鎮江逆匪於十四日出巢窺擾經我
兵擊退續據逃出難民供稱有瓜鎮併駭內竄
蘇杭之語十五日復稱有賊船多隻由瓜州駛

過鎮江當於十六日進兵於西北兩門壘獲勝
仗正擬收隊該逆又分股衝出余萬清與總兵
劉開泰督兵分投迎勦無不以一當十疊刺騎
馬賊目數人斃賊二百餘衆餘逆不能抵拒我
軍乘勢追逼近城城上礮子如雨乃令收隊回
營查張國樑捷勇現已調回大營復令傅振邦
領得勝之兵由秣陵至土山潛出賊營之背務

將上方橋賊壘設法掃蕩以便進徧西南善橋
一帶並圖踏龍脖子賊營防其竄逸之路惟是
太平府城雖已克復而大營存兵過少現催令
吳全美葉常春督率師船迅速駛上太平府將
高淳之鄧紹良一軍移出會合堵截並飛調甯
國浙省防兵出堵黃池河口水陸聯絡進剿蕪
湖其丹陽縣爲蘇常門戶已責成余萬清就近

堵勦初十日探聞該逆於浦口之九洲八子
溝等處挖築土城搭造高墩並用木箒架礮聯
以船隻意圖阻我上下師船並以窺探江北北
岸緊要萬分尤宜迅往攻燬經臣嚴札武慶責
令就近進勦並檄總兵李德麟將石埠橋各艇
師駛上浦口及六合縣派撥兵勇划船會同水
陸夾攻務期迅掃賊蹤肅清江面以杜北竄

向榮又奏言臣大營在江甯省城之東南隅如
洪武門及上方橋土山高橋門等處皆係臣營
後路賊匪現在上方橋紮營有直趨高橋門之
勢中間僅隔一水時慮偷渡蔓延先經分撥遊
兵晝夜接替巡防十八日該逆闌入高橋門一
股直走沙子岡欲向淳化鎮一帶竄擾一股分
撲小水關欲抄我大營之後我兵先馳抵水關

整隊迎勦該逆擁衆來拒已革副將巴圖督同
都司何振標等率勇橫衝賊隊擊斃騎馬黃衣
賊一名逆衆驚走並將沙子岡賊後隊掣動均
潰至高橋門適張國樑從旁抄至縱橫肆擊俘
斬千有餘衆該逆突圍回奔我軍跟蹤緊勦偏
近上方橋水際該逆拌死拒敵守備李定太帶
領奮勇一隊直衝撲入逆匪不能抵禦紛紛擠

入河中其已上浮橋之逆正在半渡又被我兵
槍礮轟擊亂翻落水何振標衝上石橋追殺突
被礮子中傷掀跌淹溺時賊爭渡浮橋將橋踏
斷我兵遂分扼橋邊大加砍殺屍塞兩橋河水
盡赤統計斬溺賊匪不下四千人內有僞丞相
賴四秀僞提督石詳真及僞官賊日多人是日
該逆復於兩橋連紮木簞偷渡過河於隄邊築

砌兩營被遊兵攻燬一座對岸之賊過橋接應
我兵用大礮連轟擊斃無算復沿河截殺該逆
撲水淹溺五六百人我兵立將橋東賊營二座
奪占凡未及過河之賊逃向土山一帶經我兵
追殺無遺其連日敗逃逸賊並經江甯府知府
趙德轍督率團練搜殺淨盡統計兩旬以來斃
賊凡二萬餘人再此次陣亡都司何振標及十

五日陣亡之遊擊穆大本與東壩陣亡之副將
福賡應請一併

飭部從優議卹奏入

上命軍機大臣傳諭向榮陳金綬雷以誠武慶曰逆賊
屢次出撲總圖窺我七橋壘營盤以斷大營犄角之
勢復於上方橋築壘焚擾希圖抄截大營後路此次
連日獲勝七橋壘危而復安上方橋東賊巢亦經我

兵奪得固已稍寒賊膽但逆賊被勦愈急竄突之計
愈狡且蘇布通阿現受重傷上方橋西賊路尙未斷
絕金陵大營仍屬在在堪虞正宜於屢勝之餘加以
慎重明攻暗防不可稍存大意太平府城旣經克復
則吳全美師船卽可乘風上駛向榮所稱將鄧紹良
駐紮高瀆之兵移出並調甯國府浙江防兵出堵黃
池河口與福濟前奏請調浙兵駐守蕪湖大通等處

同爲嚴扼南岸起見惟向榮之意慮賊由東壩而入
蘇常福濟之意慮賊由青陽而入徽浙兩處並重亟
應熟計兼權未可專恃浙兵致蹈各顧一隅之失浦
口地方極關緊要旣爲扼賊北竄要衝又爲江面師
船往來必由之路前據陳金綬等疊次奏報逆匪於
九洲等處築壘紮筏冀阻艇師已飭總兵李德麟
帶兵上駛並咨會武慶札飭六合縣分兵進攻與向

榮本日所奏大略相同向榮欲令陳金綬等分撥陸軍與武慶合勦而陳金綬以兵無可分爲詞陳金綬等欲調吳全美等艇師回勦而此項師船又須進扼太平儻彼此推諉致賊壘築成我軍聲勢不能聯絡武慶所帶官兵僅二千有餘設有疏虞所關非細著向榮陳金綬雷以誠等飭令武慶與李德麟等水陸夾擊務使賊無立足之地此係緊要關鍵與平時防

堵浦口不同武慶素有膽略必能力遏賊鋒現在托
明阿尙未到營向榮不得稍分畛域專顧江南浦口
帶船之署副將周希濂前經武慶飭催輒以船單誘
卸現在是否隨同李德麟等進剿如再藉詞觀望卽
著據實嚴叅陳金綬等前奏已令陳世忠水師進駐
段要口向榮現奏責成余萬清堵扼丹陽均著嚴飭
各該員實力防剿蘇布通阿屢次督戰奮勇當先朕

心正深嘉獎茲因親自督陣被火燒傷甚至鬚眉皆
燎猶復悉力指揮覽奏殊深懸念著發去如意拔毒
散十料交該將軍祇領務卽加意調攝冀得速痊共
成偉績以慰眷廬

上又命軍機大臣傳諭托明阿曰向榮奏金陵鎮江連
獲勝仗該逆受創亟思竄越浦口之九泐洲八子溝
等處築城並用木箠架礮聯絡船隻意圖阻我師船

以窺江北是浦口情形萬分緊要該處雖有武慶在彼扼勦而江北口岸紛歧瓜州賊衆仍復盤踞牽掣向榮籌攻江鎮兩城並防東路處處喫緊深恐不及兼顧著托明阿迅卽兼程馳往毋稍遲延抵營後卽將布置攻勦情形速行具奏

上諭內閣曰此次金陵大軍連獲勝仗鎮江賊匪亦受懲創軍威旣振逆膽已寒該大臣卽應督率各路官

軍並江面師船會合陳金綬等無分南北水陸並舉
速籌攻復兩城肅清江路都司何振標奮勇殺賊中
礮淹溺遊擊穆大本因刺賊用力過猛失足跌陷河
中均堪憫惻著與東壩陣亡之副將福賡一併交部
照陣亡例從優議卹

同日略秉章奏言本月十一日據曾國藩咨稱
奏調臬司胡林翼帶勇隨同東征臣維岳州關

繫甚大必須重兵駐守始爲計出萬全且武漢各府州縣久淪於賊土匪叢起兼之江西界連之武甯縣義甯州等處匪黨未就殲除本省之巴陵臨湘華容餘匪尙須搜勦此次大軍東下利在遄行儘東下之後餘匪復肆臨張或逆賊乘我軍後路空虛間道抄襲致大營糧臺聲息中梗所關非細且湖南官紳兵勇之曾經戰陣

者均已調赴東征今胡林翼又復帶勇隨征則
岳州一軍更不可恃實於大局兩有所妨應請
仍遵前

旨飭令胡林翼駐岳籌防搜捕餘匪以期妥慎

駱秉章又奏言楚鄂交界險要地方無過岳州
城北十五里之城陵磯荆河口兩處對岸相距
不逾十里湖南全境之水入湖由城陵磯而入

江四川全境之水入江由荆河口東下水道守
此湖南一省固可無虞卽湖北之荊州宜昌以
及入川水路均可控扼然欲於此設防自不得
不籌備水師多造船礮曾國藩所統水師船礮
本不爲多自七月十六日陳輝龍之敗所失船
礮不少雖經曾國藩多方整理尙未周全臣正
在籌畫間據在籍前翰林院侍講學士丁善慶

前工部員外郎陳本欽同知銜卽選知縣唐際
盛鹽提舉銜舉人李概等均稱水陸官軍旣連
獲大捷自宜捐造樓船以資攻勦惟洋礮一項
未諳作法前蒙奏調浙江候補知縣龔振麟及
其子之棠如能速攜鐵模來南卽可由紳局捐
貲鑄造儻來此需時誠恐緩不濟急卽由官咨
催廣東採辦洋礮以濟急需至製造工料並旗

幟軍械一切均由該紳等設局捐辦繕造大小
戰船百餘隻如捐項較多再行添造 臣查該紳
等力肩重任倡議捐貲實爲難得現已一面採
購船料擇吉興工一面分投勸捐以期迅速奏
八

上命軍機大臣傳諭駱秉章塔齊布曾國藩曰前以岳
州緊要疊諭駱秉章等飭令胡林翼帶兵前往防堵

經曾國藩等奏請將該員帶往湖北復經降旨允准
其岳郡防守事宜諭令派員接辦茲據駱秉章奏稱
岳州必須重兵駐守方爲計出萬全湖南官兵之曾
經戰陣者均已調赴湖北若胡林翼復行隨征則該
郡實無可倚恃等語岳州一郡爲湖南全省門戶卽
爲四川滇黔等省藩籬逆賊屢次窺伺雖經擊退防
範更宜嚴密且該處駐有重兵則曾國藩等統師東

下可無後顧之虞著駱秉章等卽飭胡林翼仍駐岳
州毋庸隨往湖北並飭令督率兵勇嚴密防堵以爲
曾國藩等後路聲援若武漢賊匪被勦下竄岳州防
堵較緩仍可飭令胡林翼出境隨勦惟在該撫等體
察情形熟籌妥辦至製造礮船尤爲防勦要務旣據
駱秉章奏稱該省紳士情願捐辦卽著督同在籍學
士丁善慶等速行購料興工將應用船礮等剋期造

鑄如所謂之浙江知縣龔振麟等尙未到楚卽著咨
催廣東採辦洋礮以應急需

欽定勦平粵匪方略卷一百四 甲寅年

八月初三日巳邵燦奏言據河臣楊以增函稱

琦善在營病故一時統馭乏人瓜州賊匪欲乘

間竄逸淮城偏近瓜揚爲清江門戶地當衝要

囑臣星馳回淮以資鎮定臣當由水路起程回

淮二十二日到署正在料理防守事宜適陳金

綬雷以誠傳

旨飭臣行抵安徽後暫留該省辦理捐輸防堵事宜惟刻下揚州池北一帶人心浮動萬一逆匪乘間竄入勢將不支臣如在臨淮接奉

諭旨自當暫留安徽今已回至淮城未便遠離貽誤奏

八

上從之

上命軍機大臣傳諭和春福濟袁甲三日前因瓜州軍

務緊要仍令雷以誠會同陳金綬辦理並有旨諭令邵燦於行抵安徽後暫留該省籌辦防堵事宜茲據該漕督奏稱淮城防堵亦甚喫緊勢難再行折回皖省等語本日已准邵燦仍駐淮安妥籌堵禦即可不必赴皖所有安徽現在設防督勦及一切事宜仍著和春福濟會同袁甲三實心妥辦既不可稍存意見亦不得互相推諉總期勦賊籌餉兩有裨益各專責

成而免貽誤

初四日

庚子

陳啟邁奏言據已革總兵趙如勝等

稟報七月二十四日帶領戰船駛抵吳城該逆
聞省河水軍出勦紛紛先遁僅存船百餘號停
泊前河一見我軍順流而下亦卽揚帆退竄趙
如勝激勵兵勇奮迅追勦連開大礮擊沈賊船
二十餘隻匪船連夜竄出湖口因風浪大作沿

途傾覆多隻溺斃賊匪無數其竄擾建昌山下
渡逆船該縣景瑞正擬帶勇堵禦適九江撤回
官紳兵勇在山下渡遇賊接仗被該逆抄襲傷
亡不少帶勇從九品袁萱林外委鄧作棟手刃
數賊旋被槍傷落水殞命該縣會同縣丞趙光
裕等馳往堵剿擊斃逆匪數十人賊遂退走上
船竄逸我軍因無船隻未能窮追又據署武甯

縣事通判王宇英稟報七月中旬有土匪勾結
湖北賊匪來縣報復當經已革參將德保臨川
縣知縣馬永熾帶勇赴橫路堵禦中途猝遇賊
衆馬永熾親率弁勇向前進剿不意兩旁突出
逆衆將後路官軍截斷以致前軍腹背受敵已
革把總陳世培外委江國泰額外洪大春武舉
帥丙照俱力竭陣亡十八日大股賊匪又由東

北兩路前來攻撲遊擊富克金泰已革在籍知縣劉馨朝已革衛千總李天鵬等出隊迎勦鏖戰逾時斃匪三百餘名該匪稍卻復分股四面抄襲兵勇隊伍遂亂富克金泰劉馨朝與千總李天鵬外委金大鵬鄧步雲均同時陣亡該匪分股潛竄義甯邊界兵勇出戰失利當節退伺據險堵禦臣查武甯逆燄復熾城中兵勇僅千

餘名勢頗危急惟殘破之餘該匪無所覬覦義甯尙係完善之區今逆匪旣分股竄擾義甯邊境該處堵剿尤爲緊要前飭該道王訓帶兵往援武甯之舉此時暫緩啟行免致顧彼失此現在山下渡肅清卽飛飭吳錫光帶勇取道義甯徑趨武甯並派千總楊錦斌等帶勇七百名迅赴靖安以堵爲援約期會合進剿綜計武甯兵

數猶恐不敷須由省再行酌撥前往但根本重
地未便空虛惟有於外郡各營酌調弁兵來省
以資捍衛至吳城賊船雖經擊退第長江無阻
難保不復圖竄擾卽責成趙如勝於下游擇要
嚴備以固疆圉奏入

上命軍機大臣傳諭陳啟邁曰前次由九江入湖下竄
之賊經趙如勝等帶兵駛抵吳城立將逆船全數擊

退其旁竄建昌賊匪亦被官兵鄉團擊敗逃遁近省一帶雖漸肅清惟該逆烏合之衆一聞官兵追勦遂卽紛紛退竄並未大受懲創省垣重地尤應刻刻嚴防勿令賊蹤闖入其武甯大股屢次撲擾現旣進攻失利又有分股潛竄義甯邊境陳啟邁所稱派令吳錫光帶勇前往武甯會攻並派千總楊錦斌等帶勇赴靖安以堵爲援仍由省添撥官兵助勦籌畫尙是

但不知該員弁等是否可靠或須另派大員前往督
勦著隨時酌度妥辦道員王訓所帶之兵卽飭令仍
駐義甯實力籌勦此時塔齊布曾國藩等東下之師
已追至嘉魚蒲圻一帶恐楚境下游逆匪聞風潰竄
更向東南奔突則義甯陸路邊界與下游九江門戶
均當其衝以目下情形而論嚴防義甯要隘迅解武
甯城圍嚴扼姑塘湖口在在均關緊要該省兵力雖

單他處亦無可調撥惟當就本省兵勇船礮或勦或防妥爲布置仍責成趙如勝等督兵嚴備江防一面迅飭義甯帶兵各員妥速勦辦總期熟計統籌毋稍疏失所有武甯勦賊陣亡之遊擊富克金泰已革知縣劉馨朝已革衛千總李天鵬外委金大鵬鄧步雲已革把總陳世培外委江國泰鄧作棟額外洪大春武舉帥丙照從九品袁萱林均著各照原官交部議

卹

同日陳金綬雷以誠奏言金陵賊匪謀於浦口
紮立水營武慶令知縣曾勉禮將二道河用船
搭橋擬卽乘夜進攻溫紹原亦派撥勇丁數千
交都司富勒渾秦等於十五日赴浦接應是日
浦口水勇先已過河直入賊營殺賊數人因南
岸賊船齊來而總兵李德麟等艇船阻風未能

上駢兵勇仍行撤退該處現紮賊營一座臣等
疊催李德麟等上駢與武慶水陸轟擊並飛咨
向榮速飭吳全美葉常春率師下駢乘此賊壘
初就上下夾攻毀除淨盡以杜該逆由浦北竄
之患二十四日總兵葉常春已帶拖罾船四隻
從上游駛過下關直抵浦口與李德麟師船會
合兵力較厚風順卽當進攻其吳全美之紅單

船仍可從上游夾擊奏入

上命軍機大臣傳諭向榮陳金綬雷以誠曰逆匪圖占
浦口洲地建築水營業經疊次諭令陳金綬等設法
勦除卽陳金綬等屢次奏報亦稱督飭武慶會同李
德麟等水陸夾攻何以此次武慶與江浦六合兩縣
分帶兵勇進勦而李德麟猶以阻風爲詞以致賊營
築就如果李德麟於奉札後卽時上駛該逆斷無立

足之地何必專待吳全美葉常春師船回剿始能杜
其奸謀今賊壘已成李德麟旣藉詞推諉不能不如
所議飭令吳全美帶船駛回但此時江面攻剿正在
得手太平甫經收復蕪湖萬分喫重吳全美師船折
回後上游太覺空虛尤須嚴防皖楚賊船大幫回竄
著向榮一面飭知吳全美迅從上游順流夾擊一面
妥籌太平蕪湖一帶布置機宜不可顧此失彼徒令

得力師船往來行駛轉致兩無裨益至李德麟等所帶艇船上年株泊焦山幾及一年直至琦善嚴札催提始開赴瓜州以上協勦琦善一經出缺又復玩泄耽延屢催不進專待借力於紅單船隻試思紅單船入江原爲肅清江面節節進勦並非爲帶艇各員藏身自固地步設吳全美回勦得手竟將賊營奪毀李德麟又將以協勦居功此等狡猾之員竟至不能驅

策陳金綬何輒弱至此耶洲地突漲江心必須水師
圍剿不能專恃陸路官兵武慶旣屢次進攻甚爲奮
勇葉常春趕緊回駛亦合機宜著再嚴飭李德麟先
就現有之船剋日前進務將賊壘立時掃蕩若能迅
速毀除則吳全美一軍仍可專力上游不致掣動大
局儻再有心延宕卽著陳金綬等據實嚴參不得稍
存姑息琦善所造多槳快船現在當已竣工此項船

隻以之進攻洲地賊巢較紅單船尤爲捷便應作何
布置之處亦著迅速具奏

同日官文貴陞奏言李孟羣等督帶礮船由新
隄搜勦倒口順流直下遇賊卽擊斬獲多名將
嘉魚蒲圻等縣先後收復楊昌泗魁玉等亦由
新隄帶兵直下沿江西岸分勦將岸上竄賊捕
殺淨盡於陸溪口等處擊沈賊船數隻殺斃多

名頭隊已抵嘉魚鐘洲對岸之清潭口距漢陽一百五十里二隊已抵嘉魚對面之龍口現飭楊昌泗魁玉等會合前侍郎臣曾國藩迅由清潭口等處進兵毋誤機宜奏入報

聞

初五日 辛丑 勝保德勒克色楞善祿崇恩奏言逆

匪死踞高唐堅匿不出臣等一面抽撥兵勇進

偏紮營一面激勵兵勇會商進攻新造一萬五
千斤大礮業已造成卽飭各員弁督率夫役挽
運礮車一面選派兵勇添募夫役於城之西北
及正北偏近賊巢之處挖濠築營以便就近攻
擊自閏月二十八至八月初一日正北西北兩
面連築三營俱已竣事其東西兩面卽當以次
添築現將大礮運至城東北面距城二百步遠

近相度地勢安設開放惟城垣堅厚一時未遽
轟破而城上賊衆甚形驚懼其東面城垣經二
千斤鐵礮晝夜轟擊已有鼓裂情形續造八千
斤鐵礮亦於日內可成若運往連環轟擊必可
摧堅破壘但該逆多係粵楚老賊窮極兇狡恐
其不待破城亟思鋌而走險臣等已熟商定議
傳令各營賊如突竄之時北路一帶臣親自帶

隊截殺各路官兵迅速繼進如向南路則臣德勒克色楞帶隊先追東路派令魁福等先追西路派令培成那敷德等先追無論賊竄何路臣聞信卽往督帶官兵跟蹤勦殺總期殲滅淨盡決不令垂斃窮寇乘隙遠颺奏入

上命軍機大臣傳諭勝保德勒克色楞善祿崇恩曰逆匪竄踞高唐堅匿不出該大臣等前次已逼近賊巢

紮營建築礮臺現復於正北西北連築三營並用大礮轟擊覽奏各情不過專恃礮力攻擊仍未能明攻暗襲爲一鼓殲除之計逆匪雖係死黨而爲數無多我兵圍剿已及四月亦豈無隙可乘若始終遷延致敗竄餘匪牽掣全軍師老餉糜罪將誰諉况該逆見我軍逼近安營勢必亟思竄逸該大臣雖已分派各路聞信追剿而能否杜其奔突必須先事豫籌妥爲

布置斷勿令其蔓延他處致剿辦又形棘手該大臣等惟當懍遵疊次嚴旨迅圖克復務將此股賊匪就地殄除毋得日事耽延致干重罪

同日袁甲三奏言皖省軍務以現在情形而論自以克復廬州爲最要惟廬城相持日久克復尙難爲今之計惟有以偏師繞赴南路攻其不備必易得手且斷廬賊接應之路其勢旣孤萬

難久踞據臣派出勦匪文武稟報俞家灣匪巢業經擊破壽定一帶漸次肅清廬營附近可以無慮勾結臣先已密遣妥人赴南路探聽並據桐城廬江紳民方正等來營面請發兵據稱南路十餘州縣除安慶尙有六七千賊占踞往來無定其餘分踞各城多者一二千人少者三四百人民心不甘從逆官兵一到未有不薙髮景

從同心敵愾者一處得手四處響應各城必可
次第克復此安危之機斷不可失者也所難者
此行必須酌帶三四千人臣已令方正等密行
糾約多爲籌備糧米如能布置妥協卽擬親自
帶兵前進至進兵之路一由六安一由舒城現
在舒城未復繞道頗難且恐該逆先期聞知早
爲豫備現擬仍以勦辦土匪爲名先到六安暫

駐或將附近各縣同時並舉或先攻一二處以壯聲威一切進止隨時酌量六安距臨淮四百餘里一水可通尙可隨時照管正陽三河尖亦可就近控制其臨淮防守事宜擬留兵勇二千名交廬鳳道張光第統率辦理奏入

上命軍機大臣傳諭袁甲三曰安徽賊蹤自廬州以南十餘州縣均遭蹂躪現在俞家灣匪巢經官軍擊破

壽定一帶漸就肅清附近廬營無虞勾結此時若能
出偏師繞赴南路斷廬賊接應之道不但廬南各屬
可望廓清且翦其逆黨卽廬郡勢成孤立亦易收復
袁甲三旣令紳民方正等密行糾約多備糧米正當
趕緊發兵進駐六安糾齊義旅爲擣穴揜渠之計著
卽迅速布置督率兵勇乘勢進取或應同時並舉或
先攻一二處袁甲三到六安後隨時斟酌勿稍拘泥

惟深入重地謀事尤當慎密六安與臨淮一水可通
卽正陽三河尖等處亦可就近控制所有臨淮防守
事宜雖責成廬鳳道張光第妥辦袁甲三仍應防勦
兼籌北路防守不容稍懈毋得顧此失彼是爲至要

初六日

壬寅

上諭內閣曰前因勝保圍攻高唐未能克復降旨拔去
花翎以示薄懲原冀其感奮圖功迅殄醜類以贖前

愆乃圍剿已及四月我兵雖偏近賊壘紮營仍未能
剋期收復似此遷延觀望糜餉老師實屬大負委任
勝保著卽革職仍著督率將弁迅圖克復儻再玩延
朕必從重治罪

初七日 癸卯 僧格林沁西凌阿奏言連鎮逆匪於

八月初二日夜間分向四面撲擾放槍吶喊臣
等督率各營官兵嚴整以待該逆未敢近前各

退回巢初三日夜該逆四面來擾大股賊匪乘坐大船四隻木筏數十箇駛奔水口散秩大臣穆輅副將史榮椿督率官兵開放槍礮並拋擲噴筒火彈登時擊沈大船一隻燒燬大船一隻殄斃逆匪無數並斃僞水官總制廖姓散秩大臣穆輅此次擊賊出力前因失察兵丁沿途騷擾奉

旨摘去頂戴今既知愧奮可否

賞還頂戴之處出自

天恩奏入

上諭內閣曰逆賊困守連鎮疊被懲創窮蹙已極著僧
格林沁等督率官兵迅速進攻無任久稽顯戮穆輅
此次擊賊尙屬出力著賞還頂戴仍帶革職留任處
分

同日向榮奏言據總兵吳全美稟稱紅單船自
初四日獲勝後因在江甯鎮江面守風二十八
日始抵太平見塔下有賊船千餘泊近小河口
地方被我船連環轟擊立沈賊船三十餘隻延
燒七八十隻並搶獲賊船二十八隻餘船卽由
小河竄赴東梁山我船重大礙難深入追擊忽
西梁山夾洲內又有賊船百餘隻飛駛前來欲

襲我船之後各兵勇回帆戢擊大礮排轟頃刻
沈碎數船該逆卽相率敗竄查該處有夾洲兩
道前後遮隔我船不便寄碇乃仍回泊采石磯
以扼大江江面訊問生擒各賊東梁山有賊船
千餘西梁山亦七八百隻並有多槳快船數百
與陸賊聯絡屯踞等語查金陵賊鋒屢挫而太
平係江皖衝要上由夾江小河可達兩梁山下

有陸路可通江甯鎮紅單船無陸兵策應則水師仍不能於太平駐紮而郡城仍有嘯聚之虞卽金陵賊援亦未能絕臣現飭鄧紹良俟浙兵移出黃池扼紮卽將所帶之兵由高淳就近馳往會合師船扼住太平俾得相機進取蕪湖但兩梁山賊船過多下有夾洲隔護若紅單船一經上駛賊得乘隙潛出下游竄赴金陵查紅單

船堅礮猛扼勦賊船是其所長偏攻賊壘難期
得力一自分提上駛江鎮賊援遂斷賊船阻扼
難下則麴聚上游情形至爲喫重仰蒙

聖明洞察決勝幾先上游賊船過多師船究嫌力薄必
須添調陳國泰紅單船十隻或十五隻前來助
戰更足以壯聲威而操勝算臣已遵

旨飛咨陳金綬雷以誠轉飭陳國泰迅撥師船前來與

吳全美葉常春會合連拖層六隻共有師船四十餘隻往上攻勦以一半分泊太平梁山一帶一半駛至蕪湖池州等處則南北兩岸之賊聲氣隔絕卽可以次掃除矣其浦口九洲賊雖無多亟宜乘時攻勦以固北岸現擬調集師船與浦口六合勇練四五百人會齊夾擊聲勢頗壯定可迅掃賊氛臣已節次咨商陳金綬雷以

誠翁同書並嚴飭總兵武慶李德麟等迅圖剿
洗以免金陵賊匪北竄之虞現在金陵上方橋
賊營尙在固守又該逆水路接濟艱難必於陸
路附近處劫糧江甯省城之南五十餘里爲秣
陵關人煙稠密糧食較多秣陵迤南六十里爲
溧水可由溧陽金壇竄入常郡實爲蘇省緊要
隘口臣聞該逆現勾通秣陵附近棚民七八百

人意欲進關擄掠已飭參將蔡應龍帶領兵勇一千一百名馳往迎勦並知會怡良趕緊嚴飭各該縣一律嚴防臣仍嚴飭將士乘此聲威迅掃賊壘及秣陵賊匪棚民不使或有滋擾以防內竄奏入

上命軍機大臣傳諭向榮陳金綬雷以誠曰前因金陵上游紅單船較少特允向榮所請令於陳國泰所帶

船內分撥十隻或十五隻赴上游協勦原以金陵以上江面遼闊師船二十餘隻不敷勦洗下游紅單拖
曾廣艇等船共有八九十隻又有新造多槳快船是
以准其酌撥嗣因逆匪於九洲地方占紮賊營李
德麟延不進勦復諭向榮酌調吳全美帶船回駛亦
爲先其所急現在洲地賊營是否業已攻毀向榮本
日所奏調集師船與浦口六合練勇四五千入會齊

夾擊卽著陳金綬等傳知武慶迅速進攻不可再有
延緩至此次江面師船續獲勝仗已近東西梁山緣
該處逆船甚多又有夾洲遮隔未便深入重地固因
船數較少不得不加意慎重但此項師船上駛之後
賊援已漸斷絕若竟以船少勢孤坐守采石不能派
太平而上進扼梁山則江面要截之策仍係有名無
實若因下游船隻較多添調助勦固足以壯聲威而

浦口地方現又萬分喫緊權其輕重自以各就各船
分投進剿爲要策前次既有准調陳國泰師船十隻
十五隻之旨卽著向榮與陳金綬等遵旨妥辦一俟
兵力稍厚卽可由太平上駛竟達東西兩梁山掃淨
賊船以圖次第攻剿至上方橋賊營萬不可任其久
占秣陵關通賊棚民尤應迅速剿捕該處關繫蘇常
要隘怡良是否已抵常州著向榮知會該督於溧陽

金壇一帶加意嚴防不准稍有疏失

初八日甲辰陳金綬雷以誠奏言瓜州賊匪糾合

鎮江賊衆過江相助突於七月二十八日擁出
三四千人分由東西兩岸進撲副將鞠殿華等
卽帶兵由東岸迎擊賊至八里鋪隔河地面分
爲三股抄我首尾臣金綬親自督戰三路槍礮
齊發斃賊三百餘名追至四里鋪賊忽併爲一

路我兵併力合攻追至賊壘池北斬殺及落水者無數自辰至申殺賊約有千人此東岸接仗之情形也是日西岸賊來尤衆侍衛德興阿督帶吉林黑龍江各營馬步官兵迎勦遇賊三汊河之西南賊匪施放連環槍礮德興阿步隊躡身而進各營官兵左右夾攻賊不能支退至八里鋪德興阿與副都統富呢雅剛阿分兩路抄

截殲賊多名追至五里莊德興阿帶佐領常陞
等由中路進擊富呢雅剛阿由右斷賊歸路復
殲賊三四百名餘賊潰竄將近賊營該逆遽撤
浮橋不能相顧盡投濠內淹斃正鏖戰時委營
總海全匹馬直衝力砍黃衣賊目僞檢點吳姓
一名賊屍徧地淹斃無算溝塹皆盈共計西岸
殺賊一千餘名割取首級五十五顆生擒五十

五名此西岸接仗之情形也其另由東岸直撲虹橋管家橋之賊計圖擄掠沿江鄉村分我兵勢復經穆克登額等由四里鋪分路勦殺斃賊數十名餘皆紛紛遁回此次殲斃及落河淹死賊匪二千有餘官兵無一陣亡尤爲全勝之仗該逆經此大挫必仍固守不出惟有乘此軍威大振之時設法環攻以期一鼓而下現在儀徵

集賢堂 卷一百四
三
多槳快船已將造竣連日選礮運往一俟配架
齊全即可與紅單船師船大小相輔足資得力
所有此次出力將弁可否量予鼓勵之處出自

天恩奏入

上命軍機大臣傳諭陳金綬雷以誠曰江路逆匪自艇
船上駛後援應漸斷惟鎮江瓜州兩岸逆匪聲氣相
通此次糾合死黨過江攻撲雖我兵大加殲戮特恐

該逆受創之後伏匿愈堅必須迅速設法破其巢穴
鎮江與瓜州江口對渡瞬息可達果能乘此聲威剋
日進攻並飭余萬清同時並舉該逆自必急不相顧
至江面師艇上駛者已至瓜儀以上停泊者尙在焦
山以下雖云聲勢聯絡而瓜鎮兩口仍復任賊來去
自由勦辦終難得力焦山迤上之象山北固山暨對
岸之順江洲上下均有礮隄自被賊占踞後總未議

及設法奪回金山賊築礮臺又復梗塞江路我兵戰
船卽有駛至甘露寺之時往往接仗卽退不敢停泊
是水軍終未占據勝勢無怪該逆日久負嵎著陳金
綬等督飭將弁一面速攻瓜州一面約會余萬清各
派奇兵由間道暗襲礮隄使兩岸賊勢隔絕更屬易
於得手浦口洲地賊營萬不可任其久占前次疊降
諭旨均係緊要機宜著陳金綬等傳知武慶嚴飭李

德麟水陸並進務期平毀淨盡不准稍有遷延奸民
接濟火藥亟應嚴行斷絕前次陳國泰所獲運米資
賊小船卽有火藥槍子等件在內恐此外尙復不少
著嚴飭水陸各營並附近地方文武明查暗訪一體
搜拏毋任稍有漏網

上諭內閣曰逆匪屯踞瓜州與鎮江逆衆勾結往來離
巢撲擾經陳金綬等督率官軍奮力攻勦共計殲斃

及落河死者二千有餘亟應乘此聲威會合水師迅
圖攻克瓜州無再延緩所有在事出力各員著陳金
綬等擇尤保奏候朕施恩

初十日 丙午和春福濟奏言廬城逆匪疊被斬擒

防備極嚴閏七月十八日各營官兵奮力進攻
接仗五時之久約斃賊匪六七百名二十二日
程智泉江忠濬等帶勇於得勝門大西門一帶

往來誘敵該逆由南門突出千餘人嵩瑞等聞
信馳至合力攻剿斃賊二三百名二十五日探
聞由巢湖駛入之賊因秋稼登場意在搶糧城
內賊匪亦思撲出接應於二十六日各營兵練
馳至南鄉七里站奮力圍攻賊營斃賊二百餘
名生擒僞軍師周鳴江並著名賊目十二名砍
獲首級二十七顆奪獲器械八十餘件八月初

三十一
三十一
一日常清等帶領兵勇攻擊西門得勝門賊匪
千餘人突由得勝門擁出常清等三面夾攻斃
賊二百餘名敗竄入城伏匿伏思逆匪屢被痛
勦其計已窮現在一味堅守官兵攻徧殆無虛
日據節次生擒賊匪及逃出難民供稱城內米
糧尙足菜蔬油鹽甚少等語臣現在設法招集
南鄉團練斷其接濟俾得迅圖克復

和春福濟又奏言該逆自上年冬竄入英山盤踞蹂躪經臣等調六安州候選知州李元華候補知州博勒霍布六安州知州茅念劬招集團練一由金家寨一由霍山分起前進行抵英山境內二十一日直抵北城之竹絲嶺該逆正在築壘經前隊祝澂鑑等奮勇進剿賊見我兵突至紛紛驚潰有長髮數十名上前迎拒生擒九

人立即梟示其餘敗退入城二十二日北路徐振卿樊文鐸等越山直撲城根將附郭民房燒燬火光燭天西南守城賊匪見北路火起越城逃走江繼陶等即由西南城垣蟻附而上殺死守堞逆匪賊皆驚潰開南門逃逸復經北門樊文鐸徐振卿等砍伐樹木梯城而入殺斃指揮賊目四名各門大開我軍一齊擁入城內賊匪

搜殺淨盡並殺逆首張和尚一名此外逃出賊
匪復經祝昌奎等督勇尾追殺斃逆賊無數直
追至城南瓦寺前交湖北蘄水縣界方始收隊
奏入

上命軍機大臣傳諭和春福濟曰逆匪占踞廬州恃爲
巢穴我兵攻勦雖屢獲勝仗擒斬甚多究未能掃穴
擒渠剋期收復據稱城內米糧尙足該逆勢必負隅

雙身圖才明卷一百四
三
死守此時總當出奇制勝力破堅城斷不可再延時
日英山既已克復其舒城逆匪仍著嚴飭秦定三迅
速進勦儻能將該逆分踞之處次第收復則賊勢日
孤勦辦自易爲力

上諭內閣曰逆匪竄踞廬州屢被痛勦勢甚窮蹙著和
春等督飭兵勇奮力進攻迅圖克復郡城無稍鬆懈
其竄踞英山之賊經和春等派委六安州候選知州

李元華等相機籌辦將餘匪搜殺淨盡並將逆首張和尚殺斃立將縣城克復該逆自上年冬間竄入英山盤踞蹂躪經官紳團勇等奮力攻勦殲斃逆首克復縣城辦理尙合機宜所有在事出力官紳並陣亡義勇著一併查明分別奏請恩施以昭激勸

和春福濟又奏言據江浦縣曾勉禮稟報上月初旬賊於草輮峽放船百餘隻又在浦口北岸

中路與八字溝各紮營盤又於夾新灘地方添設礮位等語據全椒縣陳其昌稟報有賊船三百餘隻在和州鍼魚嘴地方游弋等語查目前賊勢已經江面師船疊次截擊南岸陸路又經向榮分兵駐紮益難竄越其江北各處六合官紳防守極嚴江浦情形已覺喫重和州含山被賊擾後民無固心官成虛設且夾江離浦口十

里上溯三十餘里卽抵烏江又四十里直抵和
城夾江已有賊營勢必乘虛竄擾若使復踞和
含接應廬巢賊勢蔓延辦理愈形棘手大營相
距旣遠兼顧爲難臨淮又無兵可分勢難坐視
應請

旨飭令雷以誠於揚州軍營抽撥兵勇一千名由儀六
馳赴和州督率嚴防勿任竄入雷以誠一時不

能起程卽令遴派得力員弁帶領一千兵勇先
赴該處防禦奏入

上命軍機大臣傳諭托明阿陳金綬雷以誠曰現在金
陵上游水軍屢獲勝仗南岸陸路經向榮分兵駐紮
江浦情形較前喫重和春等所奏和州含山亟須堵
禦原係實情惟昨據陳金綬等奏攻勦瓜州賊匪東
西兩岸甫經得手正當迅速督率水陸各軍破其巢

穴托明阿起程已久計當抵揚著通盤籌畫雷以誠
是否能親赴和州瓜州攻勦當喫緊之際或於儀徵
六合等處防兵內酌撥兵勇前往堵防之處務須妥
籌辦理並將能否分兵之處飛咨和春等以免貽誤
不得顧此失彼

十四日庚戌陳金綬雷以誠奏言臣等查瓜州賊
匪環城列壘引水注濠圖疲我師不如乘勝環

攻漸圖深入因卽先期布置傳令東西岸官兵
於初五日寅刻會齊四里鋪等處各帶木板搭
橋蒲包裝土以爲填濠進攻之用是日東岸副
將鞠殿華等督隊前行用土填平運河水口官
兵搶過外濠又用土填平水路三條以通攻勦
之路賊壘槍礮如雨當開銅礮擊斃望樓上賊
三四名西岸副都統德興阿等於四更卽至五

里莊帶領各營馬步隊直撲瓜州用銅礮擡槍
擡礮向賊隊連環轟擊該匪紛紛倒地當拆毀
賊卡礮臺三處轟斃約數十名參將安勇砍斷
攔河鐵練三條陳國泰亦分駕礮船駛下偏近
瓜州施放大礮將南面沿江土城擊缺一處至
未刻風色不利始行退出臣等查是日四面環
攻原期漸逼賊巢即可前進今填河搭橋毀其

集賢堂
卷一百四
三三
近卡礮臺斷其橫河鐵練當無阻隔祇以風力
漸微我師一時未能得手擬仍會商夾攻水陸
大舉冀得仰賴

天威一鼓而下奏八

上命軍機大臣傳諭托明阿陳金綬雷以誠曰瓜州濱
臨江岸必須水陸同時進攻使該逆四面受敵始可
乘勢力破賊巢此次陸路官兵已獲勝仗而陳國泰

所駕礮船僅擊缺沿江土城一處旋卽退出所稱風色不利殊難憑信水師疲玩積習最堪痛恨著托明阿等嚴飭水陸各將弁務當乘此聲威同時並進剋期收復瓜州儻此進彼退不能互相接應查明何路延緩卽將何路貽誤之員嚴叅懲辦逆匪屢被攻勦難保不計窮思竄著該大臣等一面迅速進攻一面嚴防該逆分竄之路總期一鼓殲除毋令再滋延蔓

十五日辛亥勝保德勒克色楞善祿崇恩奏言查

高唐城高本有二丈三四尺臣前將大礮向東

北面城垣日夜轟擊現已轟塌數尺寬至二三

丈賊見城被擊壞急用木板遮護囊土修補我

兵用槍礮齊擊傷賊甚多現已挑選兵勇一有

罅隙卽當督兵破入初九初十等日於東南偏

近處所築就三營派撥兵勇防守十一日臣復

令於城南正對南關處紮營絕其竄路南經空
濠城上密放槍礮不能興作臣令將隊伍復至
關廂誘令出巢賊果突出二百餘人李開芳親
自率領撲出南關山東官兵開槍迎擊死拒不
退臣親督天津正定官兵馳往督戰賊見我兵
勢猛卽退伏於敗屋牆內於牆孔內密放擡槍
臣揮兵勇冒死撲至屋垣之下拋入火彈將賊

火藥焚燒斃賊多名該逆皆楚粵老賊拌命死
拒臣復令將銅礮洋礮調至切近處所向賊衆
連環轟擊放火焚燒敗屋賊卽退入城內臣嚴
督兵勇追殺直抵城下城上槍礮如雨以致兵
勇傷亡二十餘名現在東南營壘業已築成西
南亦卽趕緊興築以資控扼但現有兵勇實屬
不敷分撥連鎮所留步隊攻勦喫緊又未便續

調前來不得已與臣崇恩熟商就近抽調臨清
德州防兵四百名迅速來營以資分撥圍剿奏
入

上命軍機大臣傳諭勝保德勒克色楞善祿崇恩曰覽
奏雖小有接仗斃賊無多我兵復有傷亡未能得手
該大臣布置數月之久乃自今日始知賊情必思南
竄甫爲窆濠之計而於南關外居民牆垣竟未能及

早拆毀所築營壘又未能一律趕緊辦齊復曉曉以步隊不足爲詞殊不可解用兵貴兼謀勇豈能專借兵力古人以少擊衆在乎審機神速切忌遲疑該大臣前次造雲梯呂公車築臺鑄礮輾轉因循徒延時日卽以兵力而論豈有鉅萬兵勇不能舉此孤城而令千餘逆匪得以負嵎堅拒之理明知連鎮官兵不能再分便不必宛轉解說妄冀添調豈將以遲延之

咎欲令連鎮大營分謗耶著勝保與德勒克色楞善
祿崇恩勦力同心剋期收復州城盡殲醜類毋得再
令竄逸若再耽延貽誤國法具在不能以該大臣曾
有微勞曲爲寬宥也

同日塔齊布曾國藩奏言逆匪竄回武昌後臣
等本欲乘勝東下直擣武漢旣而再四熟商陸
路之賊尙有崇陽大股數逾二萬卽自岳竄出

者分匿於臨蒲咸嘉等縣山僻之處亦恃崇陽
爲巢穴若不先勦崇邑大股而遽下武昌恐後
路牽掣餉道中梗終非萬全之策水路則東有
倒口陸溪口黃蓋大冶密泉等湖西有襄河上
通洪湖朱耳湖下通沌口漢口若非節節搜勦
則恐藏匿小舟抄襲後路亦非慎重之道是以
審度定計陸路則臣塔齊布親往崇陽進勦水

路則臣國藩步步移營徧搜支湖小河然後扼
險要以蹙之閏七月初十日探明黃蓋湖內之
新店尙存賊船數十號有賊千餘人遊擊楊載
福等親駕長龍三板由倒口入湖初更時行至
芭茅湖距新店三里許楊載福等將長龍船盡
紮湖濱各坐三板駛進突放槍礮該逆猝出不
意轟斃溺斃者無數餘皆上岸狂奔楊載福首

衝賊隊被賊回擲火包舟覆落水旋即躍上守
備蕭捷三坐船大呼突陣將賊船四十餘隻登
時燒盡並將芑茅湖山後賊船及沅潭市聶家
市各船燒燬一空黃蓋湖等路亦搜捕無遺直
抵嘉魚縣城副哨官馮登等會同官文派到兵
勇合剿附城大股該逆竄入崇陽知縣孫守信
等入城安撫居民各營水師始行收隊回紮新

隄老營東岸搜勦已徧乃遣嚮導官何南青搜
查西岸裏河一律肅清於是水師乘勝直下金
口扼據要隘距武昌僅六十里矣金口之東有
淮山西有大軍山小軍山兩岸對峙關鎖謹嚴
爲水路必爭之地該逆不虞我軍猝至乃乘我
大隊未齊水陸兩路來犯蕭捷三等嚴陣以待
各哨官分駕三板往西岸大軍山下遏賊上竄

陸賊千餘人先由淮山越嶺而來直入金口市
冀誘我軍登岸而以小艇突入奪我戰船隨有
賊舟百餘號分兩翼來抄我軍亦分兩路迎擊
將該逆快船轟壞並擊沈小船二十餘隻水賊
始行敗走陸賊亦敗北回竄此搜剿湖匪及金
口水師大勝之實在情形也 臣塔齊布既定親
剿崇陽之策知崇陽臨蒲三縣以羊樓洞爲總

隘必紮老營於此然後可以四面策應遂督率
各營馳赴羊樓知府羅澤南率湘勇千人先行
十七日宿長安驛十八日賊千餘人乘我不備
分四路撲營羅澤南令湘勇誘賊近營突出抄
尾賊衆大潰次日進紮羊樓洞各營次第皆到
四川臬司胡林翼亦自常澧帶勇來會臣塔齊
布探明附近羊樓洞山崖險峻爲赴崇第一關

隘遂派羅澤南於二十三日出隊進剿該匪於
洞尾盧家橋紮立大營中跨溪水攔截隘口我
師直抵賊穴踰溝冒刃踏破賊營墮岸死者甚
多盧家橋之卡旣破賊衆悉銳踞守佛嶺佛嶺
兩山高峻羊腸一縷尤爲險絕二十四日羅澤
南等督勇由佛嶺之東西北三面分路直攻賊
巢攀巖踰嶺冒險而進賊衆大潰我兵追奔十

五里至雙港口止二日之內東西兩卡皆破崇陽首逆僞總制廖敬瞬探知我兵大隊未進在羊樓洞者不及千人乃自崇城調賊三千餘名前來二十六日猝至羊樓洞尾四面環攻羅澤南率勇迎勦振鼓馳突賊勢瓦解我軍中路之兵乘勝擁上山岡追至盧家橋約七里許殺賊二百餘名蕭啟江追右路之賊圍入石山內殺

賊百餘名餘賊竄匿墮崖死者無算此陸兵連
破賊卡及羊樓大獲勝仗之實在情形也有此
數戰崇陽股匪業已膽寒臣塔齊布現統大隊
進攻臣國藩現駐嘉魚即日馳赴金口一俟崇
陽股匪勦畢卽當水陸並進直擣武昌探明武
漢賊黨不過二萬餘人自岳州大敗人有離心
臣等宣布告示解散脅從自賊營薙髮逃出者

幾四千人又北路有署督臣楊需之兵西岸有
魁玉楊昌泗之師聲威大有可恃然臣等仍當
慎之又慎不敢萌驕矜之志不敢貪急遽之功
以期仰慰

聖懷於萬一奏入

上諭曰此時非徒知謹慎所能了事汝等自湘潭大捷
後屢次得手有此聲威豈可自餒惟利在速戰莫待

兩下相持師勞餉乏塔齊布不致爲崇陽一股牽掣
方好

十七日癸丑向榮奏言江甯將軍蘇布通阿昨因

七橋甕營盤督戰突被火藥燒傷兩旬以來設
法救治無如火傷甚重熱毒內攻竟於八月初
八日出缺該將軍秉性忠誠才識歷練自到營
後每戰必奮勇當先大小接仗一百數十次斬

揜無算茲以傷重捐軀實堪憫惻合無仰懇

天恩俯准照陣亡例從優賜卹以慰忠魂奏入

上諭內閣曰江甯將軍蘇布通阿統帶四川官兵協同
向榮勦賊自抵軍營以來每遇接仗奮勇當先朕心
正深嘉獎前因七橋壘督戰禦賊身受重傷諭令安
心調理方冀速痊藉資倚畀茲聞因傷溘逝悼惜殊
深蘇布通阿著照將軍陣亡例從優賜卹任內一切

處分悉予開復應得卹典該衙門察例具奏伊子榮
昌榮恩榮麟均著俟百日孝滿後由該旗帶領引見
用示朕篤念蓋臣至意

欽定勦平粵匪方略卷一百五 甲寅年

八月十八日甲寅向榮奏言該逆自七月下旬以

來疊被官兵痛剿拏獲賊目及城中逃出難民
僉稱陸路賊匪四旬之中先後殲斃已不下三
萬人精悍賊黨殲除殆盡現在城內之賊均經
膽落已往調賊渠章俊羅大綱聚集湖北安徽
水陸各賊來此與官軍決戰如其不勝別圖竄

擾之計各等語 臣探得上方橋西各營該逆均已加高壁壘開挖濠塹並不出戰顯有固守待援之意自橋東兩營被我軍奪據後該逆始不敢渡河而東惟是橋西賊營均與城近而雨花臺賊營又可就近馳救必先斷其應援而後可攻其營壘我軍始不致腹背受敵 臣密飭總兵明安泰等帶領兵勇於八月初四日進剿該逆

瞭見我兵伏匿不出僅於穴中施放槍礮相持
約一時許遙見通濟門出賊三千餘人意欲要
我歸路明安泰督同張國樑以兵勇一半攻營
一半回拒正酣戰間張國樑奮入賊隊遊擊王
浚催兵繼進逆勢不能抵敵均向通濟門敗走
我兵跟蹤追勦雨花臺內之賊約千餘人又來
包抄亦被我伏兵全數截住賊衆大潰各營之

賊一意堅守始終不敢出營接仗臣又訪得太平門外時有奸民貪利與賊貿易因又密派守備李定太蔣錫光帶兵五百名馳往截拏先將長髮賊拏獲二十餘人殺斃三十餘人餘皆向城逃回遂將該處買賣街焚燬拏獲貿易數十人分別懲處伏念臣自上年二月抵金陵後該逆每戰輒敗輒固守以老我之師匱我之餉彼

轉得分其兇黨四出攻擾使我兵力處處爲其牽綴自江路斷絕以後太平資糧又被焚燬聞其火藥尤少該逆大困不得不盡力與我相抗此間七月望後所以悉其醜類屢次殊死戰爭也惟是水師紅單僅二十五隻拖船亦祇六隻奉

旨調撥下游陳國泰紅單或十號或十五號現在未能

前來而上游楚皖賊船蟻聚蕪湖江南及兩梁
山者不下數千將來愈集愈多萬一師船上攻
不能迅掃一空而我礮火或有不繼賊船順流
乘風而下一經退守勢難再上未免前功盡棄
實屬萬分可虞至於浦口一路該逆在彼紮營
與九洑洲賊營聲息相通必須先將此處賊營
攻燬始可杜其北竄惟須下游水師會勦方能

有濟臣已疊次嚴飭總兵武慶李德麟等水陸
會籌亟圖掃蕩所慮吳全美師船已單儻再回
攻浦口賊船乘虛而下復與金陵陸路相通事
機一失尤爲可慮此不能不專望於江北水陸
各營也此時已將水路接濟斷絕再將陸路設
法嚴斷該逆萬難久延必將悉其逆黨與我力

戰臣仰秉

廟謨儻能再獲大勝則辦理更有把握而廓清有期矣
向榮又奏言 臣查該逆於前月上旬竄擾九洑
洲一帶其地距浦口甚近距武慶營盤與周希
濂艇船均不過數里當時並不實力攻勦任賊
從容紮營不知是何居心 臣前奉

旨分提各船原以扼勦金陵上游今紅單連破賊船不
下千號業已扼駐采石磯截斷江面水路極爲

得手無如東西兩梁山陸續駛回賊船已有二
千餘隻皖楚大幫又將趕回蕪湖嘯聚日多太
平尙無兵駐守紅單中流砥柱喫緊萬分若使
調回攻勦不特將來上攻匪易賊船順流直下
又將蟻聚金陵使陸路之賊困而復蘇水路之
舟絕而復續萬一連檣北渡浦口勢益可虞或
再下竄瓜州則我船更應接不暇矣臣愚以爲

集賢堂卷之三
三
賊之竄擾浦口江面者跡雖北窺實欲牽掣我師之後若紅單堵住上游使賊船無路下駛我得節節布置水陸會兵由太平以至蕪湖逐漸扼勦而上賊船雖衆亦可漸次掃除前奉

旨添調陳國泰之船旣因瓜州攻勦喫緊不能前來吳全美祇有二十五船葉常春之船又未趕到其勢已孤若一經奉調回勦帶兵官有辭可藉正

可乘此折回大局一壞實屬不堪設想所有浦
口九洲賊營武慶旣奮勇由北岸進剿李德
麟有船一十九隻豈尙不足圍攻縷計下游戰
船除陳國泰所領二十五隻之外尙有周士法
陳世忠分帶各項艇船亦不下數十隻現又造
有多槳快船以之進攻洲城賊巢較紅單尤爲
便捷誠如

聖諭所云卽或李德麟各船未能得手亦可就近將周士法陳世忠之船分撥協勦不必專調吳全美紅單駛回以致顧此失彼掣動大局奏入

上命軍機大臣傳諭托明阿向榮陳金綬雷以誠曰金陵逆匪自七月下旬疊被官兵痛勦此次上方橋賊營復經向榮撥派兵勇攻勦獲勝現在紅單船扼駐采石磯截斷江面水路極爲得手惟東西梁山賊船

陸續駛回已有二千餘隻皖楚大幫又將趕回蕪湖
太平現尙無兵駐守金陵上游爲逆賊所必爭吳全
美紅單船僅二十五隻葉常春師船尙未趕到該大
臣奏稱若調回攻勦不特將來上攻非易賊船順流
直下又將蟻聚金陵萬一北渡浦口更屬可虞所慮
情形甚屬周密以現在而論自應多撥船隻扼住上
游使賊船不能下駛爲最要機宜著托明阿等仍遵

前旨於陳國泰所帶船內分撥十隻或十五隻溯流而上與吳全美師船合力堵剿至九洲地方賊營距浦口甚近陸路有武慶營盤水路有周希濂艇船皆去賊營不遠何以任其從容布置於前又不能奮力攻剿於後所有浦口洲地賊營著卽責成武慶由北岸進剿李德麟現有船十九隻足敷圍攻著托明阿等卽嚴飭該員等迅速攻燬儻仍前怠玩不知奮

勉卽從嚴叅辦至下游紅單拖罾廣艇等船共有八九十隻又有新造多槳快船如李德麟各船不能得力並可就近將周士法陳世忠之船分撥協勦托明阿現已馳抵軍營著卽統籌全局與向榮和衷商辦毋得稍分畛域奸民接濟賊營火藥必應嚴行禁絕前已諭知陳金綬雷以誠著托明阿向榮嚴飭各營並地方文武明查暗訪一體搜拏毋稍疏懈

同日駱秉章奏言官軍進逼通城立營城外該
匪負嵎抗拒於六月十七日分股前撲營盤訓
導江忠淑等分隊抵禦勇目鄢世堂唐遠祚等
首先陷陣斃賊數十名賊卽敗卻回城守備徐
統緒乘勝追勦逼近濠內伏賊突出徐統緒被
賊矛攢傷殞命署千總楊文元署把總王金福
署外委楊登岸向前救護同時陣亡賊仍收隊

入城不出十九日賊復分路來撲當被兵勇擊
退殺賊四十餘名生擒十一名七月初四日賊
復分數路前來撲營並潛分一路抄出營後江
忠淑等及平江團紳督勇分路抵禦先將營後
一股擊敗合力痛勦轟斃賊匪三百餘名初十
日官軍分路攻撲城垣賊匪亦分路來撲楚勇
及平江各勇分路抄截斃賊四百餘名內有執

大黃旗賊目四名十八十九二十二二十一連日
鏖戰復斃賊七百餘名二十九日賊匪大隊齊
出江忠淑等督勇嚴陣以待候其撲近槍礮齊
施斃賊約二百餘名奇兵從後抄出又斃賊百
餘名賊陣大亂陣斬僞軍帥蔡姓逆目廖四廖
六等閏七月初七日夜賊忽開城由北路潛遁
江忠淑等偵知派勇四路截擊斃賊三百餘名

奪門直入復斃賊百餘名生擒八十餘名奪獲
旗幟器械多件此克復通城之實在情形也現
在通城股匪倏分倏合者尙有數起人數約二
千有餘亟應次第剿滅免滋後患陣亡之守備
徐統緒等應請

旨交部分別議卹奏入

上諭內閣曰賊匪竄踞通城屢被官兵攻剿殲斃多名

閏七月初七日夜賊匪潛開城門由北路逃竄江忠
淑等偵知帶勇四路截擊斃賊三百餘名奪門直入
立將縣城克復現在通城餘匪尙未淨盡著該撫督
飭兵勇迅速搜捕務當盡數殲除毋留餘孽所有在
事出力各紳勇著查明酌保陣亡之守備徐統緒著
交部從優議卹署千總楊文元署把總王金福署外
委楊登岸同時被害均著交部照署任議卹

二十二日戊午袁甲三奏言據江浦等處節次來

稟該逆於江浦下新灘等處添設二營並踏平
蘆葦通路三條圖踞浦城以通和州烏江一帶
又分水陸兩路竄擾和州於和城外江口之鍼
魚嘴添築濠塹又有賊船二三百隻停泊烏江
登陸者四五千入四出擄掠直至和州北鄉之
濮家集距全椒南界河岸僅十餘里查全椒爲

北路門戶儻有疏虞則滁鳳一帶全行震動此時雷以誠奉

旨留揚和含一路前經和春福濟等飭派署臬司恩錫馳赴該處扼要堵截曾否到彼尙無確信臣已派參將吉連帶兵五百名前往關山一帶擇要堵禦並令廬鳳道張光第帶兵三百名赴滁和各路鼓勵團練以助聲援至臣前擬偏師繞赴

南路攻復各城等情應俟東南賊勢稍定再當酌量前往總期防剿兼籌斷不敢顧此失彼奏
入

上諭曰所擬亦是現已有旨令雷以誠迅赴和含以後情形汝自斟酌略遲亦可

同日和春福濟奏言查江面師船屢獲大勝賊勢頗蹙游弋甚難南則軼入徽州甯國北則軼

入江浦和州築壘浚濠意存持久茲據全椒縣
知縣陳麒昌稟稱賊於八月初七日水陸並進
擾踞和州又於鍼魚嘴挑築濠塹賊船愈聚愈
多皆自上游駛下初九日又有賊船三百隻停
泊烏江登岸者四千人四出抄掠直抵全椒
南境等語伏思和州爲廬營東障而全椒爲東
來餉道所必經若有疏虞則北震滁定西擾廬

營防勦之師刻不可緩臣等卽飭署臬司恩錫
統帶熱河兵四百名東河標兵三百名壽州營
兵三百名廬州營兵一百名馳赴全椒相機防
勦並飛咨揚營速撥兵勇委果敢之將帶至江
浦聯絡聲勢應援協防以絕北岸賊蹤而扼臨
淮前路此時托明阿已抵揚州接辦軍務仰懇
天恩仍飭雷以誠統帶兵勇一千名馳赴和州扼守烏

江則兵力較厚可以遏北竄而制西侵俾臣等
併力攻廬而袁甲三亦得統師南進數道並攻
庶勦辦易於得手奏八

上命軍機大臣傳諭和春福濟曰和州爲廬營東障而
全椒爲餉道所經設有疏虞則滁定一帶全行震動
於江北大局關繫匪輕必須亟籌防勦已有旨諭令
雷以誠馳赴和州相機進勦其能帶兵若干尙難豫

定已令托明阿酌量情形辦理該提督等卽迅飭署
臬司恩錫統帶熱河等處官兵前往全椒力遏賊衝
毋稍延誤袁甲三因北路緊要仍駐臨淮現派參將
吉連帶兵前往關山擇要堵禦並令廬鳳道張光第
帶兵赴滁和各路鼓勵團練亦可與恩錫聲勢聯絡
互相援應該提督等務隨時知照袁甲三防剿兼籌
以遏逆匪北竄之路

上又命軍機大臣傳諭托明阿陳金綬雷以誠曰現在和州情形益形喫重堵剿之師刻不可緩雖有恩錫統兵前往恐攻剿尙難得力此時托明阿已抵揚州瓜州軍務自可督同陳金綬等妥籌辦理著雷以誠於接奉此旨後酌帶兵勇卽日馳赴和州扼要駐紮如瓜州軍營兵勇不敷分撥卽將恩錫帶往之兵歸雷以誠調遣擇要布置務須悉力剿除毋任肆擾至

江浦地方爲南北咽喉若水陸兵勇協力同心及早
攻剿何至任賊上竄以致重擾和州該大臣等務當
懍遵疊次諭旨迅將九洑洲等處賊營剋期攻燬並
督飭武慶等嚴密防守不得再有疏虞

上又命軍機大臣傳諭裕瑞駱秉章曰自逆賊竄踞金
陵分擾揚鎮繼復攻陷安慶廬州等處蹂躪再及武
漢長江之險半爲賊占皆由我軍僅能扼截陸路而

水師戰船不敷堵剿以致賊匪橫行江面恣其奔突
近來紅單艇曾各船漸集瓜州等處卽獲勝仗向榮
所派之兵亦收復太平進剿至采石磯以下湖南曾
國藩統帶兵船現已沿江東下直抵金口距武昌僅
六十里是剿賊兼賴水軍已有明驗惟近日逆賊竄
近江西並恐另股由池州甯國進犯徽州窺伺浙境
武漢以下金陵以上如安慶九江等處居中扼要之

地尙無戰艦阻當應廣籌製造四川地方完善多產
材木購料興工較爲便易著裕瑞督飭湖北藩司夏
廷樾辦理戰船以資攻勦或在川購造或但購材木
籌撥銀兩帶赴湖南製造與駱秉章迅速商辦前據
駱秉章奏該員已由辰沅赴川此項戰船如由川之
涪江取徑辰沅勢在曾國藩之後若由夔巫上游徑
赴荆江直逼漢水當可與曾國藩會合俟江漢道通

皇朝通志卷一百三
卽可節節攻剿截斷安慶九江兩路賊船著裕瑞與
夏廷樾悉心籌議將如何辦理之處迅速具奏至湖
南應備船礮前經紳士丁善慶等設局捐辦著卽趕
緊添造多多益善駱秉章務飭該紳士等分投勸捐
庶可多修戰艦肅清江面

上又命軍機大臣傳諭陳啟邁曰現在逆賊竄擾沿江
各處吳全美師船已進徧東西梁山其瓜州至焦山

一帶有紅單拖罾廣艇各船上下橫截曾國藩水師亦駛至嘉魚金口等處不日克復武漢江路已頗得手惟自安慶至九江中間扼要之區尙無師船攔阻致賊黨得以任意往來江西前造戰船近日能否駛至九江以資攻剿該省素產材木並著陳啟邁督飭所屬購料加造若干隻派幹員管帶出江與上下游戰船互相策應爲掃盪賊氛肅清江面之計卽如吳

城等處賊船已被勦敗退因我軍缺少船隻故未能窮追可見水陸兩途必當兼備著陳啟邁趕緊設法竭力籌辦

二十四日庚申陳啟邁奏言武甯餘匪復邀興國

匪黨千餘由瑞昌邊界至武甯之箬溪地方分水陸兩路於閏七月二十四日竄至建昌涂家埠時值續調之署千總哈玉麟帶領章武軍練

勇三百名進剿適至該處卽會同建昌縣知縣
景瑞迎頭堵剿該匪旋向德安竄去稟請撥兵
剿捕並據已革總兵趙如勝稟報現有逆船四
五百號馳入南康府屬湖南灣泊各等情臣查
湖北興國大股逆匪先擾武甯繼竄義甯因被
該州兵勇鄉團屢次擊敗復與興國逆黨竄擾
建昌德安地方亟應調撥兵勇圍攻隨卽飛飭

署遊擊景星統帶各路兵勇折回建昌並由省
派撥練勇五百名馳赴建昌德安兩路夾擊一
面飛咨署九江鎮總兵羅玉斌扼要堵截所有
附近之靖安奉新安義等縣亦令該地方文武
調集鄉團協同防範俾免闖入爲害其吳錫光
所帶靖勇現在飭催迅將桃樹坳一帶匪徒勦
辦事竣從義甯東路徑趨武甯遊擊景星兵勇

俟建昌德安匪徒擒捕淨盡兼程赴武實力搜
勦並令趙如勝等督率戰船水勇嚴密籌防以
杜匪艇上竄之路惟聞湖南水陸各軍業已進
紮螺山勦敗餘匪大半偪入江境以致義武兩
路日見緊急其下游東西梁山又經紅單船攔
截江面逆艘不能竟達金陵停泊安慶船隻無
數亦有回竄江右之謠是此時江省情形最爲

欽重 臣惟有激勵士卒將內竄寇氛次第蕩平
再以全力嚴守水陸要隘用固藩籬俟湖南舟
師東下卽撥戰船出湖會勦以靖江面奏入

上命軍機大臣傳諭陳啟邁曰義甯敗竄餘匪復由楚
北勾結逆黨於瑞昌武甯一路竄擾建昌德安經陳
啟邁添調兵勇馳往夾擊自應嚴飭該帶兵員弁趕
緊進攻先將此股匪黨悉數掃除卽可與吳錫光所

帶靖勇會勦武甯之匪該撫所籌布置各情卽著照
議相機妥辦惟水陸兩路面面空虛皖楚逆蹤誠不
免伺隙奔突節次諭令該撫多備師船出江扼截以
顧全局若待湖南舟師東下始行出湖協勦未免迂
緩卽新募水勇未諳紀律亦應卽速訓練遴委水師
員弁剋日管帶出江俾資截勦斷不准屢以餉需支
絀藉口遷延

二十五日辛酉楊需奏言八月十六日探報賊匪

由白水湖駛入野豬湖至三叉埠賊衆二三千
人登岸焚燒民房當卽派兵迎擊該匪望風竄
退避匿湖中十七日賊分東西南三路撲營約
六七千人當派兵勇分路迎敵東路賊衆直前
攻撲臣親自督戰河州都司平德督兵施放連
環槍礮轟斃賊匪數十名賊始稍退南路爲伏

勇所擊劉富成兵勇又從後抄至賊匪三面受敵我軍合圍追殺二十餘里直抵野豬湖邊賊衆紛竄入船乘風開駛計各路兵勇先後殺賊五百餘名生擒二十九名偪入湖中撲水淹斃者無算惟賊船尙匿湖中未能卽時掃蕩仍當設法趕緊辦理本日接據探報漢川賊匪由涓口駛入湖中已飭遊擊趙鴻舉等加意防堵毋

令竄入德安府河並再派兵前往接應現在賊
勢全夥北趨漢川黃陂一帶水陸屯聚窺伺衝
突連日探報武昌漢陽賊衆無多現已飛飭魁
玉楊昌泗會同升用道李孟羣等乘此武漢空
虛速行攻復臣嚴堵北竄一面趕辦船隻設法
勦辦

楊需又奏言京山逆匪抗踞佛祖山其地山深

路隘我軍道路不熟未敢深入適有被脅之田
三盛卽田連升率百餘被脅之民投誠因卽令
爲嚮導繞道由古樹嶺進攻八月初一日黎明
行至太和集賊匪率衆來拒都司劉富成揮兵
縱擊賊匪敗退追至佛祖山踏入賊巢斬賊三
百餘名初二日追至蘇家湖邊該逆因無船難
渡折回死鬪我兵痛加勦洗又斬五百餘名餘

衆盡撲湖中淹斃初四日復督兵勇搜捕四路
餘匪剷除淨盡其賊首孔昭溶卽孔洛三劉花
子白方氏卽白娘子均已伏誅京山境內肅清
天門匪亦無多初八日接李孟羣來稟該道督
帶湖南水師船隻已於二十七日行抵金口接
仗獲勝塔齊布陸路之師尙攻勦崇陽咸甯未
下臣飛飭該道卽會同魁玉楊昌泗進攻武昌

一面催備船隻渡湖前進旋據探報賊復屯聚漢川縣城及繫馬口等處並有賊船數百窺伺涇口一帶地方臣恐其竄入涇口飛飭長江埠兵勇加意嚴防將進攻蔡店之勇暫行停止以防涇口並飛咨官文將四川練丁一千名就近飭赴岳家口一帶接應堵剿飭沔陽州蕭蔭恩同知林天直督帶練勇馳赴仙桃鎮一帶會合

川陝各兵相機進取賊匪以南師日偏全力北趨不得不嚴爲防備稍事持重臣現派兵設法趕將湖中賊船焚燒擊毀然後可以放心前進奏入

上命軍機大臣傳諭官文楊霈曰此次逆匪分撲楊店營盤經楊霈督率弁兵勦擊大獲勝仗我軍追殺直抵野豬湖邊賊船現匿湖中漢川之賊亦由涇口入

湖該署督現飭遊擊趙鴻舉等加意嚴防並派兵接
應著卽嚴飭該員等實力防剿毋令竄入德安府河
致滋延蔓前經疊次諭令楊需迅速進兵克復武漢
現據奏稱賊勢全夥北趨於漢川黃陂一帶水陸屯
聚武漢之賊已爲數無多自因上游剿辦得手故該
逆鋌而走險意圖北竄爲牽掣我兵南下之詭計楊
需此時自應權其緩急先將北路布置周密然後節

節進攻固不可遷延觀望坐失事機亦不可深入重地致該逆乘虛北竄方爲妥善其武漢之賊本日已諭令塔齊布曾國藩水陸並進迅圖克復該署督亦卽嚴飭魁玉楊昌泗會同李孟羣合力夾擊如能克復武漢則賊巢已破勦辦自易得手其湖中賊船務當趕緊設法全數燒燬毋令久踞荊州現在防堵情形較緩楊需所帶兵勇尙形單弱所有前留荊州之

四川練丁一千一百餘名著官文儘數撥調速赴楊
需大營再留荆之防兵能否抽撥助剿並著官文酌
量選派以資剿辦

上又命軍機大臣傳諭塔齊布曾國藩曰前據塔齊布
等奏羊樓洞剿賊大獲勝仗並曾國藩搜捕湖河進
駐嘉魚擬赴金口會剿各情形當經批令速戰勿令
塔齊布一軍爲崇陽所牽掣原以逆賊恃武漢爲老

巢若能急破其窟穴則漢江以下餘匪自可迎刃而解本日據楊需奏京山賊黨已被大軍勦滅惟由白水湖竄駛野豬湖之賊竟於八月十七日分三路攻撲楊店營盤經官兵迎敵擊退賊船伏匿湖中並據探報漢川逆衆有從潰口入湖消息大抵楚省賊情南擊則北竄鋌險狂奔是其慣技朕思崇陽一股經普承堯羅澤南等攻破賊卡後計已膽寒惟曾國藩

必俟此股蕨事方攻武漢兩下相持若逆匪另行詭
謀則全勢北趨恐楊需兵勇過單未能遏其兇燄而
曾國藩所帶均係師船水戰有餘陸攻不足務須與
塔齊布妥籌兼顧水陸並進爲克復武漢之計該提
督是否能親來督勦或抽派陸路得力將弁與曾國
藩會合之處均著迅速商辦總以擣穴揜渠不被牽
掣爲要李孟羣已抵金口魁玉楊昌泗亦前往武昌

皇朝通志卷一百三十三
三六
亟當乘此聲威各路並舉諒塔齊布曾國藩接奉此旨必能趕緊進兵勿但專顧一隅也

上又命軍機大臣傳諭英桂曰湖北賊匪自我兵克復安陸府城後竄回京山本月初閒經楊需督飭官兵全行殄滅京山境內肅清天門餘匪亦已無多現由漢川一帶進剿湖南水師行抵金口接仗獲勝距武昌省城僅數十里計日即可與北師會合攻克武漢

所辦尙爲得手惟是賊以南師日偪勢必全力北趨
亡命鋌走亟應嚴爲防備且漢川之賊又已竄入涇
口窺伺之意顯然漢川黃陂一帶路徑紛歧賊匪均
可竄逸北窺信陽等處楚豫界連防守尤關緊要英
桂現駐信陽疊據奏稱飭派兵勇在各邊境嚴密布
置著卽於信陽武勝等關加意嚴防毋許稍涉疏虞
至楚省情形仍應隨時偵探與楊需聯絡聲勢隨時

戒備豫爲併力堵剿之計

二十七日癸亥勝保德勒克色楞善祿崇恩奏言

高唐州城勢已垂破臣連日加緊圍攻晝夜用
大礮轟擊城垣坍塌日甚而賊守愈嚴並乘夜
於缺口暗用土袋樹枝修補臣因於礮臺以前
加築馬道以便乘機填濠入城二十日夜親督
夫役前往興修賊於二十一日夜由城濠突出

百餘人連拋火彈火罐直衝馬道天津山東兩翼步隊官兵分抄前進將賊擊退次日二更後逆衆潛出分路撲我新營勢甚兇很幸新募川勇及天津官兵冒死迎敵一時之久逆賊死傷甚多始行退散回至城下新築馬道之地欲行平毀甫經近前地雷炸礮同時觸機轟發伏兵乘勢壓下隨路勦殺傷斃約百餘人二十三日

集賢堂大略卷一百三
三十一
賊由東門撲出又分股撲出南關意欲衝突奪
路而逃亦經我兵擊回統計兩日之內斃賊一
百數十名然皆楚粵老賊多殺一賊城卽易破
一日臣等惟有乘此聲威竭力設法進攻總期
數日之間力圖克復早慰

聖心奏入

上命軍機大臣傳諭勝保德勒克色楞善祿崇恩曰勝

保圍攻此城已歷數月之久此次殲斃之賊不過百數十名而我兵亦有傷亡竟不能以智謀取勝現既據稱機有可乘期於數日之間力圖克復該大臣自係確有把握儻令垂斃之賊伺隙他竄或仍留一路任其奔突又煩追剿勢必蔓延他處何時方能淨盡此時賊勢自非從前臨清烏合之衆可比彼時來之甚速故驅之甚易今則負隅日久必用全力以制之

集賢堂卷一百三
該大臣惟當妥籌就地剿除之法迅將此股逆眾聚
而殲旃庶可以功補過著卽與德勒克色楞等乘此
聲勢激勵各營將弁倍加奮勇剋日攻復朕惟盼捷
音之速至也

二十九日 乙丑 楊需奏言八月二十四日據遊擊

趙鴻舉軍功李玉田等稟報賊船四五百隻駛
至劉家隔地方上竄趙鴻舉等督帶兵勇迎至

道人橋分三路勦擊殺斃賊匪二千餘人生擒
賊目十七名燒燬賊船三百餘隻奪獲賊船六
十餘隻餘匪散竄又據蘄水縣際亨稟報八月
初三日帶羅田縣練勇二千名收復蘄水廣濟
二縣城池擒斬賊匪四百餘名又據羅田縣彭
仲芳稟報派勇會同安徽英山縣收復城池勦
滅賊匪又委員楊先澍率敢死士五十餘人潛

近野豬湖賊船拋擲火罐李殿善由東岸施放
火箭焚燒賊艦數隻賊衆驚覺四散二十一日
賊匪於湖口泊船設卡楊先澍於二更後帶勇
改裝潛至附近湖邊之村莊見賊船五十餘隻
灣泊湖岸有長髮賊匪數十人分踞村內民房
楊先澍卽帶勇突出圍房縱火將民房焚燒並
將船隻燒燬斃匪四五百人本日據千總楊世

澤等稟報在羅漢寺塘步等處乘夜襲擊賊匪
斬殺一百餘名生擒三十餘名追逐三十餘里
至大湖嘴地方撲水淹斃者無數又據潛江縣
龔煥枝稟報探聞漢川縣繫馬口賊匪經沔陽
州鄉勇勦擊獲勝又接曾國藩來咨於初八初
十十二等日水陸進攻連獲勝仗定於十七十
八十九二十等日直擣武昌臣當卽飛咨以賊

匪大股在北必可乘虛攻復並飛飭魁玉楊昌
泗迅卽進攻漢陽二十二三兩日東南礮聲竟
日不絕夜半見有火光必已得手惟漢川黃陂
一帶地方賊衆尙有萬人一經武漢收復必尙
有北竄之賊臣一面飛遣偵探一面飛飭參將
常德相機堵剿漢川之賊飭趙鴻舉李玉田嚴
防長江埠縣丞王國楨軍功王瑞山丁心田堵

勦新溝一帶佈克慎帶兵進駐澠口桂明分兵
進駐馬溪河劉富成駐紮孝感楊世澤等駐紮
黃陂以遏四竄之賊又飭黃州府許賡藻於黃
岡麻城等縣督帶鄉勇嚴行堵勦乘勢收復黃
州府城派兵扼守以冀一氣掃除勿使稍有竄
逸正繕摺間據職員楊衍桐遣報二十二日南
北省官兵水陸進攻漢陽當卽帶同商民等數

千人接應賊衆驚散卽日克復漢陽漢口二十三日克復武昌省城賊匪分路逃竄約計尙有萬餘人各等語理合先行奏陳以慰

聖懷奏入

上命軍機大臣傳諭楊需曰我兵自勦滅京山賊匪以後卽將蘄水廣濟羅田等縣被賊占踞各城先後攻克現聞漢陽漢口武昌均經克復惟未將攻勦情形

詳細敘及究係何路官兵攻克何處曾國藩等所帶
兵船是否與陸兵同時並進得以迅速奏功據稱潰
逃餘匪尙有萬餘現向何路奔竄亦未詳晰聲敘逆
匪既有四散之勢卽須籌分路追剿並杜其北竄之
計雖漢川之賊有常德堵剿長江埠新溝一帶有趙
鴻舉王國楨等防堵該署督又已分飭佈克慎進紮
澗口桂明分駐馬溪河劉富成往紮孝感楊世澤等

往紮黃陂布置尙屬周妥而黃州郡城久爲賊踞許
賡藻所帶僅係鄉勇未必可恃以收復楊霽卽可調
得勝之師前往黃州一路相機勦辦該處距孝感黃
陂等處不遠卽佈克慎桂明劉富成等四路截勦之
師均可就近扼擊該署督統領全軍務當通籌大局
將楚北餘匪悉數掃除其武漢江面應否酌留水師
扼守之處並著與曾國藩等酌議布置並將攻克武

漢情形迅速馳奏至九江安慶尙爲賊匪淵藪已諭
令和春福濟陳啟邁加意嚴防仍著楊需不分畛域
互爲聲援毋稍大意

又命軍機大臣傳諭陳啟邁曰本日據楊需奏探聞
官兵克復漢陽漢口二十三日克復武昌省城現在
賊匪分路逃竄約計尙有一萬餘人逃往何處並未
據明晰聲敘亦未據塔齊布曾國藩奏到該匪被勦

緊急難保不乘隙竄入鄰省現在江西武甯等處賊
匪未就肅清九江尙爲賊踞若該逆豕突狼奔勾結
蔓延爲患甚鉅著陳啟邁於江西湖北毗連處所迅
卽派委將弁督帶兵勇扼要駐紮加意嚴防毋令賊
匪竄入境內致滋紛擾

上又命軍機大臣傳諭和春福濟曰本日據楊需奏官
兵克復漢陽漢口二十三日克復武昌省城現在賊

匪尙有一萬餘人分路逃竄情形若何尙未據塔齊
布曾國藩奏到該逆被剿情急難保不亡命狂奔勾
結皖省逆匪蔓延爲患著和春等派委得力將弁帶
領兵勇於安徽湖北毗連處所扼要嚴守加意防範
毋令賊匪竄入剿辦更難得手至廬州等處賊匪被
官兵屢次攻剿疊獲勝仗勢極窮蹙著卽督飭兵勇
奮力圍攻務當一鼓殲除迅圖克復毋致再有竄逸

安慶一帶賊匪尙未殲滅卽著飭令秦定三迅速勦辦毋稍延緩

上又命軍機大臣傳諭塔齊布曾國藩曰楚北賊匪本恃武漢爲老巢現已破其巢穴則下游餘匪自易勦除惟分竄賊匪尙有萬餘人塔齊布曾國藩等水陸各軍如何勦辦此股餘匪究竟竄往何處本日已諭令陳啟邁及和春等一體嚴防該逆被勦窮蹙豕突

狼奔蹤跡靡定且漢川黃陂一帶賊匪尙多尤慮勾結爲患楊需駐紮楊店現已諭令進攻黃州趕緊克復並嚴防逆匪北竄塔齊布勦辦崇陽一股是否已就肅清此時武漢收復後卽可會合曾國藩水師併力東下廓清江面該提督等務當與楊需妥商籌辦勿令東下之師爲楚省零匪所牽掣

欽定勦平粵匪方略卷一百六 甲寅年

九月初一日 丁卯 僧格林沁西凌阿奏言近來逆

匪思竄愈急八月二十四五等日該逆連次撲營均經擊退據投出難民供稱賊巢糧米已無惟食黑豆並聞該逆製造呂公車及掘空地道總要搶死撲出等語現在周圍濠溝嚴密布置足以破其地道並有梅花坑數重及大小木椿

雖有呂公車亦難偏近惟該逆窮蹙已極防守
益堅 臣等與各營官熟思妥議深恐貪功輕進
徒折精銳於事無濟以現在賊勢而論人心不
固糧米缺乏撲則不敢守則無糧斷難久稽顯
戮一有可乘之機卽當督兵進剿可望就地殲
除 臣等惟有嚴飭各營加意防範仍隨時設法
圖維務期迅速蕩平早紓

聖廬奏八

上命軍機大臣傳諭僧格林沁曰朕日盼捷音速奏而
每覽奏摺幾成習見套語毫無出奇制勝之處實屬
不解轉瞬天氣漸寒儻隄水凍結該逆另啟詭謀又
將作何防範僧格林沁旣稱該逆撲則不敢守則無
糧卽此豈非可乘之機猶稱有機可乘卽當進剿究
竟如何始爲進剿機會虛詞搪塞至於此極朕實爲

之愧恨著僧格林沁卽行督飭各路官兵設法進兵
剋日攻破賊巢不得再以徒折精銳爲詞布置嚴密
爲解任令該逆日久負嵎

初二日 戊辰 托明阿陳金綬奏言 臣等查雷以誠

自到場以來一載有餘勸捐濟餉著有成效攻
勦瓜州時於地勢賊情均能深悉伏乞

皇上天恩准令雷以誠仍留揚州俾 臣托明阿得資臂

助至和州瀕江扼要上年琦善派副都統常清帶青州兵一千名前往烏江駐紮旋經皖省調往他處而揚州之兵續經撥赴廬州者約四千名之多以致江防二百數十里之內處處兵單現在浦口洲地賊壘尙未祛除瓜州之賊日久負嵎又須亟圖會剿前此抽調駐防宿遷馬隊二百餘員名折回揚城添防東路正以六合儀

集三身良乃既免二百一
三
徽防兵自分撥江浦後無可再行撤減始爲此
萬不得已之計而和州距揚太遠實屬鞭長莫
及前由儀徵六合撥兵五百六十餘名添防江
浦現又撥浦口馬隊二百名早晚更替赴江浦
協防竊計扼守江浦卽所以保障和含其和含
等處請

旨飭下和春等於皖省軍營就近派撥防守以專責成

而免貽誤奏入

上命軍機大臣傳諭托明阿陳金綬雷以誠和春福濟
袁甲三曰前因和含一帶堵禦喫緊諭令托明阿通
盤籌畫能否令雷以誠帶兵前往和州妥商辦理嗣
因和州已被賊踞復命雷以誠卽日馳往扼要進剿
托明阿等此次奏報請令雷以誠仍留揚州自係未
經接到續降諭旨惟所稱勸捐助剿必須熟手亦係

實在情形雷以誠卽著毋庸前赴和州至揚州之兵
誠難再分浦口賊巢亟應力圖攻毀若徒稱扼守江
浦卽以保障和含豈尙不知和州失事情形耶雷以
誠旣不能兼顧和州卽著托明阿等督飭將弁將浦
口賊蹤迅速掃除方爲妥善袁甲三前奏有北路緊
要緩赴六安之語著卽體察情形如須親往督勦卽
著與和春福濟妥籌辦理儻和春等專待揚州之兵

托明阿等則仍令廬州籌撥各存畛域之見輾轉貽
誤咎將誰執袁甲三前奏各情尙合機宜諒必能統
籌全局毋誤事機也

初三日己楊霈奏言八月二十四日夜賊船二

千餘隻由襄河涓口蔡店擁撲漢口搭造浮橋
圍攻我兵營壘當經曾國藩魁玉楊昌泗等水
陸截勦縱火焚燒礮船堵遏江口賊船盡爲灰

燼火光照耀百里徹夜不絕賊匪二萬餘人斬
殺焚燒溺斃不可計數竄逸者不及十分之一
並皆薙髮四散 臣當派知府栗耀馳赴漢陽安
撫商民搜捕餘匪桂明帶兵馳赴黃岡一帶集
團堵剿收復黃州武昌各郡縣 臣於二十七日
拔營赴省滿營馬隊及甯夏延綏等營官兵留
駐楊店聽候調遣計北境業已無虞下游沿江

州郡尙爲賊踞卽應會同曾國藩等水陸並進以冀一氣掃除伏查安徽江西江南賊尙未平楚北皆與接壤大江上下帆檣瞬息往來控扼非易與其屯兵久戍勞費而終無把握不若乘此湖南兵氣方揚賊匪喪膽之際約會江西進攻九江安徽會勦夾擊以戰爲守作一勞永逸之計臣擬到省與曾國藩等熟商將兵勇酌量

集三皇國之田考二百一
遣回湖南及留於湖北防守各選精銳帶同礮
船水陸下擊直抵江南協助向榮等剋期掃蕩
滅數載猖狂之巨寇慰

九重宵旰之憂勤其湖北善後一切事宜交臬司等妥
籌辦理

同日塔齊布曾國藩奏言八月初三日臣塔齊
布督兵馳抵崇陽縣距城里許該逆二千餘人

分三路抗拒我軍亦分三路衝擊斬其前鋒逆
黨敗竄過河半回縣城拒守我軍一面飛渡窮
追一面圍城急攻共殺賊百餘名城上槍礮如
雨兵勇裹創前進鏖戰四時至暮始行收隊初
四日黎明臣塔齊布復督將弁攻城羅澤南等
亦由桂口沙坪搜勦而至探明賊勢併注西城
遂先攻東北二門以分賊勢選壯士二百人埋

伏城根隨督大隊奮攻西門城上連放槍礮拋
擲瓦石我軍冒險力攻旋用劈山大礮轟破西
門一擁而入前埋伏之二百人亦從北城根肉
薄而登四門截殺斃賊約二百人餘匪由東門
過河逃竄又追殺百餘名立將縣城克復崇陽
向爲亂民萃聚之藪自鍾人傑後反者數起今
年賊目廖敬瞬踞爲老巢盤踞數月資糧盡聚

其中悍賊數千嬰城死守又山路險峻城小而固非兵勇奮不顧身未易破此堅城也臣塔齊布卽於初六日拔營前進派羅澤南等先赴咸甯初八日紮官塘驛探明武昌賊黨八百餘人從金牛地方招集崇陽逃匪乘虛而入踞城抗禦阻遏大軍羅澤南等於初九日馳抵城下賊從東門潰出竄至十里外之官步橋忽回駐要

隘分路埋伏我軍分路進追繞出賊伏之後賊
遂向北路竄去我軍沿途截殺追奔十餘里斃
賊八十餘名生擒二十餘名水軍戰船自前月
二十七日金口獲勝後該逆不敢上犯已革副
都統魁玉總兵楊昌泗帶兵勇四千三百人來
會紮金口之西岸同知銜李光榮帶川勇千餘
人亦至紮金口之東岸皆荊州將軍遣來協剿

者也初八初十等日官軍在沌口一帶巡哨遇
賊鏖戰水陸接應斃賊無算該逆奔退回巢臣
曾國藩已於十一日進駐金口臣塔齊布自崇
陽咸甯沿途勦賊北來雖明知賊匪未淨大兵
一過仍虞嘯聚各縣然武昌爲省會重地拔其
本根則枝葉自萎勢不能兼顧小股祇得飛速
進兵直擣武漢以圖迅復鄂垣此次出力員弁

兵勇應請

皇上天恩容臣等擇尤保獎均奏入

上命軍機大臣傳諭楊需塔齊布曾國藩曰賊船由襄
河潰口蔡店擁撲漢口經曾國藩魁玉楊昌泗等水
陸截剿縱火焚燒逆匪二萬人斬殺焚溺者不計其
數辦理甚爲得手楊需於二十七日拔營赴省自可
與曾國藩通籌全局爲水陸並進之舉惟武漢新復

應如何酌留兵勇防堵使賊匪不得乘虛覬覦方爲
妥善現派桂明帶兵馳赴黃岡一帶督團堵剿如能
收復黃州楚境一律肅清即可乘此聲威水陸並進
會同江西兵船下攻九江直達安慶該署督等相機
辦理務臻妥協至馬隊及甯夏延綏等營官兵留駐
楊店即可爲北路聲援前據楊需奏武漢克復尙有
賊萬餘此時攻剿下游仍須厚集兵力曾國藩等本

日奏報尙係克復崇陽其攻勦武漢情形仍未奏到
塔齊布陸路官兵此時諒與曾國藩水路合爲一軍
著俟楊需抵省後商摧挑選精兵水陸進勦朕日盼
捷音之至也所有克復武漢情形著楊需塔齊布曾
國藩迅速馳奏

初四日
庚午向榮奏言查上方橋西賊營經官軍

連次攻勦仍復負嵎堅守現當禾稼秋成探聞

該逆於鐵星橋河定橋一帶日肆焚掠雖經派去兵勇節次搃斬數百人而板橋善橋一帶嘯聚甚衆亟應設法圍剿幸探得蕪湖之賊業於十一日被涇太義勇擊走收復縣城臣飛調已革總兵王鵬年等迅帶浙江兵勇由甯國出堵蕪湖已於十六日齊到該處紮營鄧紹良一軍亦由高瀆調至太平屯紮蕪太陸路之賊漸清

惟采石沿江以下尙有逆黨時來擄掠臣現檄飭鄧紹良帶領兵勇一千二百餘名由慈湖銅津沿江直取江甯鎮進攻板橋善橋並由大營抽撥楚兵五百名令副將傅振邦帶往秣陵關與前派參將長桂所帶兵勇六百名齊往江甯鎮會合統歸鄧紹良調遣攻勦如能得手則與大營聲勢相聯上方橋賊巢前後受敵不能固

守方可一律掃蕩惟吳全美所帶紅單船自前
月泊駐采石磯後水路接濟已斷該逆始傾巢
出戰陸路復被大創賊情正深恐懼臣方催提
紅單船進攻東西梁山節節扼勦而上庶水陸
上游皆爲我有實收復金陵一大轉機乃該總
兵忽藉口於揚州大營札調回攻九泐洲並不
候臣檄飭遂於十一日駛至浦口以下實屬坐

失事機經 臣專弁嚴行檄斥始以待解糧餉子
藥爲詞繼又以帆纜黷脆應須更換爲推諉之
計現在上游賊船麕聚乃自放開江路致令聯
檣竄下接濟復通賊燄未免復熾茲已特派副
將蔡應龍前往督催責令吳全美卽將所帶紅
單會同葉常春之拖罾各船趕卽駛上金陵由
江甯鎮勦洗前進以期會合鄧紹良陸兵扼住

上游江面然後將兩梁山一帶賊營全行洗蕩
再由蕪湖直溯池州則皖江以南無復賊蹤蘇
杭門戶自固然後以全力規復金陵便有把握
現聞該逆已於夾江九洑洲之間用糧船排列
復於下關南北兩岸用鐵練中貫巨木橫截江
面並有礮船游弋意欲阻我師船上攻之路臣
已飭總兵陳世忠挑派閩勇赴浦設法斷其鐵

練不致有礙江路並飭令吳全美等就便協勦
但俟東北風轉卽仍督船上擊庶可早靖逆氛
奏八

上命軍機大臣傳諭托明阿向榮陳金綬雷以誠曰前
因東西梁山賊船較多諭令托明阿等於陳國泰所
帶船內撥赴上游已據奏稱派撥十隻前往與吳全
美合力堵勦合計紅單船已有三十餘隻兵力較厚

自當力扼上游使賊船不能下竄於勦辦機宜最爲
緊要乃據向榮奏稱吳全美藉口於揚州大營札調
回攻九洑洲輒駛至浦口以下經該大臣嚴行檄斥
又復藉詞推諉實出情理之外該總兵統帶師船係
歸向榮節制各兵勇轟擊賊船本極奮勉若帶兵大
員意存退縮勢必蹈艇師疲玩積習當此攻勦喫緊
之際豈容任意顛預著向榮嚴催該總兵迅赴上游

並著托明阿等飭令陳國泰將所撥紅單船十隻飛
速上駛不准片刻耽延儻再不遵調遣卽著該大臣
等從嚴叅辦武漢現已克復湖南水師指日卽可下
駛至黃州九江等處現在蕪湖業已收復若兩路夾
擊梁山一帶賊船自可剋期殄滅該大臣等務當乘
此機會併力攻勦毋稍遲延其金陵逆匪接濟尤當
設法嚴斷毋令到處焚掠涇太義勇收復蕪湖縣城

情形著查明具奏

同日塔齊布曾國藩奏言 臣曾國藩進駐金口
後八月十二日乘小舟赴沌口相度形勢李孟
羣等率戰船隨往突有逆船數十來抄陸賊千
餘沿江撲犯我戰船以少半擊江中之船以強
半擊岸上之賊頃刻閒屍橫徧地岸賊敗退逆
船亦卽下遁陸軍自咸甯大勝後 臣塔齊布率

各營直趨省會飭知府羅澤南都司彭三元普承堯等先行十三日探明橫溝橋地方聚賊六七千人意圖阻遏官軍並分伏兩旁以圖抄尾羅澤南等分路進攻賊勢大潰追殺百餘名賊之埋伏兩山者復經搜殺二百餘人十五日羅澤南等進紮紙坊距鄂城六十里十六日臣塔齊布亦至十七日偕羅澤南同赴金口與臣國

藩會議進兵先後查逆黨盤踞武漢約共二萬
餘人自沌口以下東西兩岸水陸賊營密布連
日再四詳究進攻武昌之路有三一爲古驛路
由油坊嶺以達洪山一爲新驛路由湖隄以達
板橋一爲沿江之路由金口以達花園進攻漢
陽之路亦有三一爲沿江之路由沌口以達鸚
鵡洲一爲裏河之路由蔡店以達西門一由襄

河建瓴而下臣等悉心定議必以水師先勦江
面使武漢之賊消息隔斷陸路則先攻武昌後
攻漢陽臣塔齊布暫駐紙坊總要之區遣羅澤
南等由金口一路先攻花園賊營然後由古驛
路進攻洪山至西岸沿江一路則令魁玉楊昌
泗等率荆兵進攻一面咨明署督臣楊需夾攻
漢陽之背以期諸軍會合迅復堅城雖據稟崇

陽餘燼復合戕官踞城而陸軍單薄暫時不及
分兵回剿俟攻克鄂城後再行四路遣征奏入
報

聞

同日陳啟邁奏言閏七月二十九日有賊船四
五百號停泊湖口縣之梅家洲一帶經臣飭令
已革總兵趙如勝等嚴密堵剿八月初三日東

北風大作逆船揚帆上竄趙如勝等以瀦溪口
河面較狹俟其駛入聚而殲旃查吳城下東北
沙灣地方有小河一道與瀦溪大河中隔洲地
一片可以瀦繞出溪之下當派廩生錢榮等帶
勇乘坐漁船一百隻由沙灣小河順流而下約
俟賊艇悉進瀦溪卽抄襲其後順風縱火趙如
勝等帶勇乘坐小戰船五十隻前往下游迎頭

截擊是日辰刻遙見賊船駛入瀟溪灘擁而來
全數進口其前隊將抵沙灣見隔洲小河有船
下駛知爲襲彼後軍該逆將船停泊率領數百
人上洲開放槍礮適趙如勝率衆飛棹而下身
先士卒執旗指揮各弁勇亦奮力爭先連放擡
礮賊陣大亂官軍乘勢登洲掩殺斃匪百餘人
餘俱追偪落水淹斃時錢榮等船隻業已繞出

瀦溪轉占上風直偏賊艇施放火箭拋擲火罐
火彈後隊匪船數十號同時火起風大火烈頃
刻延燒趙如勝等復悉力進攻逆艇有被礮擊
沈者有爲我軍搶獲者中隊之賊進退無路紛
紛撲水其狡黠者跳入腳船逃走約有四五十
隻風浪過大仍多淹沒大船五百餘號實無片
帆逃歸是役也搶獲賊船六十七隻燒燬四百

餘隻擊斃賊匪一千餘人焚溺者不計其數生
擒一百五十七名內有僞官多名惟此股賊船
雖已剿滅殆盡而安慶一帶灣泊尙多現在紅
單船截剿甚急該逆鋌而走險難保不復竄江
西臣尤當督飭各員弁益嚴守禦以備不虞再
廣東韶連各屬土匪蠶起竄擾長甯龍南等縣
疊經兵勇擊退現仍飭令南贛鎮道認真防剿

至竄擾德安之賊經遊擊景星等擊斃數百人
餘匪逃回興國其崇通匪徒擾及義甯西路亦
經擊敗退回楚疆惟武甯匪勢臨張屢逼義甯
東路現飭景星等統帶兵勇合力夾攻務期剋
日殲滅奏入

上命軍機大臣傳諭陳啟邁曰賊船復犯吳城盡被官
軍焚燬惟竄賊恐去而復來未可以目前小有勝仗

致疏防範且江西地面北鄰楚省南接粵東現在韶
連各屬土匪紛起竄擾長甯龍南等縣均經兵勇擊
退該撫仍當嚴飭鎮道等迅速勦捕淨盡其由楚入
江路徑不但叢山密箐皆可伏匿前此楚賊由崇通
竄越屢窺武義卽爲前車之鑒現在武漢已經攻克
漢川黃陂等處亦漸肅清是湖北勦辦得手江西更
形喫重陳啟邁身任疆圻籌防不可稍懈至吳城賊

船雖已勦淨安慶江面灣泊尚多卽防陸防江亦須
兼顧若曾國藩與塔齊布各軍水陸並進會同江西
兵船前後夾擊江面自可漸就肅清陳啟邁總當防
勦兼顧互爲聲援勿稍疏失

初五日 辛未 塔齊布曾國藩奏言八月二十一日

臣塔齊布由油坊嶺進發阨東北洪山總匯之
區臣國藩在金口定議沿江三路齊下之策湖

南陸軍羅澤南等三千人及荊州派來李光榮
川勇千人攻東岸花園賊營魁玉楊昌泗四千
三百人攻西岸蝦蟆磯賊營水師戰船從中流
飛駛衝過鹽關之下直至鸚鵡洲該逆不意我
軍之猝出其後也卽回船下救我軍分兩翼上
下繞擊賊勢不支紛紛落水楊載福等縱火延
燒頃刻之間鹽關二百餘號賊船焚燬盡矣羅

澤南等攻花園賊營分爲三路同進賊自木城
開礮子如雨點我軍奮力直入賊衆大潰縱火
焚其營壘是時西岸魁玉等亦攻破蝦蟆磯賊
營縱火焚之賊衆四竄伏兵圍勦屍橫遍野楊
昌泗窮追直下與水軍夾擊復破鸚鵡洲賊營
李孟羣楊載福等乘勝又攻破漢關等處賊營
三座遂徑攻鮎魚套口復燒燬賊舟數十號二

十二日李孟羣率前營先發攻燒鮎魚套未盡
之船旋卽西渡攻漢陽朝宗門土城楊載福蕭
捷三秦國祿等仍衝過賊營直趨塘角何越珽
亦衝過賊營直攻漢口兩城焚燒賊船無數兩
岸賊營悉數踏平自有此兩日大戰省河上下
無一賊船武漢城外無一賊營臣等知其萬無
可守之理二十三日卯刻水陸各營豫備攻城

武昌之賊已於四更後潛開東北門逃竄猶留
悍賊數百在西南城搖旗放礮故作堅守之狀
漢陽城上亦然我水上軍及東路陸軍用大礮
向漢陽望山等門轟擊而別遣壯士從僻處攀
堞而登舉火爲號各營擁入衆賊奔竄截殺九
百餘人生擒二百餘人西岸漢陽城上之賊方
與水師連礮對擊楊昌泗之兵勇已自南門梯

繩而入魁玉督帶各營在西門外月湖隄一帶
埋伏該逆由西門奔赴蔡店被伏兵截斃殲
無數生擒二百餘名午未之間兩城同時克復
臣塔齊布從油坊嶺來知武昌東北洪山一帶
爲陸路竄賊必由之地豫飭大隊四路埋伏該
逆不料我軍猝至前臨大敵後偏危城左近梁
子湖右隔湯孫湖無路逃生拚死抗拒我軍分

路迎擊賊向洪山之背大奔我軍槍登山脊乘
勢追北殲賊約六七千人餘衆圍偪沙湖塘角
灣地方紛紛赴水溺斃二千餘人二十四日臣
等先後入城履勘街道撫綏孑黎現已飛咨湖
北巡撫兼署督臣楊需請其迅速渡江鎮撫會
城一面妥籌分路進剿事宜所有此次尤爲出
力各員相應開列可否先行獎勵之處出自

皇上天恩奏入

上諭曰覽奏感慰實深獲此大勝殊非意料所及朕惟
兢業自持叩

天速赦民劫也

上命軍機大臣傳諭楊需曾國藩塔齊布曰此次武漢
兩城克復聲威大振北竄餘匪復經楊需疊次剿殺
漸就廓清是楚省大局已定亟應分路進剿由九江

安慶直抵金陵埽清江面曾國藩雖係署任巡撫而
剿賊之事重於地方自湖南東下水陸各路官軍必
須該署撫與塔齊布會同調度方能人人用命斷不
能株守省垣楊需昨奏已於二十七日拔營赴省諒
已與曾國藩塔齊布晤及應如何分兵前進如何留
兵防守當已計議周妥楊需所稱會同曾國藩等各
選精銳水陸下擊湖北善後事宜交臬司等妥辦似

該督亦擬督師出境但此時黃州未復胡林翼尙在岳州曾國藩等水陸大軍正在建瓴破竹之時萬難坐待省垣布置完善再同該督前進且大江風信靡常逆船回竄固應嚴防卽崇陽等處餘匪抄襲我軍之後亦甚可慮自宜酌留大員督辦以爲大軍後路聲援若專委之臬司誠恐呼應不能甚靈著楊霈與曾國藩塔齊布妥速商定卽行具奏曾國藩以殺賊

自任必能謀定後戰計出萬全楊需遇事持重審度
精詳諒不至孟浪同進致令楚境空虛也昨據塔齊
布等奏有崇陽餘燼復合戕官踞城之語著楊需迅
卽派兵前往撲滅並飭桂明收復黃州等處城池果
能一律肅清則桂明之兵卽可由黃梅廣濟一帶間
道斜出仍與曾國藩等會合庶英山太湖賊援亦斷
皖省勦辦亦易得手塔齊布所帶陸兵旣單魁玉楊

昌泗之兵應否合爲一軍隨同東下亦著會國藩與
塔齊布妥籌調遣並約會陳啟邁飛派兵船礮船由
九江出勦以爲水路奇兵勿令該逆旁竄鄱湖又與
義甯等處陸匪勾結復致蔓延崇通一帶總之江面
必須急勦餘匪尤宜嚴搜沿江勦賊之事朕以責之
會國藩塔齊布楚省防賊回竄及搜捕江北等處餘
匪事宜朕以責之楊需該督等務當協力妥籌不可

稍涉大意

上諭內閣曰上年江皖回竄之賊重擾漢陽漢口於今夏再陷武昌逆燄狻獭蔓延兩楚神人共憤覆載難容疊經降旨令塔齊布曾國藩於收復岳州後分督水陸兩軍掃蕩沿江賊壘乘勝東趨直擣武漢茲於八月二十三日武昌漢陽兩城同時克復三日之內焚舟千餘踏平賊壘淨盡運籌決策甚合機宜允宜

立沛殊恩以酬勞勩楊霈著補授湖廣總督曾國藩
著賞給二品頂戴署理湖北巡撫並加恩賞戴花翎
塔齊布著賞穿黃馬褂並賞給騎都尉世職廣西升
用道李孟羣著賞加按察使銜並賞給珠爾杭阿巴
圖魯名號候選知府羅澤南著記名以道員用候選
知縣李續賓著以直隸州知州升用並賞換花翎遊
擊楊載福著以參將補用並賞加副將銜守備蕭捷

三著以都司升用並賞換花翎都司彭三元著以遊
擊補用守備唐得升著以都司升用並賞換花翎同
知銜文生李光榮著以府經歷縣丞遇缺卽選已革
副都統魁玉已革總兵楊昌泗均著加恩開復原官
其餘出力文武員弁兵勇著會國藩塔齊布查明保
奏候朕施恩

初八日
甲戌 僧格林沁西凌阿奏言逆匪自初一

日逐日結隊出巢不敢直前奔撲近於前次拆
毀破村空濠築壘惟恐另生詭謀初四日馬步
官兵分路進剿直至連鎮賊濠該逆由連鎮李
莊分爲三路傾巢出拒我馬隊官兵分兩翼迎
勦步隊中路進逼各隊官兵槍箭齊施練勇短
兵相接斃賊無數該逆不能抵禦敗回巢穴當
經兵勇將前次拆毀破村濠溝全行墊平撤隊

而回是日之戰約斃賊匪一百餘名初五初六等日陸續逃出難民供稱賊匪屢次受創萬分情急兼之糧米缺乏僅食黑豆急於捨死奔撲現在賊巢製造呂公車二十餘座定於初十前後拌命向北面奔竄惟有加意嚴防仍督飭各路官兵設法進攻斷不敢任令該逆日久負隅自蹈重戾奏八

上命軍機大臣傳諭僧格林沁西凌阿曰逆匪占踞連
鎮僅係村莊並無城郭之固僧格林沁圍攻五月有
餘前此僅能於該逆出撲時極力擊退卽初四日進
兵出戰亦不過將前次拆毀破村濠溝全行墊平究
竟如何擣穴揜渠尙無成算且賊糧缺乏僅食黑豆
等語朕耳聞已熟若賊巢中果無糧米則駭黨勢必
瓦解豈有仍以黑豆苟延數月之理僧格林沁性情

集賢堂卷之二
誠樸或不免受人欺瞞現在賊匪製造呂公車於初
十日前後向北奔撲卽應加意防範然與其防賊出
撲不如督兵進攻先發制人兵家勝著該大臣等務
當趕緊攻勦勿但以小勝塞責並以進勦過猛恐傷
精銳爲詞遷延時日至軍士隨征已及一年更宜加
以激勵迅將此股殲除解甲釋戈共相休息如久令
負嵎抗拒僧格林沁亦何以對在營將士耶

同日托明阿陳金綬雷以誠奏言八月二十五日浦口官兵瞭見金陵下關駛出木簞大小二座大者約二十餘丈小者十餘丈上紮木城中設瞭臺數座環列大小礮位沿南岸下駛續有大小賊船數十隻圍護木簞連開大礮經李德麟等統帶局艇迎頭截擊槍礮齊發轟沈賊匪快船數隻該逆紛紛解散大小賊船均卽遁入

金陵內河其賊匪木簞一座乘隙由江心大溜
直奔下游兵船極力進追時總兵陳世忠督率
師船由段要口泝流迎截攻毀木城二處小瞭
臺一座時已昏黑大霧瀰漫該逆木簞仍順江
心大溜而下各師船暗中緊追二三更後霧氣
益重咫尺難分駛至下游路過土橋江面總兵
陳國泰督率紅單船迎擊上下游戰船槍礮與

賊礮對轟於江昏霧黑之中及至天曉始知木
簞已駛泊鎮江南岸查各項戰船分扼上下游
原以堵截江面賊船今浦口兵勇雖將賊船擊
退未能攔截木簞陳國泰駐泊土橋尤應實力
扼堵乃因夜深霧重竟任其乘夜衝突直赴下
游究屬疏於防範臣等現飭陳世忠嚴扼段要
口以防金陵賊簞續行衝下並飭張攀龍速撥

大礮船由焦山進駛協同陳國泰攻擊務將木
簞二座卽日燬除一面飛催李德麟等折回浦
口速將洲地賊營轟洗儻各該鎮等再敢玩延
立卽嚴叅從重治罪斷不敢稍有寬縱惟查九
洲與南岸七里洲均有賊營江面甚窄兩岸
賊礮對發又於中流排列巨艦橫互鐵索三道
舟師上駛頗難現已與向榮會商擬先破其鐵

鎖橫江之處臣雷以誠於八月二十七日馳赴
焦山督飭張攀龍等礮船與陸軍會剿務期一
鼓攻克以紓

宸廬奏八

上命軍機大臣傳諭托明阿向榮陳金綬雷以誠曰逆
匪於金陵下關駛出木簞由江心大溜直奔下游李
德麟等帶領局艇既不能奮力追擊陳世忠督率師

船在段要口又不能認真截勦陳國泰所帶紅單船最爲得力何以於土橋江面不能堵扼木籐尤堪詫異可見管帶水師將弁因循積習幾於牢不可破該大臣等統領全軍若不力求振作致令紅單各船亦如李德麟等所帶師船不能得力貽誤之罪又將誰誘現在逆匪木籐駛泊鎮江南岸必係窺伺完善之區自應一面嚴防金陵賊籐續行衝下一面將現在

木簞用火攻燬僞陳世忠在段要口不能扼截張攀
龍陳國泰等不能迅速攻勦卽著該大臣等從嚴彙
辦毋稍瞻徇九洲洲與南岸七里洲均有賊營又於
中流排列巨艦橫互鐵鎖意在阻我舟師必應設法
擊毀李德麟已折回浦口卽著嚴飭該員等會同武
慶速將洲地賊營概行轟洗毋再玩延並著督令余
萬清實力防勦迅圖克復鎮江梁山賊船旣多難保

不乘勢下駛向榮務當督飭吳全美力扼上游使賊
勢不能聯絡瓜州逆匪仍著托明阿等於水陸兩路
亟圖進剿毋得坐失事機雷以誠現赴焦山親督礮
船與陸路諸軍會合環攻如將賊箠擊毀卽著迅速
馳奏

同日塔齊布曾國藩奏言官軍自克復武漢兩
城鄂省上下二百餘里大江已無賊船惟襄河

之內賊船尙多二十四日探報賊舟千餘已由
蔡店順流而下將出大江與官軍決一死戰魁
玉楊昌泗親督荆兵防勦陸路臣國藩卽派水
師各營以大船錯布漢口內外而以三板迅入
迎擊行僅數里該逆已連檣而下其首隊自楊
林溝登岸者約二千人經魁玉等抄擊賊衆敗
潰適戰船雷轟而入該逆開礮抵敵以河身太

窄賊船太擠不能迴旋取勢蒼黃失措我軍乘
隙偪入拋擲火毬火箭賊匪向南北岸亂竄經
陸軍殲斃無數水師復乘勝追及上游賊衆大
潰自三更以後賊船逃竄一空我軍行二十餘
里至羅家墩地方將賊船千餘號悉數燒盡四
更始行收隊蓋緣漢水偪窄乘賊船擁擠喧亂
之時擊之又荊州陸路之兵兩岸被害之民亦

乘閒縱火是以二十餘號戰船用力甚少成功甚多自有此戰襄河以內賊舟無幾更酌留船隻徧爲搜剿從此一意東下無後路牽掣之虞矣然臣等細察大局尙有可慮者數端水師搶船太多私匿贓貨頗有飽則思颺之意又屢勝之餘志驕氣溢暗伏挫敗之機此其可慮者一也武昌竄出之賊雖在洪山殲去數千然逃者

尙多漢陽竄出之賊現皆逃歸蘄黃一帶尙有數萬崇陽興國蘄州黃孝等處亂民尤多設官軍稍有挫衄則四面皆賊餉道易斷此其可慮者二也水陸兩軍銀錢子藥皆取給於湖南此後去湘日遠輸轉尤難一有缺乏則軍士潰散前功盡棄此其可慮者三也現在機勢大有可乘臣等急思東下以圖克復沿江諸城然念此

三者步步艱難又不能不熟思審度縷陳於

聖主之前奏入

上命軍機大臣傳諭楊需曾國藩塔齊布曰本日據塔齊布曾國藩奏搜剿襄河賊匪以二十餘號戰船焚燬賊舟千餘隻現在河內逆船無多當可悉數殲除是上游如安陸襄陽南北支流如德安孝感沔陽荊州等處均可無虞牽掣曾國藩等可以揚帆東下肅

清江面據稱細察大局尙有三端可慮自係實情此
次東出長江不得不倍加慎重况攘外必先安內此
時黃州尙未克復崇陽亦有復踞之信均應酌分兵
力翦除餘匪省垣善後事宜楊需固責無旁貸至會
國藩等以勦賊自任雖當乘此機會急思順流而下
以次攻復沿江諸城然須計出萬全謀定後戰方無
挫衄之虞著楊需等悉心布置地方之事朕已責之

楊需則嚴遏亂萌保護餉道該督必須節節妥籌會
國藩塔齊布方能專意勦賊其水陸弁勇等務須開
誠布公消其驕悍之心鼓其勇敢之氣策勵撫綏寬
猛兼濟至出力將士尤須及時酌保不可使有缺望
曾國藩處事精詳必能與塔齊布妥爲駕馭若能由
九江安慶直抵金陵使長江數千里盡蕩妖氛則從
征將弁朕必破格施恩以酬懋績

同日和春福濟奏言廬城逆匪疊受懲創防備甚嚴八月十八日四更臣等督率官兵潛伏而進並飛飭常清等一同攻剿該逆在城上以礮回拒相持甚久並不出巢我軍大礮環擊子落城上時聞震駭之聲約斃賊匪不少旋因大雨收隊二十日早傳令四面進剿並飭攻打得勝門南門之楚廣各勇先以一二百人徐徐而

進作誘敵之計餘於營盤左近紮住得勝門果
突出賊匪千餘名兵勇奮力迎擊立斃十數名
江忠濬程智泉帶領各勇直前擊勦正酣戰間
南門又出賊匪千餘名欲抄我軍後路臣等親
督吉順嵩瑞等帶領湖南山東官兵從賊後兜
勦適常清珠克登楊青鶴由大西水西門趕到
三面合攻該逆前後受敵殲斃無算餘賊飛奔

入城我軍趕至城邊城上槍礮如雨於未刻收
隊是日之戰約計斃賊七八百名二十二至九
月初一日連次圍勦該逆一味堅守並於半夜
暗襲俱有準備多方誘賊竟不出巢容再行設
法攻勦計圖襲取再舒城之賊據秦定三函稱
八月十四至二十六日連次督兵攻勦該逆或
突出二三百人或百餘人經兵勇迎擊疊有斬

擒又梁山賊船多由裕溪口來至巢縣八月二十日忠泰與李鴻章督兵前往遇賊於五里墩擊斃多名賊卽敗退入城隨督兵勇分攻各門忽東門半塘船上逆匪約二千餘人分兩路前進意圖抄襲我軍之後當卽分兵急攻斃賊無算餘賊敗退回船自相擁擠落水死者不計其數二十六日復由獅子口一帶進勦賊從東門

集賢門外卷一百一
三
突出二千餘人經官兵擊退西門又出賊五六
百人並湖中賊船二十餘隻約有賊三四百名
上岸合股抄襲忠泰李鴻章等馬步夾攻賊卽
潰敗殲滅不少臣等伏查舒城巢縣賊匪疊被
勦擒其膽已寒現飭乘勝進攻如能及早克復
則廬城賊勢自孤似易得手奏入

上命軍機大臣傳諭和春福濟曰此次廬州舒城巢縣

勦賊各情仍不過小有斬獲並無制勝之策如此曠日持久雖屢報勝仗究於大局何裨昨據塔齊布等奏督飭兵勇克復武漢水陸各軍指日東下沿江一帶攻勦得手便可直抵安慶進扼金陵該提督等務當隨時偵探塔齊布等統兵到皖時應如何派兵策應合力夾擊均須豫籌妥辦廬州賊匪經官兵屢次殲勦爲數當已無多和春等務當激勵將士併力進

攻聚而殲旃勿留餘孽一面嚴飭地方團練兵勇斷賊接濟尤爲要著其關山一路雖經派有恩錫帶兵駐守該處爲南北要隘該提督等仍當隨時查察並知照袁甲三先將烏口等處賊船盡行勦除庶下游賊船不致續行上竄秦定三攻勦舒城已經數月總未能克復縣城著卽飭令乘勝進攻毋再多延時日東西梁山賊船屯聚尙多難保不紛竄肆擾並著嚴

飭忠秦等加意防範仍迅圖攻復巢縣不得稍有延
誤

初十日丙子勝保奏言臣連日督工加高馬道商

同德勒克色楞善祿崇恩於九月初五日分由
東南西南兩路進攻臣親督兵勇由東北角越
濠而進已上城四五十人城上兩邊無路樹柵
甚厚賊用火彈擲出又將東西兩面槍礮趕至

東北角連環攢打我兵鏖戰踰時受傷甚多勢
難撲進臣一面知會德勒克色楞善祿崇恩三
處趕緊進攻以分其力一面挑勇開挖地穴透
入城根趕將火藥運入裝滿引出藥綫臣將馬
步隊撤退兩箭之遙傳令點放轉瞬間大聲震
發煙燄騰起數十丈輒石蔽空而下忽西南風
作濃煙直衝東北我兵爲煙塵障蔽不能向前

而賊已於此時豫作準備俟風過煙銷始見城垣已轟開五丈有餘臣急督兵勇搶上缺口賊於煙塵瀰漫之中抵死開放槍礮拋擲火彈並將大小樹枝堆塞隘口阻我上城之路我兵見事已垂成受傷雖多仍復屢撲不退惟地勢偏狹煙氣薰天我兵實不能立足其東南西南正南三面德勒克色楞等乘東北攻撲緊急之時

督兵齊進究以密柵重濠阻隔城上槍礮輒石
交下兵勇多有受傷無路可上此次傷斃賊衆
約有一百餘人皆其精銳死黨餘賊殘喘苟延
舍命死拒現在城垣已破似不難設法攻入臣
等一面嚴飭馬隊防賊偷竄一面多添礮位時
向缺口轟擊斷不令逆匪乘夜堵築俟兵勇稍
養銳氣再加激勵以我兵全力制窮寇餘生總

期於數日之內克復州城芟夷兇孽而後已奏

八

上命軍機大臣傳諭勝保德勒克色楞善祿崇恩曰逆賊祗有此數豈能面面死拒若如所奏東北面進攻如此緊急則其餘各門賊守必懈何至仍以槍礮阻隔爲詞上城兵勇已有四五十人何以不見陸續攀登東西兩面賊礮旣皆移於東北何以不卽從移去

槍礮之處設法攻上明係兵心未齊不能同時並舉
以致先後參差彼此觀望使賊得以面面設防殊爲
可恨轟開城垣至五丈有餘缺口不爲不寬帶隊各
官屢傷不退將心不爲不奮此等緊要機會而以煙
濃路窄藉作俄延坐令垂成之功失之頃刻諉云蓄
養銳氣以圖再舉試思我兵養銳之時非卽逆賊堵
築修補之時耶設再舉而仍復如此則克復當在何

時數日總能克復之語勝保已屢屢言之大言無效
朕實爲之憤愧德勒克色楞善祿崇恩與勝保共辦
一事亦不能事事誘之主帥看此次分攻各門情形
德勒克色楞等不能接應之咎亦無可辭若似此貌
合情睽致州城仍不能破或破城之後餘逆分路竄
逸何路疏懈朕必重治何路督兵大員之罪勝保等
勿謂朕不能洞悉其隱也

欽定剿平粵匪方略卷一百七 甲寅年

九月十二日 戊寅

上諭內閣曰會國藩著賞給兵部侍郎銜辦理軍務毋庸署理湖北巡撫陶恩培著補授湖北巡撫未到任以前著楊需兼署雷以誠著賞給三品頂戴補授江蘇布政使仍留揚州軍營幫辦軍務

十三日 己卯 向榮奏言八月二十一日鄧紹良帶

兵行抵太平該逆聞風竄回采石我軍分營扼堵要衝二十四日賊衆由采石前來窺伺經我軍擊退二十五日有賊四五千入復由采石至黃山焚擾我軍分三路兜截誘入伏中左右排槍疊擊該逆潰奔追至采石之四喜橋是日計斃賊四五百人二十七日分兵直攻采石拆毀賊營二座二十九三十等日該逆連次分股來

撲適傅振邦長桂各軍由秣陵關繞出沿江會
合鄧紹良分路迎勦斬馘多名傅振邦衝入賊
隊手腕被礮打傷仍前督戰逆賊抵敵不住奔
潰回巢現在兩梁山與金柱關各有賊船數百
隻西梁山又有賊營四座時有窺撲太平蕪湖
之意查蕪湖爲上游要口該逆之所必爭該處
雖有浙江甯國兵勇約五千人然皆不甚得力

刻下金陵大兵實難再分現擬將前次調赴徽州川兵一千名折回蕪湖以當前敵而令浙江甯國兵勇助勢庶幾戰守可恃鄧紹良扼紮太平之兵先僅一千二百餘名傅振邦折回金陵就醫所帶兵勇已併歸鄧紹良統帶亦止二千餘人堵剿尙覺不敷惟有俟紅單等船駛上庶可會攻上游之賊無如吳全美葉常春各船尙

寄碇浦口阻風不能上駛復據水營各鎮稟報
二十五日該逆木簿二座並賊划快船數十隻
由七里洲夾江口衝出經吳全美等擊沈賊划
十數隻賊簿順流直下一靠金山一泊鮎魚套
臣已知會下游師船迅圖設法攻毀力斷賊援
現聞瓜州攻勦得手賊勢已窮鎮江之賊經余
萬清堵勦亦尙得手臣已分別咨行水陸防勦

並嚴催吳全美葉常春等督飭水勇及調到陳
世忠閩勇爬船趕緊設法斷賊橋練會攻九洑
洲賊營疏通江路俾紅單等船一遇順風立即
上駛會合鄧紹良陸路之兵相機前進直至蕪
湖庶可遏賊來源但使上游一清賊無接濟則
下游次第籌勦較有把握矣奏入

上命軍機大臣傳諭托明阿向榮陳金綬雷以誠曰鄧

紹良傳振邦等連日采石之戰斬獲雖不爲少但察看賊情似非悍賊死黨恐係以小勝驕我兵心而兩梁山及金柱關等處賊船復以大股突撲該大臣旣將傳振邦之兵併歸鄧紹良統帶卽著飭令該員加意嚴扼能進則進使上游對紮各賊營不能安穩久踞方操勝算吳全美葉常春所帶兵船擅自折回本屬可惡該大臣旣稱嚴催該總兵等速破九洑洲賊

營立即上駛著卽嚴催趨提若該總兵等藉詞延宕
既不速攻洲地又不進扼太平或於掃清賊巢之後
又託言協勦瓜州置上游於不顧卽著據實嚴叅連
前此不聽節制之罪一併重懲蕪湖爲上游要口浙
江兵勇旣難得力自應以勁兵協守該大臣所稱檄
調赴徽川兵往蕪湖而令甯國兵勇助勢意在酌量
兵勢強弱爲布置之先後著卽妥籌辦理賊箠是否

仍泊鎮江南岸抑又駛往下游雷以誠前赴焦山一帶福建派來之總兵孫雲鴻亦在該處能否相度情形迅將賊簿設法攻毀並著據實奏聞現在師船不爲不多洲地賊巢不過兩三處何以不卽進攻瓜州已屬彈丸洲地尤爲狹小若逆匪每占一處卽牽掣一路得力之兵何日始能肅清江面況師船全在江北托明阿等責無旁貸著卽迅速勦除使烏江之賊

退無所踞自不敢上竄滁州等處關山全椒雖皆派
有防兵若水路不斷則陸路終不能防此係南北緊
要關鍵托明阿等豈可玩泄視之耶向榮摺內有現
聞瓜州攻勦得手賊勢已窮之語托明阿等務當迅
速進勦儻一勝之後輒復停兵數日或賊匪出撲始
行督兵抵禦是賊逸我勞雖有勝仗終難攻克況上
游紅單船業已折回現在金陵瓜鎮賊援復通使不

先復瓜州豈非前功盡棄該大臣等萬不准再事耽
延任令負嵎死守

同日陳啟邁奏言據署九江鎮總兵羅玉斌咨
報九江城內新添賊匪一千餘名復有逆船一
百五十餘號由湖北來灣泊龍開河連前船共
有二百餘號約計水陸賊匪七千餘人潯中兵
力實屬單薄因遊擊景星德安勦匪事竣知會

該遊擊卽帶兵勇前往堵剿八月十四五日九江營兵川貴勇及景星所帶兵勇陸續前赴蛇岡嶺一帶擇要駐紮乃營壘尙未築就十五日夜城內突出賊匪數千分路撲營景星卽督兵迎剿殺賊多名詎該逆分股繞至我軍之後兩面夾攻以致兵勇被衝潰散傷亡不少該遊擊奮力衝突身受多傷登時被害把總高光裕外

委黃貴珍亦同時陣亡羅玉斌聞信馳往策應
路遇潰散兵勇均已退回隨於通遠驛紮營杜
賊內竄又據探報湖口彭澤泊有匪船七八百
號揚言上竄九江約會該處逆黨分水陸兩路
來攻省城等情臣查九江地方爲賊船往來必
由之路該逆勢所必爭盤踞郡城者皆其死黨
且有江面匪船及湖北興國大股爲之聲援是

以臣前擬將武甯股匪勦滅再以全力併攻潯陽旣無內顧之憂並免輕進之失今景星於未接到臣札之先經羅玉斌調往協勦被匪前後攻撲力戰陣亡目下我兵新挫難保該逆不乘隙窺伺德安而湖口等處停泊賊艇亦有赴潯約會分竄之謠卽應嚴密防勦現派臬司惲光宸選帶練勇九百名並於義甯調回已革守備

吳錫光帶領靖勇四百餘名均在建昌會合相
度緩急分投堵禦一俟續到賊舟退去卽馳往
武甯迅將該處匪徒勦洗淨盡再行厚集兵力
圍攻潯郡並飛飭已革總兵趙如勝嚴督水師
實力防守以杜賊船上竄至常州營遊擊儘先
參將景星新喻汎把總高光裕臨江營外委黃
貴珍均著戰功遽遭戕害實深憫惜應請

飭部從優議卹以慰忠魂奏入

上命軍機大臣傳諭陳啟邁曰楚北逆衆旣經上游兵
勇追勦得手則潰敗餘匪紛紛下竄本應及早籌防
九江一郡爲江路咽喉久經該逆盤踞此次復添集
賊船乘虛來犯帶兵員弁多有傷亡湖口彭澤一路
有匪船多隻揚言上竄此時欲保守省垣總以併力
先攻九江扼其來路爲要著鄰省援兵一時難以徵

調會國藩等水陸兩軍雖可指日東下然亦不能坐
待此軍任令逆燄更肆猖獗該撫現派臬司惲光宸
添帶兵勇並飭吳錫光帶勇在建昌會合務令鼓勇
直前以勦爲堵斷不准逗留建昌致賊艇竄入鄱湖
更難措手仍一面激勵官紳民勇協同防勦以助兵
力之不逮其趙如勝所領水師與其徒令防守不如
出湖迎勦以遏兇鋒至武甯股匪尙未勦除自應妥

籌兼顧若俟彼處賊匪勦除淨盡再圖攻克九江是
否不致遲誤該撫務當通籌全局相機而行毋令有
用之兵徒勞往返所有陣亡之常州營遊擊儘先參
將景星新喻汛把總高光裕臨江營外委黃貴珍均
著交部從優議卹

十六日 壬午 湖廣總督兼署湖北巡撫楊需奏言

據署黃州府許賡藻稟報九月初四日督同黃

岡縣翁汝瀛帶領紳團於淋山河團風桃店等處分道勦賊擒斬數百名直抵黃州城下賊匪望風逃竄下船開駛追至江邊擊斃數十名落水淹斃者數十名當將黃州城池收復該逆水陸奔竄分泊大冶蘄州興國一帶江面臣卽飛咨桂明速由新洲前進扼要堵勦武昌縣賊匪聞信驚惶署武昌縣知縣白潤於初五日約會

紳團數百人多張旗幟徑徧縣城西門賊匪不
敢抗拒分出南北兩門逃竄追至北門不及下
船者多擠撲淹斃擊沈賊船三隻斬十餘人當
卽收復城池其漢川沔陽一帶竄匪先後捕斬
數百名數十名不等湖澤漸次肅清現在曾國
藩塔齊布水陸之師均已分起下行臣先飭魁
玉楊昌泗等會合桂明一同前往並飛咨江西

安徽撫臣一律堵剿以冀迅速掃除查此次收復省城全賴湖南水陸數大戰挫折賊鋒又礙船得力將賊船大加焚燬賊之輜重喪失糧草無存膽落心離分蹤四竄故能一鼓克復勢如破竹現在武昌省城空無居民衙署民房大半殘毀漢陽府城尤爲殘破計清理街道修葺衙署民房甚需時日伏思武昌漢陽夾江對峙形

勢雄闊必須有水陸重兵扼守善後事宜自以
造船鑄礮練兵儲糧爲最要而經費支絀辦理
匪易竊謂坐守不如進攻臣是以有以戰爲守
作一勞永逸之計南省礮船分則戰守皆形不
足合則攻勦實能擅長大江爲楚省咽喉鎖鑰
礮船擊於上紅單船擊於下江路不難肅清江
路清而接濟斷江甯鎮江之賊必可盡鏟根株

否則金陵之巢穴難除江皖之蔓延日甚楚南
楚北一水相連終無安枕之日聞藩司夏廷樾
業已行抵長沙卽飛催速行赴任臣整頓兵勇
布置防守俟藩臬兩司到省後卽當親督後隊
會同曾國藩等合力下擊奏入

上命軍機大臣傳諭楊需曰現在曾國藩塔齊布水陸
之師已分起東下楊需業飭魁玉楊昌泗等會合同

往並咨江西安徽一律防剿所籌尙合機宜前降旨
給曾國藩兵部侍郎銜辦理軍務毋庸署理撫篆誠
以楚北兵威大振曾國藩卽可與塔齊布同出長江
以次掃蕩九江等處賊艘順流收復安慶各城不能
復拘以職守該督所議以戰爲守自是一勞永逸之
計惟精銳俱出內地空虛夏廷樾已抵長沙卽著飭
赴新任無庸前往四川武漢旣復岳州防務較緩並

可飭令胡林翼速來楚北以資彈壓撫綏曾國藩等
專意東下得楊霈後隊之師既可互相策應如楊霈
督兵會剿有夏廷樾等駐紮近省要隘亦可後顧無
虞層層布置總宜計出萬全惟漢川應沔一帶湖澤
旣漸肅清襄陽卽非喫緊之地豐伸前此所駐各兵
應移何處截扼楊霈務卽咨商王慶雲速飭豐伸擇
要移防以便該督等出境剿賊崇陽縣城復被賊陷

官文曾咨商楊需與塔齊布撥兵往剿此時如何剿辦何以未見奏報該督務當戰守互資內外兼顧所稱省垣殘破善後事宜以造船鑄礮練兵儲糧爲要務自應次第舉行惟此時曾國藩等水陸進剿湖北防堵事宜該督責無旁貸務當擇要駐兵妥籌布置總期沿江痛加剷洗使該逆窺伺之心絕則楚北之民安城垣衙署再次第修葺猶未爲晚曾國藩塔齊

布各營軍餉向來取給於湖南現在相距路遠轉運更難該督須隨時接濟毋令匱乏

上又命軍機大臣傳諭曾國藩塔齊布曰前此搜剿襄河賊匪諭令曾國藩等乘此機會謀定後戰誠以克復沿江諸城在此一舉必當計出萬全斷不可稍有挫衄現在黃州武昌次第收復我兵水陸並進行抵何處及如何布置情形諒曾國藩等必有奏報在途

黃州賊匪水陸奔竄大冶蘄州興國一帶江面賊船聚泊尙多我兵乘勝追勦自必勢如破竹惟黃州而下卽係九江該郡久爲賊踞前據陳啟邁奏官軍進勦失利湖口彭澤一帶探有匪船多隻揚言上竄該撫雖已派臬司惲光宸及趙如勝等水陸防勦其能否克復九江殊難豫定若上游追勦得手難保賊船不竄入鄱湖設再蔓延江省牽綴我師不能順流直

下則勦辦又費周章曾國藩等務當統籌全局一面
迅速進兵潯江一面知會陳啟邁前後夾擊以期一
鼓殲除毋留後患至皖省久遭蹂躪安慶府賊已踞
爲巢穴勢必負隅死守况廬州尙未克復江北一帶
如無爲和含等處江南一帶如池太所屬多爲賊踞
太平蕪湖雖經克復兵力尙單逆匪屯踞東西梁山
及金柱關等處每欲乘閒窺伺徽甯以現在情形而

論向榮派赴太平之兵僅有一千七百餘名南北兩岸兵力究嫌單薄曾國藩前已賞給兵部侍郎銜毋庸署理湖北巡撫旣無地方之責即可專力追勦但必須統籌全局毋令逆匪南北分竄方爲妥善並隨時知照江皖各撫及托明阿向榮等四面兜擊以期直搗金陵固不可遷延觀望坐失事機亦不可銳進貪功致有貽誤曾國藩等必能兼權熟計迅奏膚公

也

上諭內閣曰我軍克復武昌漢陽後水陸各路追剿餘
匪武黃一帶尙爲賊藪經楊需飭令署黃州府知府
許賡藻等帶領紳團分道剿賊斬擒數百名賊匪望
風逃竄遂將黃州府城武昌縣城收復辦理尙爲得
手現在曾國藩等水陸各軍已分起東下著楊需仍
飭所屬文武員弁進剿蘄州興國一帶江面聚泊賊

船務將楚省餘燼全行殄滅卽行進剿下游毋稍延

緩

十八日甲申湖南提督塔齊布兵部侍郎銜曾國

藩奏言自武漢克復後襄河以內賊船焚剿殆
盡江漢一律肅清急應乘勝進剿查此次敗竄
之賊脅從解散分途回籍者約二三萬人逃赴
下游回踞舊巢者亦尙有數萬人南岸之解散

者爲數尙少其回巢抗拒者多集於興國州北岸之解散者爲數極衆其回巢抗拒者多集於蕪州廣濟等屬而皆以水次爲老巢以舟楫爲藏身之固屢據探稟北岸之黃州府南岸之武昌縣均已收復自巴河以下經田家鎮道士狀直至九江節節皆有賊船臣等現與兼署督臣楊需商定三路進兵南路由臣塔齊布率湖南

兵勇進兵興國大冶等處北路由署督臣派令
固原提臣桂明等率各營兵勇進攻蘄州廣濟
等處水師由江路直下揚載福彭玉麟等率前
幫先發臣國藩督同李孟羣等率後幫繼進俟
抵黃州時與陸路北軍一會抵田家鎮富池口
時與陸路南軍一會北軍行至廣濟將入皖境
再與署督臣商定行止南軍則須勦辦九江後

乃能渡江而北以圖疾擣安慶規復省會該逆
擄掠民船以數萬計經臣等一軍轟擊焚燒者
不及七千各省官軍焚擊者亦不過數千下游
現存賊艇爲數尙復不少九江以下必當大戰
數次臣等惟有激勵士卒步步整頓以期廓清
江面奏入

上命軍機大臣傳諭楊需曾國藩塔齊布曰以長江大

局而論楚北上游旣已漸次肅清則各路官軍乘勝東趨自成破竹之勢楊需前奏坐守不如進攻擬親督後隊會合下擊今曾國藩等定擬南北兩路一由塔齊布進攻興國等處一由楊需派令桂明等進攻蘄州一帶曾國藩水師則由中路直下似此三軍齊發直搗賊巢原屬制勝上策但下游賊船蟻集我兵分道進攻若非首尾相顧聯絡一氣則能分而不能

合殊非兵家所宜所籌於黃州會合北軍於田家鎮
富池口會合南軍雖聲勢不至隔絕但兵機移步換
形賊情亦詭詐百出總須出奇應變步步爲營以免
孤軍深入方操勝算其桂明一軍較之楚南兵勇強
弱是否相當儻彼強此弱南岸被勦緊急該逆必至
伺隙北渡該督等曾否慮及此次東下之師關繫大
局轉機務期成算在胸相機籌辦能制賊而不爲賊

制庶可次第廓清也

二十一日丁亥袁甲三奏言查皖省現在情形處

處喫重廬郡以南民生之塗炭賊勢之猖獗早
在

聖明洞鑒之中現在湖北之賊將盡江甯之賊漸窮上
游師船追趕下游艇船攔截該逆江路往來已
屬不能自由南岸徽甯一帶節節設防壘次獲

勝該逆亦不敢遽行窺伺儻北岸竟無一旅之
師深恐賊匪乘虛竄入必至無可措手此時廬
郡西南東南情形均爲喫緊須 臣親自督辦方
可稍有把握而臨淮爲南北關鍵 臣駐防數月
聲威尙壯周圍數千里漸就安帖實不敢輕離
一步再四思維不得不於萬難分身之中爲兼
籌並及之計現派舉人臧紆青同知李安中帶

勇一千餘名並駐防正陽關之參將劉玉豹帶
兵五百名會合和春等所派道員何桂珍先到
六安相機進剿其全滁一路另派知縣徐曉峯
等會同廬鳳道張光第等共帶兵勇一千七百
餘名由關山至烏衣一帶聯絡駐紮與現駐全
椒之署臬司恩錫防剿兼籌相機辦理臣仍暫
駐臨淮以爲各路策應隨時調度並知會和春

福濟妥商機宜以期迅掃妖氛

袁甲三又奏言此次軍務之壞總由於在事諸臣各守疆域能分而不能合一處有警四處設防究其所謂防者不過倖賊之未至未必果有把握也金陵之賊竄擾北岸統計北岸兵勇不下六七千人分布尙難周密儻萃各處防兵與之決一死戰濟以水師夾攻安有不破賊營之

理現在向榮托明阿等業經飭催會勦儘能一
氣掃蕩固屬大快萬一不能得手則賊營一日
不破防兵卽一日難撤卽幸而賊不旁竄而老
師糜餉亦於大局無補 臣亟思親自督兵前往
而非沿江一帶防兵及江面水師均歸節制且
所需糧餉金陵揚州隨時接濟則動多掣肘萬
萬不能成事刻下所尤難者臨淮爲南北衝要

無論士民泣留不能脫然竟去且土匪之觀隙而動逆賊之乘虛而入到處均屬可慮無大員控制萬萬不能放心臣此次分兵兩路前進原期西南路如能得手湖北礮船趕下即可直抵安慶以扼逆賊之吭東南路如能得手則由和無而上亦可與西南路會合一氣長江之險據爲我有金陵廬州必可不戰自復惟事之成敗

集賢堂之田卷二
三十一
不可知不敢以空言豫瀆

聖聽亦不敢以薄才自肩重任儻蒙

皇上另行簡派大員迅來臨淮接辦一切俾臣得相機

前進並乞

恩命假以事權雖成功未可豫卜而軀命不敢自惜涇
涇愚誠不敢不瀝陳於

君父之前奏入

上命軍機大臣傳諭和春福濟袁甲三曰此時南路攻
剿誠屬緊要而臨淮爲南北鎖鑰關繫尤重袁甲三
督防數月聲威頗壯若遽令其督兵南往另派大員
前往接辦一時殊無得力之員萬一分兵之後匪黨
乘機竊發於北路關鍵大有妨礙旣據袁甲三分派
臧紆青張光第等各領兵勇前往西南東南兩路剿
辦袁甲三卽著仍駐臨淮策應各路現在楚北東下

之師會國藩與塔齊布桂明定議分三路直搗賊巢
一俟九江肅清卽沿江而下會攻安慶著和春福濟
一面嚴督官軍迅復廬州一面抽撥兵勇相機策應
楚師旣由西而東勢如破竹皖兵卽應自北而南併
力夾擊務須聯絡聲援會合一氣爲掃蕩逆氛之計
其全滁烏江一帶賊營尙多並著該提督等隨時飛
咨托明阿向榮無分南北協力殲除斷不准稍存畛

域失此緊要機會也

二十二日戊子和春福濟奏言廬江自上年冬閒

被賊占踞臣福濟於三月閒卽札飭該縣民人

趕辦團練七月閒密傳貢生吳廷香文生鮑豐

基等來營與臣和春面諭以機有可圖密籌進

取一面探聞該縣之賊由巢湖駛入廬州南鄉

意圖接應隨卽飛飭該紳士等乘其空虛速覓

內綫妥爲布置頃據稟報文生姚克厚接到密
札首先起練攻城鮑豐基暗糾各約於八月三
十日環勦吳廷香亦由舒統帶練勇星馳夾擊
外委熊允升等率隊分攻各門典史韓澍等統
帶練勇在舒桐交界扼要堵截共計練勇三四
千人分番轟擊忽有逆匪多名由無爲州赴廬
接應城內之賊開西南門接仗姚克厚等內應

外合一擁進城砍殺數十人擒獲賊館逆首十七名及僞監軍任大綱等多名熊允升等陸續進城搜斬逆黨三百餘人臣等查賊踞廬江已閱十月之久該約首鮑豐基等竟能糾約鄉民攻其不備不勞兵餉克復城池洵屬效順輸忠深明大義容俟查明出力紳民練勇奏請

恩施以昭激勸惟該縣四面受敵兼之環繞巢湖現在

裕溪口江面賊匪來去自由新復之城籌防不
易現令道員何桂珍帶勇五百名馳赴駐紮相
機進攻桐城防剿兼施並仍飭鮑豐基等整頓
鄉團勿稍鬆懈奏入

上嘉之

二十四日
庚寅勝保奏言九月二十八等日兩

次督兵進攻見賊之全力俱在東北其缺口處

時刻被礮轟擊賊雖不敢堵禦修築但其缺口
左右城上柵壘重重槍礮火罐甚密我兵前次
上城未能得手卽由於此且賊自城垣轟塌後
守護愈力日夜伏在城外地洞濠溝之中防我
攻撲並於濠內用木板樹枝層層遮護藏身於
中我兵擁至城下輒中其計惟有設法先破濠
內伏賊仍須安用地雷將缺口左右城上柵壘

集賢堂之四卷二百一
三六

轟開方可得手現已趕造攔牌百餘面並添辦
空濠器具剋日分三路進攻查東隅城垣經地
雷轟開數丈爲賊所併力專注之處我兵亦惟
於此處進攻較易爲力此次激勵兵勇力圖克
復日內卽可動手臣等竭力盡心晝夜籌畫祇
以此賊詭計多端攻勦萬分費手不勝慚憤之
至奏入

上命軍機大臣傳諭勝保德勒克色楞善祿崇恩曰據
奏兩次進攻該逆拒守益力我兵未能卽時攻克又
以添造撫牌各器具稽延時日朕覽奏之餘倍深焦
急豈該大臣等身履行閒轉漠然不知愧奮現在攻
具造齊已定剋日分三路並攻之舉若仍如前次奏
報東北城垣已陷而各門不肯同時並進統帥之罪
固無所逃卽德勒克色楞等分任勦賊之責亦豈能

屢從寬假據稱東北垣缺陷數丈該逆併力專注在
此我兵進攻較易亦在此若此路可破自能一擁登
陴然亦須於東南西南正西三門糾約齊備同破賊
巢使逆匪奔救不暇則柵壘雖堅必不能處處抵禦
攻堅攻瑕隨時策應斷無以數百賊黨能爲四面設
防之理前此功敗垂成皆由帶兵大員彼此觀望所
致一誤豈堪再誤朕於該大臣等疊次訓諭已極詳

備論功罰罪惟該大臣等自取何路退縮卽將何路
統兵大員治以應得之罪亟圖克復毋失事機

二十七日癸巳僧格林沁西凌阿奏言近日逆匪

仍前死拒百計誘引堅匿不出十三日臣僧格

林沁督帶官兵直至賊壘木城該逆拌死抗拒
正在進攻之際忽有多匪衝出意在抄圍官軍
分投痛剿斃賊甚多我兵受傷四十餘名十五

日又復進攻該逆負固死守並無一匪出巢祇
在壘內施放槍礮密如雨下我兵仍未得手茲
據投出之人供稱賊營所做呂公車前推容易
拉回極難最怕重濠揆之賊情此時未卽衝撲
者諒因防守周帀是以遲疑不敢輕試並訊得
該逆已決挖河隄引水東面意欲乘船撲出其
情形慌張已可概見二十四日夜逆匪撲向瑞

昌營繕經官兵登時擊退臣惟有會同各路統帶將士設法竭力進攻及早蕩掃以贖愆尤奏

八

上命軍機大臣傳諭僧格林沁西凌阿曰此次接仗雖屬得手但僅僧格林沁一路進攻其各路帶兵大員何以不同時並進殊不可解況我兵受傷者亦復不少究竟如何接仗情形亦未詳細聲敘該逆一經挫

敗卽負嶠死守已成慣技惟在我兵設法誘敵或潛
師襲取四面環攻斷不能因賊不出巢遂至束手無
策該大臣屢次奏稱賊糧缺乏何以數月之久賊勢
尙能固守况賊中槍礮尙多可見該逆米糧火藥並
未斷絕且恐附近愚民暗中接濟似此曠日持久殄
滅無期該大臣統領全軍貽誤之罪又將誰誘據稱
逆匪決空河隄引水東面欲乘船撲出是該逆已欲

乘閒竄突該大臣等務當剋日進攻一面杜其竄路
毋得再事遷延致干重罪

同日江甯將軍托明阿前直隸提督陳金綬江
蘇布政使雷以誠奏言 臣等商同於初四日出
隊分東西兩岸進攻瓜州 臣托明阿督同副都
統德興阿等由西岸分三路進剿 臣陳金綬 臣
雷以誠督同副都統德崇額等由東岸分三路

進剿先後行抵賊營槍礮齊放擊斃賊匪數十
名天晚撤隊是日水師各船因無風不能駛往
夾擊 臣等復約會水營並豫咨提督余萬清以
東南風爲期江南圍攻鎮江江北圍攻瓜州同
時水陸並進使賊不能相顧一面飛催陳國泰
孫雲鴻周士法張攀龍等迅剿江內賊箠至十
五日漸轉東風 臣等飛咨余萬清一面傳諭東

西各營暨土橋焦山各水營同時並舉十六日
子刻臣托明阿親督西岸馬步官兵分三路進
兵遊擊馬永泰等由三道濠溝搭橋直撲運河
隄岸進至第二道濠溝賊已將浮橋撤去水勢
甚寬不能搭橋徑渡官兵與賊隔濠相持直至
日暮逐漸撤退是日東岸仍前分路進攻虹橋
等處賊營搭板渡河焚燬賊卡殲斃賊匪多名

薄暮撤隊回營伏查是日之戰各營官弁兵勇
奮力爭先實屬踴躍用命惟自十五日風色稍
轉臣等徧諭各營原冀水師合剿乃十五日傳
令之際又聞金陵續有賊箠下駛並聞江上隱
有礮聲臣等飛飭沿江嚴防次日會攻瓜州未
見江上師船駛至撤隊後接到江浦等處稟報
續有賊箠於十四日未刻駛出金陵下關十五

日駛赴下游各該處師船及民勇快船沿江邀擊不能截止祇將護箚大小賊船擊沈數隻斃賊無數賊箚駛近瓜州金山有快船數十隻迎上接應我軍追至土橋賊已護箚而去俄頃已過金山礮臺又據孫雲鴻等稟稱接余萬清函約於十五十七等日派張攀龍等帶領師船進攻賊箚該逆於甘露寺上下開礮我師逼近南

岸奮力轟擊至鎮江大馬頭江神廟地方轟塌
賊營甄城數處擊毀賊船數隻臣等現飭陳國
泰孫雲鴻周士法等趕緊剿毀一面相機協攻
瓜州復飭陳世忠等嚴扼段要口上游毋令賊
鋒再來衝突至浦口洲地賊營武慶李德麟等
迄今未能剿除現在吳全美葉常春等所帶紅
單拖罾各船均聚浦口兵力不爲不厚業經咨

會向榮嚴催該鎮等聯絡聲勢協力將洲地賊
營並橫江鐵鎖全數勦洗以清江面如再延玩
卽一律嚴加叅辦再據探報續由下關駛下之
木筏一座在八卦洲江面經艇師各船暨水勇
划船圍繞攻擊已於十九日夜間將賊筏燒燬
殺斃賊匪甚多並奪獲旗幟槍礮無數合併陳

明

同日向榮奏言上方橋西賊營負嶠堅守該逆
每恃通濟門雨花臺各路援應我軍疊次環攻
不下因思該逆併守前營其後雨花臺一帶賊
營或空當派副將張國樑等督帶精兵二千直
搗雨花臺賊巢另派兵勇五隊令署將軍福興
總兵明安泰分投接應均於初八日卯刻出隊
一齊攻撲賊營該逆槍礮頻施仍前不出我軍

卽以後隊分攻堵紮前隊衝過賊營徑向雨花
臺進勦連破賊卡六重斃賊數十乘勢搶上雨
花臺山梁焚其木柵三道該逆倉卒潰亂我軍
奮身躍入立將兩營攻破殲殺不計其數賊衆
狂奔我軍跟蹤縱擊直抵城下該逆抽去鈞橋
堵住城闔矢石槍礮並下我軍無路可登四路
搜殺賊人並將買賣街焚燬復由雨花臺一路

撤回各賊營始終不敢出敵是日之戰計斃賊
五百有餘旋聞太平門外又有奸民在彼貿易
該逆每晨出城買物正可乘機襲攻乃於十二
日五鼓派兵二隊一由馬羣繞路往襲一由龍
脖子接應進攻該逆相率出城突見我軍旗幟
旋卽退入鳴角開礮我軍兩路撲攻遙見城門
已閉槍礮來回互擊誠恐兵力徒傷乃將賊買

賣街焚燒拏獲奸民就地正法收隊而回查該
逆閉城死守賊壘未平旣須趕緊進攻尤必先
斷接濟現在善橋一帶賊卡雖屢經勇練襲破
時有斬俘而該處近接秣陵關不特接濟可通
亦復時虞窺擾臣現復抽派遊兵五百名遴員
管帶於秣陵關小丹陽鎮太平一帶往來巡剿
使聲勢遙聯鄧紹良一軍亦無孤懸之慮惟陸

路扼勦得力亟盼舟師上駛會籌所有續行分
提陳國泰紅單船十隻已到石埠橋與浦口吳
全美葉常春等船犄角屯泊堵勦經 臣 疊檄督
催因浦口水勢溜急須俟東北大風方可併力
進擊一面斷賊鐵練浮橋與浦口水陸諸軍會
勦九淤之賊以期早清江面迅掃妖氛再據水
營各鎮將稟稱十四日未刻有賊木簞二座由

下關江口衝出後有大糧船二隻及大小礮艇
十數隻相隨鼓噪而行葉常春與蔡應龍先將
紅單拖罾排爲兩翼堵住賊船槍礮頻施擊沈
大糧船一隻賊船數隻餘船敗回下關其時吳
全美李德麟率同紅單局艇緊跟賊箠轟擊追
至八卦洲下淺灘將其牽繩壓斷賊箠擱淺其
一箠已先行竄下我船趕緊下追並會合石埠

橋段要口高資港各處守口師船節節兜擊將
箚上木城打穿多處擊斃賊匪不少賊箚黑夜
駛下鎮江所有攔淺賊箚一座經紅單拖舂等
船合圍攻擊因該處水溜且淺不能進前十五
十六等日有大賊船二三十隻率領快划四五
十隻自下關衝下救應被師船分投衝蕩立沈
賊划八九隻賊衆梟岸潰奔維時七里洲有賊

數百前來接應亦被師船大礮轟退計三日之內擊壞大小賊船三十餘隻斃賊不計其數查此次截剿雖能獲勝而賊箠一則已竄下流一則尙在攔淺師船連日圍攻仍以風微未能卽時攻毀該逆以木箠得計難保不陸續下竄臣已疊次嚴飭該鎮將等迅圖焚攻以防賊船接應儻再堵剿不力定卽嚴叅一面飛飭下游各

船務將賊箠一律掃蕩以清江面而斷賊援均
奏八

上命軍機大臣傳諭托明阿向榮陳金綬雷以誠曰金
陵瓜州兩處陸路得勝而水路前次下竄之賊箠尙
未毀滅該逆又從下關江口續行竄出木箠二座雖
經師船追擊而賊箠一座業已駛至鎮江其在八卦
洲擱淺者究竟是否焚燬吳全美等旣未能盡數追

勦葉常春及石埠橋段要口高資港等處守口之船
復不能實力扼截致該逆游行無阻現在下游十分
喫重著卽嚴催孫雲鴻張攀龍等趕緊將木簞極力
勦除若謂師船不能攏近卽束手無策安用此水營
將弁爲耶浦口洲地賊營久未殲除陸路急攻則由
水路奔竄向榮已提紅單船十隻到石埠橋與吳全
美等船犄角屯泊著卽督飭該鎮等設法斷其鐵練

浮橋先清九淤之賊其段要口地面責之陳世忠等
毋令再被竄下鎮江賊箠責之陳國泰孫雲鴻周士
法等剋期攻毀儻再任意玩忽不知愧奮卽著嚴叅
懲辦此係南北關鍵最爲緊要向榮托明阿等務當
分催水軍及早肅清江面瓜州久未攻克雖疊報勝
仗於事何濟該逆每踞一地我兵卽多一路牽掣若
托明阿等不能迅破賊巢向榮亦不能攔截續竄之

賊船則統帥貽誤之罪與各鎮將等朕亦必執法從事諒該大臣等不敢仍前玩泄也

續編卷之八

四

欽定勦平粵匪方略卷一百八 甲寅年

十月初五日庚子陳啟邁奏言九江逆船陸續駛

往下游武甯境內賊匪愈聚愈多屢擾義甯邊
界臣飭各軍馳往武甯會勦八月三十日武甯
匪徒及湖北新到之賊竄踞附近三都梁口官
山燕子山等處經都司馬占魁督同千總羅玉
祥等帶領兵勇及各紳士團丁前往堵勦連施

槍礮轟斃賊匪三百餘人該匪潰敗退往清江
地方屯踞九月初一日馬占魁等追至清江該
匪全股盡潰兵勇乘勝追逐趕徧落河者甚多
又八月三十日武邑木高地方有逆匪千餘名
撲犯船頭灘經把總楊錦春等統帶練勇鄉團
追剿立將賊巢燒燬餘匪退踞月田等處吳錫
光卽帶靖勇及義武兩處鄉團自梁口迅赴武

甯暉光宸帶領革員程元瑞等自建昌飭催各路兵勇前進初六日行抵武甯縣之月田地方係該逆久踞巢穴吳錫光督率兵勇五路齊進陣斃賊目多名賊遂大敗狂奔窮追十餘里殺賊一千餘名敗殘匪衆均竄回興國州地面武甯城圍頓解暉光宸等一俟籌防周妥卽往九江攻勦

陳啟邁又奏言據探報湖口彭澤江岸泊有賊船數百隻揚言約會九江逆黨分路內竄有匪船七十餘隻駛至星子縣屬之神靈湖一帶擄掠經該署南康府知府王楷等督率兵勇並團練首事生員鄂拱垣等帶領壯丁往勦擊斃賊匪二十餘人擊沈賊船五十九隻奪獲七隻其餘匪船均逃竄出湖奏入

上命軍機大臣傳諭陳啟邁曰曾國藩與塔齊布等分
兵三路直擣下游計黃州以下賊匪勢必竄入江境
武甯雖已解圍其鄰楚水陸各境深防潰匪奔突且
據該撫片奏星子縣屬神靈湖地方追勦匪船餘匪
逃竄出湖尤恐楚匪大股衝入陸路則勾結義武餘
黨經由修河水路則徑達九江湖口皆可入湖一經
蟻聚勢更不可收拾惟有豫籌迎擊將義武各處嚴

集賢堂 卷之二
三

密布置後卽令輝光宸督率吳錫光趕緊帶同兵勇
馳往九江調集礮船一面由水路會合楚北之師沿
江勦捕一面督催陸兵環攻九江郡城迅圖克復時
時與曾國藩等知會籌商萬勿株待楚軍轉致遲誤

初六日 辛丑 向榮奏言查賊箠兩座竄泊金山四

面皆有賊划巡哨九月十五日經余萬清派令
千總田宗揚帶領兵勇前赴高資港出江往襲

檄會勇練民團埋伏香山二擺渡等處接應一面出隊分布鎮城各門以截該逆出援之路一面密約周士法等艇船乘機過江夾勦田宗揚率領兵勇船隻潛至箠上施放火箭火罐立時火起該逆不知兵從何來一面冒火開礮一面奔避箠旁哨船紛紛擁擠落水我船又分投縱火延燒大糧船兩隻小船三隻焚斃賊匪並撲

江者不下一百餘人時有瓜州賊划二十餘隻
飛駕來援各兵勇奮勇迎勦復焚燒逆船二隻
各划亦均被擊敗上游又有木箒一座由中流
放礮衝下我軍恐腹背受敵且因風力漸細師
船未能來助收入二擺渡撤隊而回其時鎮城
遙見木箒火起該逆卽由西門出賊一股當經
在彼埋伏之潮勇迎頭攔勦立斬六七十人餘

卽敗退入城十六十七兩日復約會江北大營
同時進攻瓜鎮余萬清親督兵勇四面攻擊逆
賊堅壁不出所有八卦洲淺閣木簿一座自將
賊船擊回不敢復來援應六合水勇管駕師船
各快艇並該縣划船自北岸上流潛行駛撲賊
簿各師船亦分兩翼偪攻施放噴筒火箭賊簿
上木城摧卸木簿亦卽漂散逆衆慌亂撲水焚

三
溺者頗多並將岸邊蘆葦縱火焚燒絕其竄陸
之路統計簿內賊黨不下三四百名焚溺擊殺
無一得脫者其金陵上方橋各賊營自我兵攻
徧南門後聚黨愈多防守愈密 臣飭令七橋甕
上方橋各營盤豎立投誠免死紅旗招降每日
投出脅從或數十人或十餘人不等訊明後皆
分別省釋免死酌給衣食並令其營前薙髮以

聞

招餘黨其金山賊簿亦恐下竄江陰通州等處
並飛咨托明阿及責成焦山水營周士法孫雲
鴻等嚴加攔堵不准稍涉疏虞奏入報

同日勝保奏言臣於八月二十四日親督兵勇
攻賊西南令兵勇各擁攔牌前進賊於城上密
放槍礮幸攔牌排齊兵勇有所遮護受傷尙少

集賢堂卷一百一十一
二

膽氣頗壯意欲於此處開空地道通至城根臣
以距城太遠非竭數晝夜之力不能成功隨令
撤回定於二十五日在東北面進攻時用大礮
轟擊賊匪不敢出拒當令各兵勇齊隊前進臣
親往示以地段分兩路開掘地道以破賊濠復
於兩路之中新築礮臺之前添修營牆一道牆
內安設木板填砌甄土仍照前此修築馬道寬

九尺高丈餘此法能立身於不敗之地功雖略
緩而人免受傷且得尺則尺得寸則寸總可直
達城垣乃該逆乘我興作之際屢次糾黨衝出
俱經我兵擊退傷斃不少自二十五日至今已
數晝夜更番未撤隊伍時時進攻苦於賊不出
戰專在死守其狡猾難破之勢我兵幾於無計
不施而賊之抵死相拒詭詐百出臣焦灼萬分

不得不堅忍熟籌以期節節攻進奏入

上命軍機大臣傳諭勝保曰該大臣攻勦高唐業經數月自應胸有成算乃自謂移攻西南或可得手旋又在東北面進攻游移兩可毫無定見卽以進攻東北而論亦祇用礮轟擊而已數月以來所籌辦者皆毫無成效不過每閱數日敷衍入奏以爲搪塞地步似此庸懦無能殊堪痛恨逆匪在高唐城內出入自由

並無阻隔其擄掠米糧招集黨與爲勢所必至我兵曠日持久師老力疲而賊勢未衰勦辦何能蕙事該大臣不思斷其接濟併力進攻惟以賊詭詐不出飾詞入告貽誤之罪豈能屢邀寬典勝保接奉此旨後若再不知奮勉朕惟執法從事決不寬貸

初九日 甲辰 僧格林沁西凌阿奏言逆匪屢次受

創心膽益寒九月二十四五等日疊出窺伺均

經我軍擊退二十七日該逆分水旱兩隊出巢
其旱路賊匪向 臣 僧格林沁及總兵經文岱營
牆交界處撲來因離濠較遠我兵未開槍礮該
逆亦未敢撲近其水路賊匪乘駕大船五隻小
船十餘隻向穆輅營牆奔撲是時夜黑如墨藉
有水光可以看視我兵擊槍以待該逆先用大
船一隻駛近營牆被水內木椿所阻該逆卽將

長梯搭於濠上先將梯上火彈引燃一片火光
逆衆隨卽一擁而上經營總富泰指揮官兵開
放槍礮奮力攻擊賊匪紛紛落水船上之賊不
能續登倚恃攔牌遮身藏匿不出我兵開放槍
礮擊打無不穿透其餘大小船隻爭向濠牆開
礮經穆輅西凌阿珠勒亨各帶官兵開放大礮
該逆傷斃及投水者不計其數二十九日由河

西連鎮擁出賊匪多名捨命攻撲瑞麟營盤瑞麟督飭官兵開放槍礮拋擲噴筒火彈該匪抵死抗拒臣僧格林沁與瑞麟當飭開放大礮從旁橫擊侍郎伊勒東阿擊其後隊三面齊攻斃賊無算該逆力不能支踉蹌敗退十月初五日東西連鎮突出賊匪千有餘名分路來撲總兵桂齡調集官兵鎮靜以待該逆離濠數武桂齡

指揮官兵一齊開放槍礮賊匪紛紛倒地我兵
勇氣百倍奮力攻擊旋有賊匪跪地乞降桂齡
察知其詐仍施放連環槍礮該逆始行敗退回
巢奪獲旗幟器械多件是夜陰雲密布該逆分
兩股出巢一股向正北一股向正南蠡擁而來
均經官軍擊敗回巢惟該逆窮蹙已極詭謀愈
多現在嚴守濠牆俟該逆切近開礮迎擊以期

得手奏入

上命軍機大臣傳諭僧格林沁西凌阿曰逆賊占踞連鎮數月之久疊經嚴旨催勦總未悉力進攻此次僧格林沁奏報雖據稱連獲勝仗仍係待賊攻撲出巢始行轟擊我兵並未離營一步實所不解該逆米糧斷絕前據僧格林沁言之鑿鑿茲閱所稱撲擾情形豈逆賊飢餓之餘尙能如此兇橫豈非該大臣爲人

所愚遽以入告耶此時河冰凍合所築濠隄斷不足恃且以困爲勦總須餉糈充足方爲可恃現在我軍既有凍餒之虞若再不速籌勦滅是賊未困而我軍先困何時始能蕝事事勢至此斷難再緩著僧格林沁等迅速設法四面併力進攻萬不准再延時日若復以損折官兵於事無濟等語巧爲搪塞是該大臣等有意遷延聽賊他竄貽誤之罪豈能屢宥儻各路

帶兵大員不知奮勉卽著該大臣嚴叅治罪

同日向榮奏言九月二十五日逆股二千數百人由觀音門衝出直撲棲霞一帶當派總兵德安帶兵追勦二十六日至橋頭地方該逆分三股迎拒德安督同守備李定太等三路兜圍擊斃賊匪無算至高資汛過河追擊該逆拌死迎拒守備李定太等帶勇突入賊隊適遇騎馬賊

目楊政潮率黨力拒被藍翎兵丁張得祿槍擊
落馬斬取首級我兵擁上連砍牌刀手四十餘
人都司蔣錫光等各帶兵分路抄截兇斬百數
十名該逆大股逃至馬步橋地面先是余萬清
派令候選道劉廷鏌帶勇一千名及遊擊饒永
福等帶兵五百名赴高資迎勦並派千總田宗
揚從九品卞乃諶等管帶兵勇埋伏永豐橋截

擊兼防金山木籜之賊前來援應一面飭令各營隊伍分門堵紮以截鎮賊出城接應及該逆由馬步橋翻山竄越其時劉廷鎮潮勇已由二十里鋪抄來迎擊立斃執旗賊目數名該逆遂分二股爭前衝突各勇兩面力堵復生擒賊匪七名斬首三十餘級適饒永福等亦由洪汛鋪馳至會勦該逆四散奔逃我兵分路跟擊俘斬

益多逆衆拋棄槍礮器械羸馬而走約有三四
百人直由江邊竄至新開河渡口田宗揚卞乃
謀率勇迎截擊斃黃衣賊目二名斬首二十餘
級生擒七十餘人朱景山銳勇亦馳至夾攻又
殲騎馬賊一名我軍乘勝痛勦逆衆撲入夾江
其時德安大兵已將馬步橋賊匪後隊追下會
同鎮營各軍合圍勦洗餘黨全潰余萬清又添

派遊擊米興朝等前來協助並會合勇練鄉團
追捕俘馘甚多二十七日德安復督令各兵勇
搜山又擒斬一百餘人將逆匪全股勦除淨盡
當二十六日余萬清派隊之後親督各軍分門
堵紮以截鎮賊出城接應該逆果於東南北三
門各出賊千餘撲來經我軍三面伏兵並起斃
賊前隊十數人余萬清督令各兵勇分左右抄

攻擊倒馬上一賊乘勢追壓斬首十餘級傷斃
多賊該逆又由北固山江邊抄出數百人適槩
船已駛過江邊開礮轟擊又斃一百餘名該逆
敗入城內至金山賊簿於二十七日突出千餘
人適被劉廷鎮帶勇截住殲賊多名周兆熊梁
成桂亦帶兵勇由七里港抄出合剿該逆亂竄
擁擠落水餘匪敗回正擬收隊金山賊簿復竄

出六七百人適兵勇搜山回隊當卽分投馳勦
殲賊五十餘名時瓜州賊船又由鮎魚套上岸
來助勇目謝錫九衝過賊中短刀相接砍倒黃
衣賊目一名斬馘多名生擒四賊該逆大夥敗
竄我軍過河追殺數十人餘匪已逃轉金山臣
仍責令余萬清乘勝力圖克復以勦爲防卽將
德安一軍撤回大營調遣日來又有賊出南路

殷巷一帶該處近接秣陵關尤爲入蘇衝要現已馳兵前往勦辦余萬清督兵鎮江大小百餘戰殺賊實已不少此次派兵截勦尤爲得手又連日接仗獲勝兵勇併力齊心似宜量子鼓勵奏入

上命軍機大臣傳諭向榮怡良曰此股金陵分出之匪經官兵卽時追殺悉數掃除不得與鎮江之匪會合

但該逆窺伺蘇常蓄謀已久余萬清將鎮城與金山木箠之賊連日攻擊均獲大勝該逆窮極思竄更屬可虞向榮當乘勝併力攻取金陵仍嚴絕該逆分竄之路所有趕赴句容防剿之游兵是否足敷堵禦不可以此次竄匪剿除殆盡不慮該逆故智復萌也怡良近駐常州尤應設法嚴防該郡所練之勇足恃與否界連鎮江之處如何扼守剿賊重任雖專責之向

榮而該督職守封圻尤不可令奔潰餘匪突入無事之境致遭蹂躪向榮一面督兵剋期收復金陵一面與怡良力籌大局設法堵截俾該逆無可旁竄毋稍大意余萬清現已加恩免其前罪仍著該大臣責令迅速圖功儻不能將鎮江趕緊克復甚至老師糜餉貽誤事機卽著從嚴叅奏

上諭內閣曰此次逆匪分黨應援鎮江之賊經大兵追

補全數勦除鎮江及金山之賊又經官軍痛勦連勝
是兩城賊匪不能互相救援計窮思竄正當嚴密圍
勦迅圖攻克向榮卽統領各軍力籌收復金陵責令
余萬清克復鎮江毋再遷延余萬清本係帶罪效力
之員自到鎮江督兵以來尙知愧奮所有原定罪名
著加恩寬免以觀後效兵丁張得祿著以把總拔補
在事出力員弁兵勇著該大臣擇尤保奏

同日曾國藩塔齊布奏言 臣塔齊布率湖南將
弁於九月十三日在鄂省拔營由武昌進勦大
冶之賊署湖北提督佈克慎副將王國才遊擊
阿達春從之以行候選道羅澤南亦於十三日
拔營由金牛堡分勦興國州之賊遊擊彭三元
都司普承堯等從之以行陸路之師副都統魁
玉總兵楊昌泗等於十七日拔營固原提督 臣

桂明已自楊店先至黃州水師前幫於初七日
起碇二幫於十三日起碇臣國藩於二十一日
再次黃州與北軍一會卽飭魁玉楊昌泗於二
十二日西出蘄水進勦蘄州之賊二十日羅澤
南等馳抵興國之鹽埠頭該逆分三路來撲羅
澤南彭三元由田隴中路進攻普承堯由傍山
左路進李續賓由沿河右路進四面圍抄殲其

前鋒數人賊遂奔潰薙髮逃生者十之四五餘
多回竄興國州二十一日羅澤南等派隊六成
仍分三路前進直薄州城由南門入搜獲僞知
州胡萬智凌遲梟示復捕獲餘匪二十餘名就
地正法該知州保忠亦帶近鄉練勇回城會同
安撫難民其大冶之賊臣塔齊布於二十日由
武昌縣拔營馳勦二十一日抵大冶城外該逆

整隊來犯臣塔齊布率兵由中路進王國才帶兵由南路進佈克慎等帶兵在北路埋伏鏖戰逾時賊衆大潰我兵由縣城北關追出南關斃賊約一千餘名餘賊爭橋過河橋斷爲追兵所偏落水溺斃又千餘名各營生擒逆匪一百三十四名興國大冶兩城同時克復各營水師分紮蘄州上游之赫花壕道士汛渭源口一帶十

八日探聞賊黨窺我水軍深入希圖抵隙來撲
楊載福彭玉麟等於十九日督同千總秦國祿
等各帶長龍三板自赫花寮出隊行抵蘄州對
岸賊船開出百餘號放礮迎敵我軍奮勇轟擊
逆勢不支卽行下竄我軍分戰船一半追赴下
游趨至距田鎮十五里之骨牌磯先後燒燬賊
船三十餘號轟斃賊匪無數其一半則攻擊未

開之賊船六十餘號一概燒盡轟斃逆黨甚衆
北岸陸軍未到州城未能卽復收隊回營該逆
畏南軍之勁已從下游渡竄北岸於田家鎮多
築土城掘濠數重又以木箒橫截江面阻我舟
師分賊數千踞守蘄州城內亦於臨江一面築
壘安礮拒禦水師臣塔齊布督同羅澤南尙在
南路搜捕餘匪臣國藩現紮道士汛相機審度

如果北岸之賊負嶠抗拒仍當令南軍渡江會
勦以期一鼓殲除

曾國藩又奏言探報該逆於田家鎮江面橫安
鐵鎖二道相距約十數丈鐵鎖之下排列小划
數十隻以槍礮護之北岸築土城多安礮位專
防我軍戰船該逆屢次大敗尙兇橫如此殊堪
痛恨臣等擬先攻田鎮對岸之半壁山奪其要

集賢堂不問卷二百八
三十一
隘則鐵鎖一岸無根當易拔去奏入

上命軍機大臣傳諭曾國藩塔齊布曰此次連克興國
大冶兩城南岸賊巢已破而蘄州賊勢尙衆水師旣
經攻勦得手何以桂明等陸路一軍未能趕到南軍
攻逼緊急則該逆必伺隙北竄朕早慮及此今覽所
奏各情適與朕前旨相符曾國藩經朕畀以勦賊重
任事權不可不專自桂明以下文武各員均歸節制

儻有不遵調遣或遷延畏葸貽誤事機者卽著該侍郎專銜叅奏以肅戎行該逆現於田家鎮築城空濠並於蘄州城外築壘安礮顯係意圖久踞此時進勦之計自屬北重於南該侍郎等擬令南軍渡江會勦並籌攻田鎮對岸之半壁山設法毀賊鐵鎖卽著相機速辦仍嚴檄催提北路官兵協同圍勦一俟蘄州收復應如何分兵南下直擣九江安慶並著隨時體

察情形統籌辦理以副委任

上諭內閣曰此次陸軍分途進剿同日克復興國大冶
兩城水師亦大獲勝仗卽著曾國藩塔齊布乘勢激
勵各路兵勇沿江夾擊以次殲除餘黨迅靖妖氛所
有在事出力員弁兵勇並著准其擇尤保奏

欽定勦平粵匪方略卷一百九 甲寅年

十月初十日乙巳托明阿陳金綬雷以誠奏言九

月十六十七等日金陵下關駛出賊船數十隻
遊擊葉常春等會同副將李德麟周希濂及向
榮所派之副將蔡應龍分幫截勦將賊船擊沈
多隻復與署六合縣溫紹原商議密備火攻子
母柴船裝載火藥於十七日夜間潛襲賊躡各

師船分兩翼圍攻施放大礮並擲放火罐火箭
頃刻延燒兵勇冒煙躍上賊箄殲戮無算餘賊
紛紛溺斃其屍水奔上南岸之賊復被兵勇追
殺多名木箄解散隨流漂蕩臣等以八卦洲賊
箄旣燬則鎮江之賊箄正可一律剷除且聞金
陵下關尙有賊箄七隻尤須防其下駛連日咨
商余萬清南北兩岸同時進攻瓜鎮並飭水師

南北策應兼勦賊鋒以牽賊勢十月初一日臣
托明阿復同慧成親督德興阿等由三汊河岸
分路進兵賊從土城內擁出數百人遊擊張維
義馬永泰等帶兵迎擊賊皆遁入土城臣陳金
綬會同雷以誠等仍由三汊河東岸及虹橋分
路進勦直抵賊營該逆僅出數十人隔濠拒戰
經官兵開放槍礮逆匪旋卽遁回初二初三等

日屢次進勦均有斬擒至焦山水營地處瓜鎮
下游孫雲鴻等督率遊擊張攀龍葉常春管帶
師船分爲兩隊一由南岸先攻鎮江北門甘露
寺一則徑由中流直偏七號口並用大礮攻塌
北固山迤西賊臺一半魯肅墳山上賊屋數間
兼擊塌賊隄數處現定按日進攻與陸路互相
接應臣等惟有竭盡血誠南北齊心同時並舉

力勦上游水陸應援之賊一面攻克瓜鎮一面
燬賊木簿又浦口洲地賊營及鐵鎖攔江之賊
船壘催武慶李德麟會同吳全美葉常春等紅
單拖罾各項戰船暨浦口六合水陸兵勇併力
勦除奏入

上命軍機大臣傳諭托明阿陳金綬雷以誠曰金陵賊
黨復連造木簿接續東下昨已諭令向榮等扼其分

竄之路惟向榮兵力僅能截其陸路而鎮江前此竄
泊之賊簿尙在卽九洲賊營及鐵鎖攔江之賊船
亦未勦除終無了局著托明阿等趕緊督率水陸將
弁克復瓜州勿再遷延其浦口洲地賊營並著嚴飭
武慶等併力攻勦托明阿等與向榮雖各統一軍仍
當聯絡一氣互相策應此次擊焚船簿之水營將備
等登岸協勦尙屬奮勇著卽酌保數員以示獎勵

同日和春福濟奏言廬城賊匪被勦計窮一味
堅守九月十八日五鼓 臣等督率吉順嵩瑞等
帶領官兵潛伏而進攻至午刻得勝門突出賊
匪千餘人經常清江忠濬程智泉帶領兵勇直
前擊勦立斃多名賊勢大潰飛奔入城二十五
日珠克登帶領官兵並知會常清等飛飭楚廣
各勇在得勝門外一帶駐紮該逆正在挖築土

壘我軍兩面夾擊該逆紛紛敗逃得勝門突出
賊匪千餘人意在救護經程智泉江忠濬等帶
勇盡力攻擊旋拔去木椿立將所築土壘平毀
二十八日賊匪在濠邊栽置梅花椿經珠克登
督率官兵擊斃賊不計其數隨將梅花椿拔
去奏入

上命軍機大臣傳諭和春福濟袁甲三日該提督等圍

勦廬州賊匪將及一年總未能出奇制勝立破賊巢
貽誤遷延罪將誰誘著卽迅籌進勦之策督飭將弁
克復堅城一面嚴催秦定三忠泰等速將舒城等處
賊匪掃除淨盡毋再遲延干咎湖北興國大冶已經
收復曾國藩等水陸各軍指日東下應如何聯絡接
應之處並著統籌兼計以期會合夾擊速清醜類
和春福濟又奏言廬江自克復以後賊匪復由

無爲巢湖等處窺伺竟敢屯聚攻圍縣城甫經
收復練勇無多守禦倍形竭蹶臣等前飭道員
何桂珍帶領開化等處勇五百名馳赴廬江安
撫防禦雖據該道稟稱已令州判蔡鏗等帶勇
四百名馳抵廬江救援而該道帶兵起程多日
尙未據報到廬難保非有心逗留應請

旨將何桂珍先行交部議處奏入

上諭內閣曰何桂珍著先行交部議處如查有畏葸遷延情事卽著嚴叅懲辦

十一日丙午曾國藩奏言臣自入鄂以來據官吏

將弁紳庶僉稱武漢再陷之由實因崇綸台湧多方貽誤百姓恨之刺骨而極稱前督臣吳文

鎔忠勤憂

國殉難甚烈官民至今思之蓋緣吳文鎔於上年

九月十五到鄂接印之日卽值田家鎮兵敗闔
城逃徙一空官弁蒼黃無計吳文鎔傳集僚屬
誓以死守卽日移居保安門城樓隨身僅一僕
一馬無書吏幕賓無親兵夫役晝夜手治文卷
衣不解帶者兩月由是人心稍定潰兵稍集賊
匪仍退下游不敢徑犯鄂垣乃崇綸輒劾奏吳
文鎔安坐衙齋閉城株守其實該前督日夜住

宿城樓並未在署少住片刻也賊匪所恃以駭
人者全憑船隻之多官軍若無舟師雖有陸兵
數萬亦熟視而無可如何自上年田鎮失防以
後吳文鎔江忠源二人與臣往來書函皆以籌
辦水師爲第一要務臣在衡州試造戰船吳文
鎔屢函熟商造船配礮選將習戰之法臣歎以
爲不可及其言湖北現僅雇小划擺江之類不

堪戰陣必待 臣處舟師辦就駛至鄂中始克會
同進勦亦係實在情形乃崇綸茫然不察動云
船礮已齊譏督 臣畏蒞不出吳文鎔素性剛介
深以畏蒞爲恥遂發憤出征以屢潰雜收之兵
勇新募未習之小划半月不給之餉項倥偬赴
敵又居者與出者不和事事掣肘遂使堵城之
役全軍潰敗湖北府縣相繼淪陷蓋未始非崇

綸叅劾傾陷有以致之也尤可異者當叅劾之
後吳文鎔毅然出征崇綸復率僚屬力阻其行
我

皇上曾嚴飭其自相矛盾迫堵城旣敗吳文鎔殉難闔
省軍民人人皆知而崇綸以不知下落入奏不
惟排擠於生前更復中傷於死後正月十九日
崇綸遣守備熊正喜至衡州一帶催臣赴鄂救

援僞造吳文鎔咨文借用布政司印信咨內但
稱黃州賊勢猖獗並不言堵城已敗督臣已死
種種詐僞故作疑似之詞無非謂吳文鎔未能
殉難誣人大節始終妒害誠不知其是何肺腸
吳文鎔旣歿青麀幫辦軍務崇綸又與之百端
齟齬求弁兵以護衛而不與請銀兩以製械而
不與或軍務不使聞知或累旬不相往還青麀

在長沙時與臣言及崇綸之多方掣肘台湧之坐視不救輒爲痛恨怒眦欲裂上年張亮基欲以全力堵田家鎮崇綸旣阻撓而不合繼又傾擠吳文鎔旋又忌害青麀皆使銜恨於地下平心而論鄂省前後潰敗決裂之由不能不太息痛恨於崇綸也自賊踞漢陽漢口爲老巢由是西至宜昌北至德安南犯湘省三次攻陷岳常

豐州縣志卷之四
九

豐州縱橫百餘州縣蹂躪殆徧廬舍蕩然崇綸
閉坐一城若罔聞知土匪擄掠亦置不問所失
國家土地並不一一詳奏百姓之言皆曰青巡撫
在此尙有兵勇驅賊之擄掠尙有告示憐民之
疾苦崇巡撫並告示而無之我

皇上優容臣下僅予革職崇綸稍有天良亦當以一死
圖報及六月初二日武昌城陷隨衆軍逃出轍

轉偷生反稱革職回京已於前一日先出鄂城
呈請轉奏身爲封疆大臣無論在官去官死難
是其本分卽不死亦不妨明言似此倒填月日
諱其城破逃生之罪劾人則雖死而猶誣之處
已則苟活而故諱之豈非無恥之尤者哉臣自
入湖北境以來目擊瘡痍博訪輿論莫不歸罪
於崇綸以年餘之成敗始末關繫東南大局不

集三真圖之田老二百一
敢不據實縷陳其應如何聲罪嚴究

聖主自有權衡非臣所敢擬議

同日正白旗滿洲都統薩迎阿副都統玉明基
溥奏言遵查已革湖北巡撫崇綸會否到京據
該旗參領文廉署佐領雲騎尉景豐等結稱據
崇綸之胞弟筆帖式崇縉稟稱接到崇綸來信
云於五月二十八日接奉革職

諭旨六月初一日起行因路梗繞赴荊州患病未愈復由荊州赴陝西就醫至陝又患瘡疾一俟稍痊卽行回京臣等復將崇縉傳到面詢與該參領佐領所稟無異均奏入

上諭內閣曰崇綸經朕簡任湖北巡撫上年賊擾田鎮不能與前任總督吳文鎔共籌戰守丁憂後留辦防勦復與巡撫青麀不能和衷協力共保省城經朕革

職示懲宜如何愧奮圖報乃當武昌失守輒卽逃往
荊州偷生避難實屬昧良負恩茲據該旗查明該革
員現在陝西就醫著王慶雲派員押解來京交刑部
候旨訊辦

十二日 丁未 楊需奏言下游追剿賊匪疊獲勝仗

收復大冶興國兩城其崇陽縣前經克復忽有
賊匪由通山竄至復行失陷臬司胡林翼署蒲

圻縣孫守信帶勇往剿該匪等復竄往通山胡
林翼窮追截勦徧搜山谷斬殺甚多餘俱散竄
崇陽民風惡劣匪類至多胡林翼帶勇暫駐督
率城鄉紳士嚴行保甲趕辦團練責令將從前
莠民執送悉予駢誅隱匿者查出連坐團練不
力者罪之業已辦有端緒可冀肅清臣已遴員
馳赴通城通山崇陽興國等處署理妥爲安輯

撫綏奏入報

十四日酉己向榮奏言十月初二日金陵賊匪三

千餘人由南路竄擾殷巷馬木橋一帶臣派副

將張國樑等帶領兵勇馳往截勦我兵趕至該

逆已竄抵秣陵關餘仍竄回南門張國樑等兵

繞道徑趨殷巷轉落賊後當經加撥勁兵一千

名星夜馳往並飛檄鄧紹良分兵六百名由小
丹陽前來會剿張國樑等馳至秣陵關後分三
路進兵該逆排隊出敵我軍用連環槍礮攻擊
立斃賊匪數十名後隊分兩翼抄近關前用擡
槍先將該逆大黃旗擊倒各兵勇乘勢殺上賊
衆敗入關內張國樑卽從街頭奮勇躍上房屋
兵勇繼登拋擲火罐噴筒燒斃賊匪無數該逆

見我兵已入關內前隊驚潰相率由北關口衝
出先經王浚督領兵勇在關外廟牆埋伏抄截
立時斬馘一百有奇張國樑率同五品頂戴李
振甲把總會魁等分投追殺復殲賊三百五六
十名生擒二百餘名最後竄出之賊經我軍四
面圍剿紛紛撲入塘水擊殺甚多餘黨正圖外
竄適王浚等破柵殺入短兵巷戰連砍黃衣賊

多名張國樑又率勇兜擊該逆乃由大家橋竄
出各兵勇跟蹤追斬又斃一百餘名生擒四十
餘人撲水淹溺不計其數其逃逸過橋之賊均
被後隊兵勇截殺無一得脫者並將竄伏關內
房屋餘匪搜捕淨盡放出擄脅難民四百三十
餘人統計殺斃賊匪八百餘名割獲首級耳辮
三百三十四件生擒二百六十八名焚溺者無

算訊問生擒之賊內有僞總制盧得汰僞百長
黃義瞬僞司馬張公惠三名供稱此股賊首係
僞國宗韋潰詳僞提督石明開僞承喧許茂林
僞指揮曾孟漳四人皆廣西老賊韋潰詳先已
被槍擊斃石許曾三賊均被亂兵殺死並有欲
占踞秣陵關紮營以圖窺擾東南並擄多人入
城等語餘亦供認賊黨不諱當卽分別正法省

釋脅從二十餘人至鎮江自前月大獲勝仗初
二三等日賊復令金山木簿之匪及城內黨與
出巢窺擾經余萬清派隊接戰相機攻勦兩日
復殺賊約三百餘名生擒十八名斬首九顆陸
路堵勦尙屬得手惟水路未能扼截探聞賊復
連紮木簿續竄下游現已責成李德麟等師船
盡力堵勦留署六合縣溫紹原會同艇師嚴防

下竄仍催吳全美等趕緊帶船迎剿以清江面
而扼上游奏八報

十五日庚戌陳啟邁奏言現據探報湖南水陸各

軍已抵湖北省城卽經飛飭總兵趙如勝等將
戰船子母船飛駛出湖會同截剿旋准前禮部
侍郎臣曾國藩咨武昌漢陽均已克復擬卽乘

勝窮追埽清江面江省礮船應堵截湖口豫備
會合攻勦直擣下游又經轉行遵照並派通判
程迪昌等帶勇四百名由陸路馳赴湖口以爲
水軍聲援據趙如勝等稟稱本月十九日起程
前往下游相機堵截至建昌德安股匪已次第
殲滅武甯匪徒亦經官兵痛勦先後斬擒三千
餘名敗匪竄回興國州境內武邑橫路一帶與

興通毗連處所經已革守備吳錫光帶勇千餘
名前往搜捕餘匪安撫居民勸辦團練以期一
律肅清惟九江之賊仍踞城中亟宜乘此聲威
迅速攻勦現飭千總王樹英帶勇二百名由都
昌赴潯候選縣丞項松慶等帶勇三百五十名
由武甯前往隨同九江鎮總兵居隆阿等先行
進攻又飭龍泉營都司馬占魁率領弁兵暨候

補知州陽秉鏞赴武邑籌辦防守及一切善後
事宜臬司惲光宸督同吳錫光馳赴九江策應
務期揜渠埽穴收復郡城與湖口舟師相爲犄
角以扼江路奏入報

十六日 辛亥 曾國藩塔齊布奏言 臣等於克復興

國大冶後定議先據半壁山富池口兩處 臣塔

齊布於九月二十八日自興國拔營紮富池口
羅澤南進紮半壁山本月初一日整隊進發羅
澤南李續賓各帶兵勇行抵馬嶺坳距半壁山
賊營二三里見該處孤峯峻峙俯瞰大江與田
鎮諸山相雄長上紮大營一座小營四座空溝
深丈餘闊三四丈不等引內湖之水環灌之溝
內豎立礮臺木柵溝外密釘竹籤賊出接仗千

總何如海中石陣亡賊衆愈聚愈多兇猛異常
我軍血戰三時之久羅澤南與知縣李杏春從
左隄衝進李續賓從右隄衝進殲賊數十名賊
衆大敗乘勝直逼賊營從木柵竹籬中踰溝而
入彭三元分途截殺普承堯亦從右坳抄出圍
住賊營各勇追至江岸賊急登舟我軍搶入舟
中斃匪數千覆舟溺斃者亦不下千人浮屍蔽

江賊懼我軍飛渡自將浮橋拆斷我軍申刻收
隊查明各勇陣亡者計十三人水軍自九月十
九日戰勝後分紮渭源河兩岸二十九日營官
白人虎等駕戰船十餘號往下游巡哨風平水
溜將近蘄城該逆猝出船百餘號圍擊我軍小
挫左營彭玉麟右營楊載福親往救應中營秦
國祿等各率快蟹長龍等大船排轟而下哨官

任星元李陞元鮑超等傍南岸而行衝至蘄州
以下之釣魚臺逆擊而上將賊船裹入中段該
逆倉猝不能退轉紛紛棄船登岸我軍自上而
下者攢礮以轟登岸之賊自下而上者縱火焚
釣魚臺之賊船是日上犯之船悉數焚奪無得
脫者計燒賊船約八十號奪獲賊船大小四十
六號巨礮六十三尊白人虎因初時小挫復得

大勝憤極戀戰中槍殞命巡檢石熾然監生徐
國本奮往助陣同時遇害賴大隊前往救應水
軍復向岸轟擊始將陸賊擊退伏查該逆自武
漢敗竄卽全數防守田家鎮蓋以南岸之大冶
興國北岸之蘄州廣濟向爲衆賊淵藪而田鎮
與半壁山又實爲天然之關隘故上游之賊併
萃於此復自下游江皖糾集長髮悍賊來此拌

拒阻我東下之師現在鐵鎖尙牢繫江心兩岸
賊衆尙近四萬計日內必須大戰數次 臣等謀
定後發斷不敢稍涉疏虞此次與該逆爭此關
隘水陸幸均獲勝所有在事出力員弁兵勇懇
恩酌量保獎白人虎集團倡義收復華容縣城茲又奮
勇捐軀請與千總何如海巡檢石熾然監生徐

國本仰懇

聖恩分別議卹奏入

上命軍機大臣傳諭楊需曾國藩塔齊布陳啟邁曰陸路官軍踏破半壁山賊巢雖已據守險隘而蘄州未復田鎮未破兩岸賊衆尙有四萬餘人儻江西戰船一時未能出湖湖北後路官軍相距又遠曾國藩等孤軍轉戰卽屢次獲勝亦尙可虞前此楊需奏請親督後隊會合下擊至今未見起程現在夏廷樾是否

到省武漢等處布置事宜當已漸次就緒北路桂明
一軍總未會合非楊需親督後軍前往接應恐此路
輒弱塔齊布以一路兼顧南北兩岸愈形支絀著楊
需迅督官兵妥籌進剿爲曾國藩等後路聲援下游
九江一帶昨據陳啟邁奏已令趙如勝等各帶戰船
堵截湖口豫備攻剿並飭居隆阿等先攻郡城儻該
省戰船能出湖口溯流而上迎頭攔擊亦可爲曾國

集賢堂卷一百一
三十一
藩等前路接應著卽妥籌聯絡不可各防各境致湖南官軍前後無援是爲至要

上諭內閣曰湖南水陸兩軍均獲大勝將半壁山賊巢踏毀我軍已據形勢著曾國藩塔齊布督飭各軍迅復蘄州將潯皖各境賊匪悉數埽除所有在事出力員弁兵勇著該侍郎等查明據實保奏營官白人虎著照守備陣亡例議卹千總何如海著照守備例議

卹巡檢石熾然著照例議卹監生徐國本著照從九品例議卹

同日托明阿陳金綬雷以誠奏言金陵尙有賊
箚於本月初五日下駛二隻中藏大船環以木
箚上立木城暗藏礮位由南岸大溜衝下臣托
明阿飛催各師船上駛迎擊經陳世忠等儘力
轟擊賊抵死抗拒追至儀徵沙漫洲將賊箚大

梔擊壞兩箠連合爲一適陳國泰由土橋督率
遊擊陳世章等管駕紅單船暨已革儀徵縣知
縣都榮森等帶領快船划船各水勇同時上駛
總兵李志和等督率馬步官兵在北岸沙灘列
隊以待我船駛至泗源溝江面值賊箠奔竄當
卽會合上下夾擊天色已暝東風大作潮汎上
湧賊箠猝遇逆風頂潮運動不靈兵勇水勇上

下攔截各船圍攻不息至初六日黎明將賊箠
攻至對江李家溝口四面圍定槍礮齊發賊勢
不支都察森恐賊由南岸奔逃先派水勇過江
在李家溝各要隘分投埋伏賴鎮海盧瑞祥首
先攔近賊箠施放大礮將箠攻破轟斃落水之
賊約數百名餘賊有鼻水竄上南岸奔逃者又
經兵勇撿斬無遺當將賊箠二隻全行奪獲臣

托明阿因上游尙有賊箚防其下駛一面飛催
水師迎截一面與臣陳金綬等仍分東西兩岸
進攻瓜州臣雷以誠會同慧成於初六日督率
師船進勦先攻北固山龍窩一帶開礮擊賊隄
上土城紛紛倒塌燬其大黃旗望樓一座且攻
且進駛至金山循環轟擊逆匪擾攘驚呼墜江
者不計其數維時運河口瓜州小口兩處逆匪

分駕賊船二十餘隻趕來援救各艇分投開礮擊沈八隻賊匪淹死甚多餘賊收船入口死守礮隄旁有賊箠爲之掎角各艇兵勇奮力追勦疊開大礮將瓜州土城賊臺擊塌一處並將大箠上敵樓一座登時轟塌復擊毀沿江賊隄數處申刻收隊查點兵勇受傷無多實爲江上出色之戰奏入

上命軍機大臣傳諭托明阿陳金綬雷以誠曰水師攻
剿賊箝賊船均獲大勝可見賊衆雖聯爲一氣我兵
果能無分南北協力環攻該逆卽有應接不暇之勢
若乘此機會上下夾擊成功更易該大臣等惟當併
力攻勦瓜州或用聲東擊西之計先將金山奪回去
其犄角卽可扼截鎮江斷其應援何得任令該逆堅
匿不出不思力圖進攻其浦口洲地賊營負嵎日久

陸路既有武慶獨當一面水師復有李德麟等艇船若不嚴飭該總兵等實力勦辦仍前遷延貽誤托明阿亦斷難辭咎現在上游師船節節下徧皖江賊衆勢必分赴下游卽金陵大股亦必亟圖旁竄江面自浦口以下尤應嚴密攔截以杜該逆奔突之路著托明阿迅卽攻克瓜州並飛飭武慶等疾擣浦口賊巢仍隨時與向榮會籌扼勦之策就近飭令余萬清圍

攻鎮城嚴防逆眾潛竄常蘇並與江北官軍聯絡聲
勢互相策應

論內閣曰金陵水師兩日之間攻燬江面賊簿並江
浦兵勇擊退上游賊船均獲大勝正當嚴密圍剿迅
圖掃蕩該大臣等務卽督催水陸各路兵勇趕緊將
瓜州浦口各賊營賊簿悉數攻燬淨盡毋再遷延致
令乘間竄逸所有在事出力文武員弁兵勇及上次

協勦南岸逆匪各員弁均著該大臣等擇其尤爲出力者分別併案酌保候朕施恩

十八日癸丑吏部奏言遵議安徽甯池太廣道何

桂珍處分何桂珍帶勇馳赴廬江起程多日未據報到難保非有心逗留請照任意耽延降一級調用例降一級調用奏入

上諭曰安徽甯池太廣道何桂珍著照部議降一級調

用仍著暫留本任交和春等軍營差遣以觀後效

欽定勦平粵匪方略卷一百十 甲寅年

十月二十日 乙卯 托明阿陳金綬雷以誠奏言洲

地賊營屢攻未拔本月初八日武慶等督率營
總都隆阿等分帶兵勇由金湯門外五路前進
拔去木椿竹籤搭蓋浮橋指麾兵勇直攻賊之
大營該逆大股出巢兵勇齊開槍礮殲斃賊匪
一千餘名王巨孝等帶領火箭火毬官兵繞道

拋燒徑搶賊營分兩翼圍抄江浦六合等兵勇
亦分東西兩路協攻殲賊三百餘名署把總馬
馨等由西面徑爬土城各兵勇四面拋放火毬
火箭破賊大營一座殲斃數百名金陵逆匪爭
駕礮船來援向榮委員蔡應龍等督帶紅單拖
舂艇師各船上駛迎截擊沈賊船多隻殲斃無
算武慶等卽駐師江干皆勉禮與鄧鳳林等連

夜趕回江浦溫紹原亦同秦懷楊等回守縣城
初十日我師水陸並進槍礮箭彈四面齊發賊
勢不支紛竄出營兵勇沿途追殺伏屍徧地餘
賊逃至江邊撲溺水中不計其數逆船被水師
擊敗駛回南岸奪獲大小礮位軍械火藥甚多
洲地全行廓清賊營兩座毀爲平地至瓜州賊
匪勾結鎮江逆黨撲至儀徵都天廟一帶經總

兵李志和等帶隊過河截勦賊黨敗竄我師追至土橋四里鋪賊已分股空濠築牆紮營二座該鎮等分路圍攻臣托明阿派署遊擊滿祿等分帶滿漢官兵由樸樹灣一路進攻土橋與李志和儀徵一路官兵互相援應仍與慧成德興阿等由三汊河分路進攻馬橋瓜州該逆亦分股出拒千總崔萬雲衝入賊隊殲斃數賊該逆

紛紛倒退崔萬雲乘勢徑越賊濠猝被礮傷陣
亡把總梁成通隨往策應中槍殞命該逆復向
我師撲來適署遊擊照信知縣都榮森等督率
各勇馳至協同官兵直前截勦徑撲賊營用槍
礮轟擊土壘斃賊無數是日陰雨泥滑步騎俱
難施展照信都榮森步行陷入重圍抽刀奮勦
各手刃數賊身受多傷與委防禦凌福等同時

陣亡遊擊張維義帶漢中兵從北路接應始將
賊匪擊退十一日臣托明阿督同各隊官兵由
西岸迎勦臣陳金綬雷以誠與慧成由東岸進
攻該逆遁入瓜州土城西岸官兵立將賊營攻
毀臣托明阿復督率滿漢官兵於十二日黎明
合攻土橋賊營李志和等由儀徵前進滿祿等
由樸樹灣前進將大小賊營二座全行轟破殲

賊無算十三日臣等由汧河兩岸進攻賊於兩岸各出數十人誘戰經官兵開放槍礮擊斃多名餘悉遁回堅守不出此次陣亡各員應請

飭部從優議卹奏入

上命軍機大臣傳諭托明阿向榮陳金綬雷以誠曰洲地賊營焚燬淨盡土橋四里鋪等處賊壘亦未容其紮定辦理尙合機宜惟上游蕪湖一帶需船甚急所

有前項紅單艇船並續撥之陳國泰紅單船自應仍
前上駛以斷金陵賊匪來路鐵鎖攔江之賊船尤應
設法剿除此時上游形勢以師船進扼蕪湖爲要下
游形勢以師船力奪金山爲要和州烏江一帶賊船
本恃洲地爲聲援今洲地已除該處是否尙有賊蹤
亦著知照袁甲三妥爲防剿浦口地方仍責成武慶
等嚴加防範

上諭內閣曰洲地一律肅清賊營悉成平地所有在事
出力文武著准其擇尤酌保數員無許冒濫瓜鎮逆
黨糾夥撲至土橋及儀徵四里鋪地方紮營築壘均
經該處文武奮勇攻勦一律毀除已革江蘇儀徵縣
知縣都棨森身受重傷力竭捐軀著開復原官與同
時陣亡之叅將照信守備楊明經外委祁登瀛千總
崔萬雲把總梁成通委防禦凌福阿克吉哩外委宮

立幹張大鵬勇目侯如均著交部從優議卹

二十二日丁巳曾國藩塔齊布奏言臣塔齊布自

興國拔營與羅澤南分爲兩路羅澤南西往半

壁山臣塔齊布東往富池口初一日夜宿南邨

初二日行至軍山嘴值該逆分股來撲隨督叅

將周鳳山等奮力擊退焚燒富池口賊營一座

卽在軍山嘴紮營與羅澤南之營相去十餘里

中隔小河初四日臣塔齊布遣人搭造浮橋以
通兩營之路羅澤南派隊接應數路逆黨二萬
餘人排列山之左右氣燄甚張羅澤南駐高阜
之左李續賓駐高阜之右遊擊彭三元等排列
江岸都司普承堯等排列馬鈴山左坳堅伏不
動俟賊銳氣旣竭我軍突起急攻連斃大旗賊
目餘衆盡靡反奔半壁山舊營賊船概歸北岸

我軍將南岸賊營盡數焚燬遣壯士百餘縋崖而下將橫江鐵鎖六條竹纜七條盡行斫斷日暮收隊是日臣塔齊布亦隔港對擊斬獲頗多該逆經此大創猶復積忿思逞初五日從田家鎮渡江來犯先撲臣塔齊布營壘當率遊擊阿達春等迎擊羅澤南李續賓由左路出半壁山下彭三元扼截江岸普承堯據守馬鈴山一路

賊忽搶踞山岡羅澤南奮力衝擊李續賓由山坡抄來賊始敗潰追至江邊臣塔齊布亦已追至該逆見官軍盡赴下游遂開船百餘號從上游登岸彭三元等奮勇堵截賊復揚帆上行至牛灌磯對岸各勇沿江追擊羅澤南等復從半壁山下游來援斃賊多名該逆悉數敗歸初八日彭玉麟後營蕭捷三等因移營之便順攻斬

州賊船哨官蕭世祥中礮殞命鏖戰之際釣魚
臺下有逆船數十號開竄我軍分船追勦燒燬
二十餘號乘勝進紮骨牌磯初九日蕭捷三營
燒賊船八隻各營共燒十餘隻賊舟堅伏不出
初十夜乘大風挂帆遁去伏查該逆以東西梁
山爲江南門戶以田家鎮爲安徽門戶併力與
我爭此關隘 臣等定計先奪南岸之半壁山次

攻江面之船然後合攻北岸之賊幸仗

天威南岸業經奪取北兵不甚得力俟江面勦辦得手
卽當調南兵渡江會勦務期速破此關庶退可
以固守兩湖進可以規復江皖此次水陸鏖戰
將士用命應請立沛

恩施以昭激勸其餘出力員弁兵勇仰懇

聖恩准臣等擇尤保敘以勵戎行外委蕭世祥請

飭部從優照千總陣亡例議卹

曾國藩塔齊布又奏言查自岳州以下久爲逆
匪占踞軍中信息難通目下臣營摺報仍須專
人送至漢口方能交驛至與金陵揚州各營通
信須專差赴江西轉由浙江繞道前進動須數
月之久前因粵省紅單船已至東西梁山不勝
欣喜頃聞又折回江浦爲之疑慮屢經查探終

未深悉其詳合無仰懇

皇上天恩凡江南揚州各營現在情形及紅單船現泊
何處飭令軍機處於

諭旨交寄之便隨時示知一二其安徽廬州等處臣廣
遣差探隨時知照奏入

上命軍機大臣傳諭楊需曾國藩塔齊布曰曾國藩等
奏南路陸軍斃賊萬餘斫斷江中鐵鎖並水師屢獲

勝仗覽奏稍慰朕懷我軍陸路奪取半壁山水師亦
屢獲大勝逆賊不敢復窺南岸辦理甚爲得手惟蘄
州之賊堅匿不出田鎮亦未克復北岸情形甚爲喫
重究竟桂明一軍現在何處何以總未與南軍會合
前諭令楊需親督後軍前往接應此時是否已經起
程曾國藩等孤軍深入甚爲可慮著楊需迅速前進
爲曾國藩等後路聲援田鎮爲皖省門戶逆匪必圖

久踞前次曾國藩等奏北路兵勇未能會合夾擊當
諭令曾國藩節制諸軍如有不遵調遣貽誤事機者
卽著專銜叅辦乃此次桂明等仍未會同勦賊如不
得力卽著曾國藩嚴叅懲辦此時江面已可漸就肅
清務當趁此聲威迅調南兵渡江會勦剋日收復蘄
州田鎮卽可分路直擣下游並隨時知照江西安徽
水陸各軍互相策應毋失事機江南揚州各營情形

並紅單船現泊何處已諭軍機大臣將近日兩處奏報及所奉諭旨擇要摘錄封寄矣

上諭內閣曰此次水陸疊勝將士用命以少擊衆殺賊逾萬洵屬調度有方著曾國藩等乘勝卽將蘄州田鎮速行克復順流直下以次掃除江皖各賊迅殄妖氛浙江甯紹台道羅澤南著賞給葉普鏗額巴圖魯名號直隸州知州李續賓著記名以知府用並賞給

摯勇巴圖魯名號遊擊彭三元著以叅將升用都司
普承堯著以遊擊升用並先換頂戴其餘出力員弁
兵勇著曾國藩等一併查明保奏卽補外委蕭世祥
屢著戰功此次奮勇捐軀深堪憫惻著交部從優照
千總陣亡例議卹

同日袁甲三奏言皖省軍務北路十分喫重廬
江於九月二十五日復被賊陷曾國藩究竟行

抵何處無從確探 臣已專差妥人向楚皖交界一帶探迎以便約會進取至全滁一路偏近江岸先經飭令廬鳳道張光第約會署臬司恩錫並江全各處兵勇併力攻勦疊據各州縣探報並該道督飭帶兵文武親赴江岸周歷數十里確見鍼魚嘴駐馬河石蹟橋及烏江一帶賊營聯絡直接東西梁山船隻停泊難以數計張光

第所帶之兵除駐守關山外僅一千二百餘人
該逆分踞江面百餘里背水爲營非水陸夾攻
恐一與官兵交仗勝則舍舟而陸大隊羣來敗
則解纜而逃隔岸難及現已飛咨向榮迅飭師
船上駛九洑洲賊營已破且橫江之鎖亦令趕
緊翦除儻能各路齊攻似尙不難得手臨淮存
營兵勇僅千名六安現無一兵正陽亦僅二百

餘名前與和春福濟商令駐守正陽之潁州兵
五百名因帶兵官遊擊武全先到廬州經和春
等派赴舒城助勦急切不能分撥因思湖北旣
已肅清豫省南路防兵是否就近進勦駐紮六
安正陽一帶以壯聲威而資防守 臣亦難以遙
度此外有無可以調撥之處統乞

聖明迅賜施行奏入

上命軍機大臣傳諭袁甲三英桂曰皖北軍情喫重福
濟等力難兼顧袁甲三派往馳剿之兵勇自應與河
南官兵會同剿辦惟占踞廬州舒巢之賊久未就殲
廬江復陷北竄最爲可虞六安現無一兵正陽兵力
亦僅二百餘名雖有袁甲三專駐臨淮恐不足以資
控扼此時河南南路所撤防兵著英桂體察情形酌
量派往六安正陽一帶相機截剿

二十三日戊午僧格林沁西凌阿奏言連鎮逆匪

節次被創心膽已寒近日陸續投到多名並有
割取長髮首級來降者據供賊勢甚爲窮蹙恐
官兵乘隙進攻復將壁壘加厚死力拒守又向
詢出李開芳曾向林鳳詳約定如同援時夜間
施放噴筒火彈爲號等語十九日申刻臣卽令
馬隊千名攜帶旗幟由北而南僞作援賊之狀

並派參領穆騰額帶兵數名於夜間由大王村
沿路施放噴筒火彈向桂齡圍牆奔撲臣西凌
阿督同珠勒亨等帶領馬隊會同慶祺桂齡在
南營牆豫伏其餘各營官兵在分防處照常傳
號傳籌並派參領玉亮帶領歷次投誠之人扮
作長髮賊在桂齡營牆等候二十日寅刻穆騰
額施放火彈噴筒撲及慶祺桂齡營牆官兵卽

連開槍礮作爲迎敵之勢玉亮卽帶各勇將豫積柴草焚燃牆外火光騰起玉亮攜帶假充長髮賊甯宗陽等手執黃旗在圍牆上吶喊向內招呼賊正攀拉樹柵向牆上盤問甯宗陽等卽以高唐前來援救之語回答逆壘中歡聲鼎沸卽見南面木城之賊全行撲來連鎮之賊相繼而至桂齡恐有疏失當卽暗傳號令開放連環

槍礮登時閒逆匪紛紛倒地該逆始知中計踉
蹌回竄我兵趁勢轟擊傷斃逆匪無算二十日
投出難民供稱該逆已將呂公車拆卸仍搭浮
橋現又造有三四丈長梯數十架並欲向旱路
奔撲臣等已諄飭各營統帶加意嚴防並另作
籌畫趕緊圖維迅速蕩平以慰

聖
塵奏八

上諭曰有此機會惜斃賊不多攻營吶喊該逆前未奔撲迨告以援賊已至始行出巢汝之布置殊覺可惜況此事豈能再行著仍行實力進攻出其不意盡數殲除勿徒延時日不但於賊無大傷且恐另生他變上命軍機大臣傳諭僧格林沁西凌阿曰此次我軍誘賊出巢擒斬多名布置頗費經營但南面木城之賊全行撲來連鎮之賊亦相繼而至正可乘其不備四

路進攻爲一鼓殲除之計失此機會殊覺可惜該逆
日久思竄愈急旣造梯選勇有由旱路奔撲之意該
大臣務嚴飭各營一面實力進攻一面防其奔竄現
在天寒冰結我軍僅恃長隄萬一逆賊乘閒突出貽
害何可勝言該大臣等其迅圖勦洗斷不可再事遷
延致滋他變

二十九日甲子曾國藩塔齊布奏言該逆安置鐵

鎖之法與吳人成法不同吳人於南岸鑿石穿鐵江中無物承之故一處鎔斷全鎖皆沈該逆則節節用小船承之中有木箒三架船與箒之頭尾皆用大錨鈎於江底鐵鎖四道橫於船箒之上以鐵碼鈐之雖南岸斫斷一節而其數十節仍牢繫如故自本月初六以後該逆復將南岸一節續行鈎聯於半壁山下箒上安礮船上

置槍以防我舟師之進偪箠上鋪沙船中儲水以防我火彈之延燒自鐵鎖以上皆賊之戰船大小約三四十號自鐵鎖以下皆賊之民船灣泊約六十里大小約五千號其北岸則於田鎮街外築一土城長約二里街尾爲吳王廟賊營一座繫鐵鎖於北岸之根僞燕王秦曰綱駐其中街之上爲老鼠山賊營一座又上爲磨盤山

賊營一座又上爲牛肝磯賊礮臺一座自牛肝磯下至吳王廟長約六七里皆密排礮眼向江心轟擊全力以防舟師南岸自初四初五大敗之後不敢復於半壁山上紮營僅於山下十里富池口紮營三座以護下游之賊舟我軍戰船自初九日進紮蘄州之下十二日遂進紮見峯嘴去田鎮僅九里右營參將楊載福左營同知

彭玉麟等密登南岸至臣塔齊布及羅澤南營
商定大舉破賊之策分戰船爲四隊第一隊專
管斬斷鐵鎖凡炭鑪鐵翦大椎大斧之類皆備
第二隊專管攻賊礮船與之對相轟擊第三隊
俟鐵鎖開後直追下游大燒賊船第四隊坐守
老營以防賊船冒死上犯十三日辰刻戰船出
隊臣塔齊布督同羅澤南周鳳山等率陸軍六

千人排列江之南岸該逆自牛肝磯礮臺以下
直至吳王廟盡銳抗拒千礮環轟子落如雨我
水師第一隊循南岸急槳而下徑赴半壁山下
鐵鎖之前賊以礮船開近救護我軍第二隊環
圍擊之燒其快蟹船二號該逆不敢復護鐵鎖
劉國斌等椎斷船上之鐵碼哨官孫昌凱繼以
洪鑪大斧且鎔且椎須臾鎖斷各三板飛槳駛

下該逆見官軍衝過鐵鎖卽時旗靡轍亂箠上
放礮之賊已駕小划而遁下游賊舟蒼黃揚帆
下竄我軍三板追及縱火焚之追至三十餘里
之鄔穴地方是時東南風大作賊舟不能下行
紛紛撲水不能相顧陸路之軍又縱火焚燬其
火藥大船不少當水軍衝過鐵鎖之時 臣塔齊
布卽督飭陸軍從半壁山飛馳而下見鄔穴以

下尙有賊船復率十餘舟鼓棹窮追至龍坪時
已三更凡燒船約四千餘號至次日巳刻始行
歸隊奪獲賊船至五百餘號之多彭玉麟恐船
隻太多爭奪貽誤又恐衆勇飽則思颺遂將奪
回之船一併焚之該逆舟楫被燒無巢可歸無
糧可食無子藥可用遂於十三夜四更自焚營
壘而遁至蘄水陸賊雖與田鎮之賊爲一而兩

路抗拒各有頭目踞田鎮之逆首爲僞燕王秦
曰綱僞國宗章俊等踞蘄州之逆首爲僞檢點
曾鳳傳陳玉城等各有真賊數千脅從數萬田
鎮之賊力爭南岸之半壁山南軍破之於前水
師焚之於後蘄州之賊與北軍相持日久當田
鎮鏖戰蘄州賊忽出數千人來撲都司楊名聲
等督勇迎敵陣亡四十餘人水師戰船向岸開

賊復偷搭浮橋從牛馬坳來撲魁玉等各營別
由東路菩提壩分股抄尾並撲至曹河楊昌泗
等分道抵禦始將該逆擊退蘄州之賊知田鎮
巢穴已破逆舟已焚遂於十四夜棄城而逃竄
往廣濟一帶現已飛飭水師前隊乘勝進攻九
江臣塔齊布等卽日由陸路前進此次水陸將

士非常出力應請破格

恩施以勸將來其餘出力員弁兵勇仰懇

天恩容臣等開單保獎陣亡兵勇查明照例辦理

曾國藩塔齊布又奏言接據稟報水師前隊彭

玉麟等於十月十九日已追賊至九江沿途續

焚賊船百餘號九江城外已無賊蹤城內亦無

多賊惟十三夜逃出賊戰船八號尙泊九江之

北岸其田鎮蘄州之賊概由北岸竄至黃梅孔
壘驛一帶 臣塔齊布於二十日率羅澤南等渡
江至田鎮巡北岸而下擬至九江對岸與水師
一會再行相機勦辦

曾國藩塔齊布又奏言查逆賊經屢次大創前
後焚燬逆船約計萬餘號長江之險我已扼其
上游金陵賊巢所需米石油煤等物來路悉已

斷絕逆船有減無增東南大局似有轉機然檢閱賊中文卷並細詢逃出各犯知其頭目傷亡者無多而兇悍亡命之黨爲數實尙不少臣等初慮江面不清或成割據之勢若勦辦得手又慮江面一清或成流賊之患蓋水師一入皖境焚其舟次之巢穴失其飄忽之長技分支四竄乃事勢之所必至臣等一軍以肅清江面直擣

金陵爲主設該逆旁竄他縣陸軍竟難兼顧相
應請

旨飭下諸路帶兵大臣及各省督撫擇要堵禦豫防流
賊之患其不臨江之府縣或爲該逆盤踞官兵
所必爭之地臣等亦必迂道往攻斷不肯舍難
就易稍誤事機奏入

上命軍機大臣傳諭曾國藩塔齊布和春福濟曰此次

燒燬賊船至四千餘號之多田鎮蘄州之賊潰敗奔竄皆由該侍郎提督等籌畫盡心和衷其濟卽楊載福彭玉麟羅澤南等亦能人人用命制勝出奇朕心實深塵念水師前隊早抵九江該郡城外已無賊船大隊舟師自可順流下擣惟北岸之賊竄往廣濟黃梅一帶祇係聞敗潰逃並未大受懲創北岸一軍係桂明統帶何以屢次奏報並未見其帶兵助勦卽扼

堵蘄州之軍亦並無該提督在內究竟逗留何處殊不可解魁玉楊昌泗等遇賊卽挫猶是從前孱弱積習如此軍威大振尙不能鼓舞奮興尤爲可恨今塔齊布已率羅澤南等渡江而北自係先其所急爲節節打通之計但廣濟黃梅直接皖境皖省西南一帶如潛山太湖等處皆爲賊踞一間楚軍進剿勢必悉力抗拒若北岸一軍再有遷延必至塔齊布等後路

無援殊爲可慮著曾國藩等卽行嚴飭桂明等迅速
進勦一面飛咨楊需督兵繼進不得稍形觀望袁甲
三前奏已派參將劉玉豹舉人臧紆青帶領兵勇二
千先趨潛太一路接應不知曾否行抵該處如能剋
期會合則塔齊布前路亦有接應可以沿江攻擊直
抵安慶與水師會合自成破竹之勢曾國藩大隊師
船如能於日內駛過九江則江面賊船已無回竄江

西之慮該省派防湖口之礮船一百五十隻爲數不
少亦可令其出境隨征以爲後路聲援東西梁山爲
金陵第一門戶賊船之多賊壘之固尙不下於田鎮
紅單艇船上駛者止三十九隻未能突過梁山徑
扼蕪湖必須厚集師船方能上下夾擊曾國藩等務
當加意慎重妥協辦理廬州逆匪日久負隅和春等
不能迅速克復以致桐舒一帶兵力不能兼顧若楚

軍得勝之後餘逆紛紛內竄則旁通潁毫上接淮徐處處皆形喫重曾國藩等水陸各軍本爲肅清江面直擣金陵豈能尾賊北追至成隔絕著和春福濟卽行分撥兵勇於沿江一帶接應塔齊布之兵仍知會袁甲三嚴扼臨淮南北要隘其六安正陽等處前已有旨飭調河南南路防兵出境堵勦著卽飛咨英桂妥速調撥萬不准任令賊蹤踵至秦定三初到舒城

集賢堂卷一百一
三
尙形奮勇近來又復疲玩著和春等督飭該提督迅將該城克復則此路官兵接應楚軍尤爲近便若處處爲賊牽掣徒以兵力難分爲解致逆匪被偏北竄和春等不能當此重咎也

上又命軍機大臣傳諭托明阿向榮陳金綬雷以誠曰楚境逆賊自半壁山大加誅戮之後田鎮蘄州又不戰而潰紛竄下游到處衝突勢所必至雖已飭令和

春福濟等分兵接應楚師嚴防北竄要隘但據袁甲
三前奏廬州舒巢之賊復陷廬江四城犄角我軍有
應接不暇之勢計曾國藩等水陸兩軍可以沿江直
下節節疏通而腹內各郡縣自難兼顧潛太一路固
可由六安繞赴淮河其全椒滁州等處皆逼近江岸
所有鍼魚嘴駐馬河石蹟橋及烏江一帶數十里賊
營聯絡直接東西梁山賊船停泊不可數計若非水

陸官軍往上迎擊截其分支四竄之路卽江面肅清其占踞陸地之賊與上游潰匪乘間奔突下而蕪湖太平各口岸固屬可虞上則踰淮而北其蔓延爲患更不可問著托明阿向榮等和衷定計通籌全局一面趕緊攻克瓜州剷除金山北固賊巢一面督飭師船迅速上駛與曾國藩水軍會合由梁山蕪湖荻港以達安慶扼住南岸各要口仍嚴飭武慶等力守浦

口不得更令游匪登岸竄入並令與恩錫張光第聯
爲一氣將全滁和含境內賊匪併力攻勦該處兵力
不敷應如何派撥協勦之處著托明阿等妥商調往
能令廬州東境勦洗一空卽可與臨淮袁甲三之軍
會合聲勢聯貫逆匪自不敢復萌北窺之志南省轉
機在此一舉該大臣等雖各領各軍分駐南北江岸
實則共辦一事朕日盼成功以酬勞勩若坐待楚軍

之至或令該逆等紛紛竄逸釀成流賊之患責有攸歸該大臣等尙有何顏對朕耶

上諭內閣曰曾國藩塔齊布自岳州統師東下以來沿江攻克城池殲除醜類所向克捷皆由同心戮力調度有方節次披覽奏章朕心實深欣慰在事文武員弁兵勇亦能人人用命奮不顧身尤堪嘉獎大軍現已追至九江沿途焚擊賊衆甚多該郡城外已無賊

船卽著該侍郎等乘勝追剿直達皖江與下游金陵
大營會合夾擊以期肅清江面淨掃妖氛用副委任
湖南常德協副將楊載福窮追賊船勤勩最著加恩
著賞加總兵銜同知彭玉麟有謀有識著記名以知
府用並賞給詳勇巴圖魯名號浙江甯紹台道羅澤
南著賞加按察使銜遊擊普承堯著賞換花翎守備
劉培元著以都司升用並賞換花翎千總秦國祿著

以都司卽補並賞戴藍翎孫昌國著以守備用外委
洪定陞著賞加守備銜以千總卽補並賞戴藍翎其
餘出力員弁兵勇著卽據實保奏候朕施恩

欽定剿平粵匪方略卷一百十一 甲寅年

十一月初一日 丙寅 安徽學政沈祖懋奏言賊竄

甯郡徽防緊要前經護杭嘉湖道徐榮督飭徽
勇實力堵禦徽郡獲安昨接浙撫來咨令該員
回杭清理籌防局務囑臣派員接替督防臣查
賊匪蓄意取道徽甯進攻江浙徽甯爲江浙門
戶而池郡之東流建德青陽石埭等處又爲八

徽甯之門戶石埭與徽郡太平毗連歙黟均屬
接壤時有僞官潛往脅民蓄髮經臣選派徽紳
前往勸導居民始薙髮反正惟民志甫定懼賊
復來經臣咨請浙撫先後派兵赴石防守八月
十九及二十八等日賊匪由大通河復竄青陽
來攻石邑琉璃嶺等處經遊擊周天受督兵勦
殺壘獲勝仗而貴池銅陵青陽東流等處濱江

無險賊匪時來侵擾現聞金陵賊勢窮蹙兩湖
之匪又多下竄廬郡疊次獲勝餘賊多向南岸
逃竄池郡緊對安慶匪船往來自如今建德復
被賊陷石埭亦復震動餘匪俱歸池郡徽甯各
隘雖有兵勇恐難遏其兇鋒現當防堵喫緊徐
榮若一撤回萬一委託非人徽郡或有疏虞咎
將誰諉現在川浙閩兵及本地練勇雲集於此

應請

旨飭下江浙督撫另委提鎮大員前來督理俟江面得有舟師即可相機收復池郡奏入

上命軍機大臣傳諭黃宗漢何桂清曰徽甯爲江浙門戶池州所屬青陽石埭東流建德貴池等縣皆與徽郡西境接連該處情形緊要必得統率有人事權方有專屬著黃宗漢何桂清仍留徐榮辦理徽郡防堵

事務毋庸更易生手現在曾國藩等水軍已收復蘄
州追至九江即可直達安慶托明阿等亦分兵協剿
該逆奔竄無路恐其由徽甯窺伺江浙必須嚴密設
防未可稍存大意黃宗漢不得因擢任川督置身事
外何桂清雖甫經到浙亦當悉心籌畫以副委任

初一日 丁卯 向榮奏言前次逆股竄擾秣陵關業

被官兵勦洗查秣陵在江甯城南實爲第一要

衝現調兵勇分屯要口共計一千五百餘名旋聞蕪湖賊有侵犯東壩之謠已分股闌入清水河黃池一帶該處接壤高淳關繫蘇杭門戶當檄鄧紹良馳赴高淳攔剿該逆因知有兵來援全股遁回蕪湖城中逆匪自十月十二至二十二等日時出竄擾均經兵勇擊退副將張國樑蔡應龍等復於上方橋等處疊次攻剿斃賊多

名其板橋賊匪經蔡應龍帶兵往襲環濠攻撲
兩面合圍槍礮排轟擊斃守牆之賊無數因濠
寬水深未能破入分隊撤回水路師船攻破九
洲賊營後仍在浦口守風查洲地南岸尚有
該逆船礮護守橫江橋練阻我上攻已嚴飭吳
全美葉常春乘勝設法會同李德麟等迅圖斷
賊橋練扼守上游俟湖北師船一到併力夾攻

至金陵下游南岸烏龍山周家山緊對北岸官兵防守地方兩邊皆有沙灘可以安設鐵練阻截賊筭賊船現飭署六合縣溫紹原就該處造具鐵練相度形勢攔隔江面繫住浮船幫以大筏纜兩道並用大木紮成三角尖式排釘狼牙分擊纜練以鐵錨墜沈水際可以鉤絆賊筭不能順流衝下仍豫辦柴船數十隻以作火攻並

派划船駐泊扼守該處距觀音門江口不遠僅
有守備彭常宣艇船六隻堵勦恐不得力現已
咨商托明阿飭將總兵陳世忠所領師艇八隻
由段要口移上觀音門會同勦堵以斷竄往瓜
鎮之路至鎮江賊勢較蹙經余萬清乘勝進攻
連得勝仗前撥去丹陽防兵五百名已移近鎮
江聯絡紮堵復密飭幹員前往鎮營與余萬清

商度克復機宜儻有可圖卽再抽精兵往助奏

八

上命軍機大臣傳諭托明阿向榮曰前因逆匪敗竄廣濟黃梅當諭令托明阿向榮等撥兵向上迎擊截其分竄之路並嚴飭師船迅速上駛乃本日向榮奏師船尙在浦口守風逆賊橫江橋練尙未攻斷同一鐵鎖攔江伎倆何以該逆用之田鎮曾國藩等一戰破

之用之九洑洲托明阿等屢攻不破殊不可解現在
烏江一帶賊壘經袁甲三等進勦平毀無餘惟因水
路無兵接應以致敗賊揚帆逃逸若吳全美葉常春
能於攻破洲地後卽駛赴上游自可水陸夾擊不但
爲楚師接應並可斷絕賊援乃任意遷延水陸隔絕
殊爲可恨著托明阿向榮嚴飭該總兵等剋日將各
船悉赴上游沿江勦洗直抵蕪湖毋許推諉至會國

藩等斬斷田鎮賊練係分船四隊以一隊專管毀斷
鐵鎖以一隊圍攻其護鎖之船使之不能相救船上
之鐵碼椎斷其承鎖小船卽時抽出江路一開四隊
戰船皆可分投焚剿下游江面較寬施展更易爲力
師船之外尙有多槳快船豈不能酌量分隊倣照辦
理總由水師將弁不思設法以致賊練未能卽破而
我師復自爲鎖纜攔截上游似此相持將使紅單各

船終無上駛之期徒以湖北師船一到合力夾攻爲
詞豈湖北一軍之外各營皆應坐視旁觀耶著托明
阿向榮等於接奉此旨後卽將攔江賊練迅速攻破
不准再有遲延並將籌辦情形速行具奏如水師員
弁有意玩延卽著嚴行叅奏其和含等處應如何分
撥兵勇與袁甲三合力攻剿之處亦著托明阿等妥
速籌辦但能洗淨一處卽少一北竄之路並非專顧

瓜州金陵遂爲該大臣等職分已盡也

同日楊需奏言十月十四日南岸水師大獲勝
仗陸路之賊上下逃竄上竄者羣集蘄州魁玉
楊昌泗駐紮蘄州之三道橋地方爲賊掩襲兵
勇潰散賊遂乘勝上竄幸黃州府許廣藻等督
派練勇在白池翁一帶地方竭力堵遏殺賊數
百人賊始退竄同知銜李光榮亦敗退至濫泥

灘拏獲賊匪哨船獲賊九名卽派敢死士假賊
衣巾乘賊哨船攜帶火具乘夜駛赴蘄州至賊
壘木城邊拋擲火罐縱火焚燒諸勇散伏附近
地方見火起奔赴城內賊匪不知虛實不敢出
戰未及天明均赴廣濟一路逃竄官兵追殺十
餘里收復蘄州魁玉楊昌泗收集兵勇自後追
勦臣得報後飛飭許廣藻等控扼要隘防其北

竄十六日接會國藩函商塔齊布羅澤南自田
鎮渡江兜勦而上與比軍三面夾擊復飛飭副
將王國才調撥各路兵勇剋期會勦並添派四
川練丁一千名馳往協助臣俟藩司到省卽日
起程赴蘄黃之間督辦魁玉楊昌泗身爲統領
不能豫爲防範致被賊匪掩襲實屬疏懈無能
應請

旨摘去頂戴以示懲儆奏入

上諭內閣曰副都統魁玉總兵楊昌泗督帶兵勇駐紮
蘄州之三道橋地方於敗匪潰竄之時不能奮力扼
截致官兵有驚散情事雖經事後收集跟蹤追勦究
屬約束不嚴疏於防範魁玉楊昌泗均著摘去頂戴
以示薄懲儆再不知愧奮卽著嚴叅懲辦

同日和春福濟袁甲三奏言前因和含被賊竄

擾經 臣等派署臬司恩錫駐紮全椒之官渡鳳
穎道張光第駐紮滁州之烏衣鎮扼要守禦該
逆於烏江迤西十餘里之駐馬河緊靠江沿紮
大營三座踞水設險勢成犄角並於烏江一帶
節節設卡意圖堅踞該司道等於本月十七日
會軍於烏江之石橋派定協領托雲布等分路
前進左右設伏通判李翰華往約鄉團助戰十

八日出隊時西北風大作行距烏江二里許該
逆一見我兵卽棄卡逃走兵勇追至烏江鎮生
擒紅巾賊十餘名正法並將鎮後小賊巢轟燬
由項王廟取道前進該逆亦分路迎拒槍礮並
發我軍擊無不中各營均斃賊數十人或百餘
人不等並擊斃黃風帽賊目一名逆勢不支我
兵直撲逆賊中營復分撲東西兩賊營該逆彼

此不能相顧我軍合力縱擊並將火毬火箭齊
向該營拋擲風助火勢立將賊營三座同時焚
燬營內之賊紛紛越牆向江邊奪舟爭渡經我
軍追斬及落水淹斃者不計其數適候補通判
李翰華等各帶團練踵至會合兵勇排列江干
齊放連環槍礮並拋擲火罐火毬火箭燒燬賊
船六隻用大礮擊沈賊船三隻其被燒情急者

俱投江身死餘悉揚帆駛往對岸而逸其附近
之石磧橋賊營亦於大風中自行焚燬沿途百
餘里內居民歡呼同時薙髮現在探聞九洑洲
賊營雖已全數掃平而賊船往來停聚者仍復
不少意爲保護攔江鐵鎖豫備我軍衝突已飭
該可道等仍回紮官渡烏衣杜賊乘虛紛竄並
確探和含等處賊蹤如有可乘卽督軍馳往收

復務期北岸沿江悉就肅清以斷賊金陵廬巢
之慮援然後逆捲而上與西南路聲息相通相
機堯勦應請

旨飭下向榮托明阿嚴飭文武將弁趕緊設法將賊練
拆毀迅催水師船剋期上駛俾得水陸會擊庶
可早殄妖氛

袁甲三又奏言查逆賊所爭者江路是以上游

田家鎮下游九洲均有鐵鎖攔江爲併力堵
截水師之計尙未暇旁及陸路惟上下游關隘
一破江面斷絕則各城之賊勢必鋌而走險卽
廬舒各城同時克復亦斷不能以盈千累萬之
賊盡殲於各城之中一經潰散其所向難以意
料况皖省重兵除臨淮設有大營餘皆屯守廬
舒各城下正陽六安地方距廬州不及二百里

距臨淮四百餘里且與河南之光固湖北之蘄黃六牙相錯均係土匪出沒之區周圍數百里並無重兵鎮壓儻逆匪狡焉思逞希圖分我兵力無論何處突出數百人徑往竄擾沿途裹脅不過數日又成大股邇時臨淮相距較遠赴救需時而廬舒城下之兵不惟不敢分亦且不能分蒼黃失措何以禦之若豫省早派明幹大員

督帶重兵駐紮不惟有備無患且聲勢旣壯卽
可消其奸謀 臣現接曾國藩蘄州來信備述陸
兵尙形單薄查蘄州偏近潛山太湖現聞該逆
往來無常 臣等所派兵勇現由靈山赴潛太一
路相機攻取並可爲蘄州聲援軍機尙屬湊合
惟北路空虛現雖奉

旨飭令河南分兵進駐皖境恐不能剋期而來應請

飭催英桂迅速籌撥趕緊趨行庶聲援一壯賊膽自寒
或可消患未萌辦理得手

同日英桂奏言查豫省歸陳光三府州所屬皆
與皖省接壤水陸可通勢難處處設防惟在扼
要以資控制現在情形當以歸德爲最要陳郡
次之至光屬之固始雖與六安毗連情形尙非
喫重臣前以南陽鎮臣邱聯恩駐紮光州是六

安情形可無北竄之慮陳州水陸兩地皆須嚴
密防範仰賴

皇上洞燭機先特派牛鑑駐紮聲勢頗壯至正陽一帶

中隔潁州臣愚以爲潁州布置嚴密則逆蹤無
虞竄越擬再將信陽三關留防兵勇撥赴陳郡
統歸牛鑑調遣或近駐潁州或遠扼正陽容俟
咨商妥辦並知照福濟袁甲三互相策應至目

前最要之區莫如歸德與蒙亳緊相接壤臣故
於信陽遣撤兵勇撥赴歸德獨多並請派候補
道張維翰馳往幫同徐廣縉辦理防剿臣接徐
廣縉來文以病體難支業將宋郡防剿事宜統
交張維翰接辦臣查該道素能辦事且熟悉歸
德情形已批飭統由該道會同各帶兵官相機
督剿臣在省料理應辦事宜相距歸德不遠自

可隨時策應如果情形緊急仍卽親往督辦並
擬察看北路軍情稍鬆卽咨照河北鎮臣崇安
前赴歸德統帶兵勇更資得力均奏入

上命軍機大臣傳諭和春福濟袁甲三曰據英桂奏將
信陽三關防兵撥赴陳州歸牛鑑調遣信陽遣撤兵
勇撥赴歸德派道員張維翰接辦防剿袁甲三酌量
何處空虛亦可徑行檄飭牛鑑張維翰迅速派兵前

進如該員等心存畛域有意逗留卽著袁甲三據實
叅辦惟曾國藩等水陸各軍卽日可抵皖境沿江賊
黨勢必紛竄腹地袁甲三雖駐紮臨淮所有北路各
州縣均須面面顧到亦不得泥守一隅以奏明北路
空虛遂不復設法籌及何處情形喫重卽迅速督兵
前往萬不准有賊蹤踰淮而北和春福濟圍攻廬州
日久無功若能與托明阿等互相接應將東路賊匪

先行掃蕩則廬城賊勢益孤更屬易於得手並須時
時與袁甲三知會不得令勦餘潰匪潛謀北竄若頓
兵城下以爲藏身之固不復兼籌大局國法具在朕
不能稍從寬宥也

上又命軍機大臣傳諭英桂曰曾國藩進攻九江指日
可抵安慶逆賊被勦緊急必由陸路紛竄皖省重兵
聚於廬舒凡正陽六安等處均屬空虛袁甲三雖駐

臨淮兵力較單勢難兼顧河南現已撤防正可撥兵
前往以資截勦茲閱英桂奏報僅將信陽三關兵勇
撥赴陳郡其或進駐潁州或往扼正陽尙俟咨商妥
辦是豫省之兵現在全未出境著英桂卽將撥赴陳
郡兵勇酌量調往正陽六安等處相機協勦至邱聯
恩駐紮光州牛鑑駐紮陳州與其遠爲聲援何如帶
兵前進之較爲得力並著英桂斟酌情形將該二處

防兵如何分派赴皖迅速籌辦該撫亦應出省防剿
不得株守省城至歸德爲上年逆匪北竄之路地方
極爲喫緊徐廣縉請假後張維翰是否可恃仍著英
桂斟酌辦理毋稍貽誤

初六日 辛未

上命軍機大臣傳諭和春福濟曰前以上游楚師節節
下徧恐竄匪突入皖境疊諭和春等迅速分兵接應

此時安廬舒桐等處賊匪仍聯絡一氣江面旣毫無
攔截陸路亦處處空虛賊情狡黠異常萬一糾合上
下游潰匪蹈隙而來又將何以爲計該提督等頓兵
城下坐令狂寇稽誅不但南路關山一帶應防金陵
分股踵至且西路鳳潁所屬皆與豫境毗連一經勾
結蔓延則防勦更形棘手昨復諭令英桂將仁陽撤
防兵勇調赴安徽協勦著和春等就近知照袁甲三

酌量迎提妥爲布置以顧北路大局其烏江賊壘已
毀平數處務卽乘勢將沿河賊匪趕緊殲除昭關清
流關兩要隘亦宜豫籌兼顧和春等惟當竭力攻克
廬州以次收復舒桐各縣斷不准株待曾國藩等行
抵安慶後再圖合攻一面仍撥兵四路接應臨淮一
路責成袁甲三專司防勦該提督等亦不得以督辦
有人遂置勿顧

初七日

壬申

陳啟邁奏言

臣

前派戰船出江會剿

總兵趙如勝行抵南康府有星子縣生員鄂拱垣練勇三百餘名情願越境剿賊趙如勝等卽帶同前進抵湖口縣老鴉磯地方當將磯頭賊匪礮臺攻破遙見下游東岸之上下鐘山西岸之梅家洲大小賊營及礮臺四十餘座湖面排列賊船三百餘隻趙如勝等派候選通判程迪

昌等帶勇由陸路進攻東岸上鐘山賊營自督
戰船直攻水寨賊船礮密如雨趙如勝等率各
戰船衝入賊陣乘風縱火先後擊沈及燒燬賊
船一百餘隻斃匪千餘名餘船遠竄我兵追擊
十餘里又轟沈多隻隨乘勢攻勦西岸梅家洲
賊營將靠岸礮臺營壘悉行攻破擊斃賊匪一
百餘人時程迪昌等圍攻上鐘山各員弁奮身

槍上山梁殺賊四十餘人將賊巢燒燬並將湖
邊賊寨十數座概行踏平遂進攻下鐘山賊營
該處山勢陡峻各勇仰攻未能得手是役共計
殺賊一千二百餘名奪獲旗幟槍礮刀矛等二
百餘件其武甯縣石橋黃化一帶餘匪竄聚勢
漸鴟張經臬司惲光宸派已革守備吳錫光等
馳往石橋勦捕陣斬黃馬褂賊目二人踏毀賊

營五座斃匪七百餘人墜崖跌斃者無數生擒八十餘名俱髮長尺餘及五六寸不等奪獲槍礮器械五百餘件黃化地方賊巢亦被各勇奮力圍攻殺賊四百餘人生擒賊目陳思號等六名餘匪四竄該處賊巢亦卽縱火焚燒惟梅家洲下鐘山賊衆尙負隅固守現經臣添撥兵勇七百名馳赴協助以期迅速殲除再安徽建德

縣賊匪數千餘人竄入鄱邑洋塘地方擾及四十里街肆行焚掠離城僅三十餘里饒郡本無城垣兵勇又屬單薄亟應撥兵援剿現派署臣標中軍參將祥麟帶兵五百名兼程馳往並飛札趙如勝酌撥兵勇數百名就近馳往會剿奏
入報

初八日癸酉僧格林沁西凌阿奏言逆匪自被誘

出巢受創後仍前死拒臣等嚴飭各營勿稍鬆
勁十一月初一至初四等日該逆屢撲我軍營
牆均被擊退傷亡不計其數兇猛之勢大遜於
前但困獸猶鬪臣何敢稍涉大意現在一面設
法進攻一面諄飭各營嚴密圍困以免疏虞惟
節交冬至天氣嚴寒各營將士雖經臣設法勸

捐皮棉衣襖一萬六千餘領分給禦寒仍不能
一律溫煖每睹單寒艱苦情形不勝焦急奏入

上命軍機大臣傳諭僧格林沁西凌阿曰賊匪自上
次誘出以後該大臣等並未實力進攻卽初一日三
次撲營均經擊退亦不過小有斬獲豈得謂兇猛之
氣大遜於前該逆連日沿濠窺伺意圖出竄乃稱防
守甚嚴不敢很撲似此遷延時日稍有鬆懈必至竄

突他處現在天氣嚴寒各將士冒冷執戈朕每一動
念輒爲心惻該大臣僅以圍困爲得計試問守而不
攻豈能殲茲醜類況軍營衣領等項向恃捐輸若不
趕緊攻勦勸捐斷難爲繼連鎮並無城郭何至抗拒
數月未能破其巢穴該大臣旣知士卒艱苦情形卽
當激勵軍心迅圖攻取若必待逆賊出巢始行轟擊
豈堅匿不出卽束手無策耶隆冬歲暮風雪在所不

免此次既乘風奔撲則其狡譎伎倆必更伺我之隙肆其詭謀與其設計圍困不如迅速進攻該大臣等務當及早蒞事以慰朕懷不得自謂調度無能致令該逆久稽顯戮也

同日勝保奏言臣前奏調兵二千名現已陸續來營查看直隸兵丁較爲強壯然未經戰陣必須訓練而後可用現分派守禦濠牆將臣原帶

兵勇抽出以作攻撲之用賊於前月二十五日
夜分南北兩路猛撲礮營拉開柵欄連拋火彈
將營內帳房席柵燃燒五架經我兵勇奮力死
拒賊大受創二十七八等日夜間賊復出撲濠
牆均被我兵擊回現在賊情窮蹙日甚萬難久
持而拌死愈力臣思賊城柵密濠深我兵豎梯
而攻徒傷兵勇無濟於事惟有暗挖地道安用

地雷一法最爲得力此時合圍愈緊賊勢日蹙
兵氣日盛如果轟開城垣斷不至如前次之未
能攻入惟賊晝夜死守濠溝非我兵出其不意
不能徑抵城下臣已將大營挪近以便隨時相
機進攻現復於西南東南東北正北就營盤內
暗挖地道四處約計旬餘可挖至城根賊之全
力俱在東北四路動手諒賊萬不及防臣等惟

有設法力籌進攻機宜早圖殄滅萬不敢稍有
遷延奏入

上命軍機大臣傳諭勝保曰此次賊匪乘夜撲營拉開
樹柵拋擲火彈雖經官兵擊斃甚多而礮營帳房業
已被燒並於二十七八等日屢次出撲可見該逆思
竄甚亟勝保等籌挖地道於城根安用地雷冀得轟
開城垣著卽迅速妥辦惟賊情旣已窮蹙斷不肯束

手待斃該大臣等一面籌挖地道一面仍當併力進攻勿徒恃有地雷轟擊復蹈從前呂公車等覆轍勞費無效徒延時日現在官兵業已到齊無可停待天氣沍寒士卒疲憊勝保以數月之久攻此區區之城而不下從前勇敢之氣日就銷磨殊不可解著卽迅圖克復出其不意四路合勦毋再遷延自干重罪

同日托明阿陳金綬雷以誠奏言逆匪自土橋

潰敗後遁入瓜州潛至土橋迤東之雙橋地方
肆行焚劫臣托明阿率領慧成等由西岸進攻
德興阿分馬隊爲兩翼設伏於吳家樓派都司
王永等抄賊後路令遊擊馬永東等迎頭兜勦
行至雙橋探知賊匿民房馬永東等放火燃燒
殲賊十餘名突有大股賊匪蠡擁而來官兵連
環轟擊斃賊甚多王永等已繞出賊後賊陣遂

亂德興阿馬隊左右抄襲逆勢不支遁回瓜州
又經參將安勇等截斃多名餘悉奔入土城官
兵連日進攻勦殺甚衆臣陳金綬雷以誠督同
穆克登額等由東岸進攻分路截勦殲賊三百
餘名奪獲器械多件練勇張大福等生擒執旗
賊目訊係傷害瞿騰龍之賊諸軍無不悲憤卽
爲瞿騰龍設位梟賊以祭臣等查東西兩岸兵

勇遇賊接仗無不奮力爭先軍心實爲踴躍惟
賊瀕江踞險又有鎮江賊黨時時過江相助非
杜絕外援實難破其巢穴非肅清江面尤難斷
其外援屢荷

聖主指示力奪金山誠制賊死命萬不可緩之舉臣等
現在熟商密約百計環攻並督水師將現議攔
截賊簿之方星夜趕辦齊全所有先踞金山鮎

魚口之賊箠賊船迅速勦淨奪取金山使南北
逆勢俱孤庶可一鼓齊下

托明阿陳金綬雷以誠又奏言現據李德麟稟
報觀音門有賊箠賊船數十隻自金陵下關駛
出口門經守備彭常宣等擊沈二隻賊始遁去
又有賊箠並礮船二十餘隻從口門繞岸而行
潛圖下駛彭常宣會同各艇直前奮擊焚燬箠

船木城數處沈其礮船數隻該逆竄回口門各
艇乘勢緊追立將船梢黃衣賊目擊落水中餘
賊轟斃落水不計其數口門兩岸草中伏賊亦
經官兵轟斃甚多其後幫賊匪從燕子磯
衝來我師奮力擊沈多隻彭常宣手開大礮將
穿繡龍黃衣之賊擊翻落水賊始潰亂各艇火
器齊發復燒賊船六隻賊入口門自將後幫逆

身三身自之田才二下二
三
船衝翻數隻水師奪船二隻斃賊無數查觀音
門爲賊下駛必經之路該逆連次衝突必當力
遏其鋒臣托明阿已飛派總兵陳世忠由段要
口移紮觀音門合力堵剿

托明阿陳金綬雷以誠又奏言又副將李德麟
等與陸師會攻九洲賊營見賊船數十隻紛
赴北岸該副將等卽飛檣追截擊沈賊船數隻

奪獲二隻餘賊竄回南岸我師跟剿專攻南岸
七里洲賊營派衛千總任銓等由後路抄襲該
副將等親督大船攻賊前路槍礮環施擊倒執
旗賊目及紅衣賊匪多名任銓等由後路登岸
直撲賊營拋擲火器登時火發守營之賊不戰
自亂我師乘勢夾剿殺賊一百數十名擠溺江
中者不計其數賊營二座全行燒燬共獲大礮

四位槍刀旗幟三十餘件卽派任銓等赴九洲協勦正值賊營火起陸師已經得手該逆復聞水師礮聲四散奔逃陸師勦殺大半餘賊淹斃甚多其奔上船者盡被水師殲斬無遺維時南岸賊船數十隻揚帆來救該副將等開放大礮轟沈賊船三隻擊斃淹溺之賊無數奪獲划船三隻並旗幟器械號衣多件餘船奔回南岸

兩洲一律肅清惟浦口江面攔江鐵練尙未斬
除南岸賊船停泊尙多不特江路梗塞水師不
能迅赴上游更恐該逆復占兩洲我師又形棘
手臣等咨行向榮令吳全美葉常春蔡應龍等
趕緊會剿又聞金陵尙有賊箠欲陸續下駛經
署六合縣溫紹原等於觀音門下口安設攔江
鐵練篋纜破賊木箠至儀徵土橋江面前據總

兵陳國泰獻以箠破箠之法嗣因江面遼闊木料難購亦擬改用鐵練現在催令趕緊布置遏賊箠下駛之路一面催令陳國泰會商孫雲鴻周士法等速勦金山賊箠奪回金山以期節節進勦

同日楊需奏言據曾國藩咨塔齊布羅澤南並渡江赴北岸追勦南岸空虛卽飭臬司胡林翼

馳赴興國會同都司石清吉扼守富池口半壁
山一帶防堵藩司夏廷樾業經到省 臣卽留派
都司施鴻恩等扼要分紮防守省城 臣督帶兵
勇四千餘名馳赴荆黃之間相機策應現在賊
匪竄踞黃梅連及廣濟地方塔齊布羅澤南由
田鎮進勦水師彭玉麟等追賊至九江賊匪聞
風下竄復有賊匪自下游上駛竄踞九江城中

又另股賊匪自安徽太湖等處擾及黃梅意將
上竄傳聞江甯鎮江賊匪日見窮蹙向榮等必
當乘勢力攻該逆非犯江西卽聚安徽吳楚之
間甚爲喫緊查黃梅縣爲江西安徽三省連界
與宿松太湖接壤賊恃其巢穴之近屯聚黃梅
臣已飛咨安徽撫臣檄飭六安英山霍山等州
縣分攻宿松太湖之賊兩面夾擊則楚皖之路

聞

可通亦以翦安慶廬州之羽翼於勦賊大局頗
有關係均奏入報